

# LAI SIMIN

## (Numbers)

---

**1** *Teei Carang Pui Isarelux*  
Yam in, Simiang Siyiex sikah mai Mose ka daux tiag gawng Sina, ka daux nyiex gox buan man bang kum pui hun, ka daux num ra, khix ra tix ngaix, khaix hoik lih hu kix khaing daux meung Ejiptux ah nin. <sup>2</sup> “Teei carang cub caw pui hun ceu pui Isarelux khankix khawmuik mai kawn nyiexma kix mai nyiexma keeing kix, maix simin ceukaux can pa mawh simex kukaux, <sup>3</sup>jah ka pa koe ju tixnga num haok plak piang, can pui pa pon hu daux naing, khaing daux ceu pui Isarelux khankix, maix mai Arun tak simin ti deuh kix tau mai krunaing kix heue. <sup>4</sup> Can pui pa ot tau mai maix khankix, tak mawh pui tix kaux pa mawh cao kaing pa kaoh khaing doehru mawx ru an daux nyiexma keeing nawh khankix heue. <sup>5</sup> Inkix mawh ceukaux pui pa sang teem ti cung mai maix, khaing ceucad Rubin, pa mawh Elizurax kawn simex Shedurax, <sup>6</sup> khaing ceucad Simion pa mawh Shelumilax kawn simex Zurishadie, <sup>7</sup> khaing ceucad Yudax pa mawh Nashon kawn simex Aminadat, <sup>8</sup> khaing ceucad Isakha pa mawh Natanelax kawn simex Zu-ax, <sup>9</sup> khaing ceucad Zebulun pa mawh Eliabax kawn simex Helon, <sup>10</sup>khaing kawn simex Yosiep khankix, khaing ceucad Epharim pa mawh Elishama kawn simex Amihut, khaing ceucad Manashe pa mawh Gamalelax kawn simex Pedazurax, <sup>11</sup>khaing ceucad Benyaminpa mawh kawn Abidan simex Gidawnix, <sup>12</sup>khaing ceucad Dan pa mawh Aheza kawn simex Amishadie, <sup>13</sup>khaing ceucad Asha pa mawh Pagelax kawn simex Awran, <sup>14</sup> khaing ceucad Gat pa mawh kawn Elishaphax simex Doelax, <sup>15</sup> khaing ceucad Napthalix pa mawh Ahirax kawn simex Enan khankix heue. <sup>16</sup>Inkix mawh pa hoik laug tix khaing cub pui hun khankix, pa mawh cao thong cao bung ka doehru keeing kix mai cao kaing ka piang pui tix rheng, ku

cub daux ceu pui Isarelux heue. <sup>17</sup> Khaix an Mose mai Arun kok pui in khankix, pa hoik laug ti mhai ceukaux kix <sup>18</sup> mai kix kraixkhrawm cub pui hun khawmuik tau, haok khix khix ra tix ngaix heue. Kix deeh ciied ti yaox doehru kix tau mai kawn nyiexma kix, tau mai nyiexma keeing kix, awm pa hoik simin ceukaux khankix, jah ka pa koe ju tixnga num haok plak piang kaux mawx kaux an kukaux daux pui heue. <sup>19</sup>Awm hoik tawx Simiang Siyiex lox ka Mose, mawh kheu nan, nawh simin kix ka daux tiag gawng Sina heue. <sup>20</sup> Kawn Ai Isarelux pa mawh Rubin mai kawn praix nawh khankix mai doehru kix mai kawn nyiexma kix mai nyiexma keeing kix awm pa simin kix ceukaux kix khankix, can simex kukaux, jah ka pa koe ju tixnga num haok plak piang pa pon hu daux naing khawmuik, <sup>21</sup> can pui ankix pa hoik simin khaing daux doehru ceucad Rubin khankix, koe pon mheen liah rheng phuan yieh kaux heue. <sup>22</sup>Khaing daux kawn praix Simion khankix, doehru kix mai kawn nyiexma kix, khawm nyiexma keeing kix, carang pa hoik teei kix awm pa simin kix ka ceukaux kix khankix, can pa mawh simex jahka pa koe ju tixnga num haok plak piang, pa pon hu daux naing khawmuik, <sup>23</sup> khaing daux ru ceucad Simion khankix, koe phuan mheen dim rheng loe yieh kaux heue. <sup>24</sup>Khaing daux ceucad Gat khankix, pa mawh doehru kix mai paox nyiex kix, khawm nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang, pa pon hu daux naing khawmuik, <sup>25</sup> can pui ankix pa hoik simin tix khaing daux doehru ceucad Gat, koe pon mheen phuan rheng liah yieh tixphuan kaux heue. <sup>26</sup> Khaing daux kawn praix ceucad Yudax doehru kix mai paox nyiex kix, khawm nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang,

pa pon hu daux naing khawmuik, <sup>27</sup>can pui ankix pa hoik simin khaing daux doehru ceucad Yudax koe aliah mheen pon rheng liah yieh kaux. <sup>28</sup>Khaing daux kawn praix ceucad Isakha khankix doehru kix mai paox nyiex kix, khawm nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang, pa pon hu daux naing khankix khawmuik, <sup>29</sup>can pui ankix pa hoik simin khaing daux doehru ceucad Isakha koe phuan mheen pon rheng pon yieh kaux heue. <sup>30</sup>Khaing daux kawn praix ceucad Zebulun doehru kix mai paox nyiex kix, khawm nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang, pa pon hu daux naing khankix khawmuik, <sup>31</sup>can pui ankix pa hoik simin khaing daux doehru ceucad Zebulun, koe phuan mheen aliah rheng pon yieh kaux heue. <sup>32</sup>Khaing kawn simex Yosiep khankix, pa mawh ceucad Epharim mai doehru kix, khawm paox nyiex kix mai nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang, pa pon hu daux naing khankix khawmuik, <sup>33</sup>can pui ankix pa hoik simin khaing daux doehru ceucad Epharim koe pon mheen phuan yieh kaux. <sup>34</sup>Khaing daux ceucad Manashe doehru kix mai paox nyiex kix, khawm nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang, pa pon hu daux naing khankix khawmuik, <sup>35</sup>can pui ankix pa hoik simin khaing daux doehru ceucad Manashe koe loe mheen ra rheng ra yieh kaux heue. <sup>36</sup>Khaing daux kawn praix ceucad Benyamindoehru kix mai paox nyiex kix, khawm nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang, pa pon hu daux naing khankix khawmuik, <sup>37</sup>can pui ankix pa hoik simin khaing daux doehru ceucad Benyaminkoe loe mheen phuan rheng pon yieh kaux heue. <sup>38</sup>Khaing daux kawn praix ceucad Dan doehru kix mai paox

nyiex kix, khawm nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang, pa pon hu daux naing khankix khawmuik, <sup>39</sup>can pui ankix pa hoik simin khaing daux doehru ceucad Dan, koe liah mheen ra rheng aliah yieh kaux heue. <sup>40</sup>Khaing daux kawn praix ceucad Asha doehru kix mai paox nyiex kix, khawm nyiexma keeing kix, awm carang ceukaux pa koh kix khankix, jah ka pa koe ju tixnga num haok plak piang, pa pon hu daux naing khankix khawmuik, <sup>41</sup>can pui ankix pa hoik simin khaing daux doehru ceucad Asha koe pon mheen tix rheng phuan yieh kaux heue. <sup>42</sup>Khaing daux kawn praix ceucad Napthalix doehru kix mai paox nyiex kix, khawm nyiexma keeing kix, awm carang ceukaux pa hoik koh kix khankix, jah ka pa koe ju tixnga num haok plak piang, pa pon hu daux naing khankix khawmuik, <sup>43</sup>can pui ankix pa hoik simin khaing daux doehru ceucad Napthalix koe phuan mheen loe rheng pon yieh kaux heue. <sup>44</sup>Inkix mawh pui pa hoik simin Mose, Arun mai cao kaing ceu pui Isarela khankix kao ra kaux, son tang nyiexma keeing nawh kaux mawx kaux an heue. <sup>45</sup>Mawh kheu nan can pui pa hoik simin ti khaing daux ceu pui Isarela khankix mai nyiexma keeing kix, jah ka pa koe ju tixnga num haok plak piang, pa pon hu daux naing khankix khawmuik, ka daux ceu pui Isarela khankix, <sup>46</sup>can pui pa hoik simin tix khawmuik koe liah sien loe rheng phuan yieh tix phuan kaux heue. <sup>47</sup>Viang mawh nan, ang simin ka ceucad Lewix mai doehru keeing kix heue. <sup>48</sup>Grawh grawng nawh Simiang Siyiex hoik ah nin ka Mose, <sup>49</sup>“Maix tak ang pon ti simin doehru ceucad Lewix nongnong mai ang pon ti koh carang pui kix khaing daux sinax ceu pui Isarela khankix heue. <sup>50</sup>Viang mawh nan, maix tak tawx beeh glawm ka ceucad Lewix, son kaing jhaw daux nyiex gox buan man pa koe teug kham mhairug sijax mukheu mai ka piang kraung khrai pa shiao ka daux nyiex gox buan man khawmuik mai canceu pa mawh cie daux nyiex gox buan man khawmuik heue. Kix tak mawh pa klawm nyiex gox buan man

mai kraung khrai nawh khankix hu khawmuik, kix tak yuh kaing nyiex gox buan man mai peung hawt rawb vungviang praok nyiex gox buan man heue. <sup>51</sup>Yam gah nyiex gox buan man hu ka plak sivoie ngai, ceucad Lewix khankix tak teei nawh lih. Yam jung kix ti sum ka nyiex gox buan man, ceucad Lewix khankix tak jung ti sum kah heue. Pui tang kaux pa hoek dex tan tak mawh pa yaox ti yum heue. <sup>52</sup>Ceu pui Isarela khankix tak sum nyiex bang cao tix mai nyiex bang cao nawh kukaux mai glawk cie cao nawh kukaux, awm man jhi pa koe krunaing kix heue. <sup>53</sup>Viang mawh nan, ceucad Lewix tak bang ti ot hawt rawb vung viang nyiex gox buan man teug kham mhairug, son ang krax song rhawm lih ti koe ka piang cub pui hun ceu pui Isarela khankix mai ceucad Lewix tak mawh pui pa priexrien ka nyiex gox buan man teug kham mhairug heue.” <sup>54</sup>Mawh kheu nan ceu pui Isarela khankix, hawt ti yuh awm gumlox pa hoik tawm Simiang Siyiex ka Mose khankix khawmuik heue.

### ***Ru Cao Kaing Krunaing***

**2** Simiang Siyiex ah nin ka Mose mai Arun, <sup>2</sup>“Pui kukaux khaing daux ceu pui Isarela khankix tak peung ti ot tau mai bang ti ot glawk cie kix, hawt praok man jhi nyiexma keeing nawh khankix, kix tak bang ti ot hawt rawb vung viang see nyiex gox buan man bang kum pui hun khawm pon daog heue. <sup>3</sup>Ka plak toh, ka dee hoik ciak kix, mawh glawk cie cub krunaing ceucad Yudax tau mai man jhi cie nawh mai kix tak bang ti ot kaing naing ceucad Yudax heue. <sup>4</sup>Krunaing nawh pa hoik simin ti deuh, koe aliah mheen pon rheng liah yieh kaux heue. <sup>5</sup>Can pui pa bang ti ot dia hawt khaix nawh tak mawh doehru Isakha pa mawh Natanelax kawn simex Zu-ax, tak mawh cao kaing naing ceucad Isakha heue. <sup>6</sup>Krunaing nawh pa hoik simin ti deuh, koe phuan mheen pon rheng pon yieh kaux heue. <sup>7</sup>Khaix an pa bang ti ot tak mawh doehru Zebulun pa mawh Eliabax kawn simex Helon, tak mawh cao kaing naing ceucad Zebulun heue. <sup>8</sup>Krunaing

nawh pa hoik simin ti deuh, koe phuan mheen aliah rheng pon yieh kaux heue. <sup>9</sup>Can pui pa hoik simin tix khawmuik, awm pa koe riang rao krunaing kix tau mai Yudax, koe tix sien daix mheen liah rheng pon yieh kaux heue. Inkix tak mawh cub krunaing pa preeng ti hu sivoie heue. <sup>10</sup>“Ka plak jee tak mawh cub glawk riang rao krunaing pa koe tau mai man jhi Rubin, awm pa mawh dee ot son krunaing cie kix khankix mai cao kaing naing ceucad Rubin, tak mawh Elizurax pa mawh kawn simex Shedurax heue. <sup>11</sup>Krunaing nawh pa hoik simin ti deuh koe pon mheen liah rheng phuan yieh kaux heue. <sup>12</sup>Can pui pa bang ti ot hawt khaix nawh, tak mawh ru ceucad Simion mai cao kaing naing ceucad Simion tak mawh Shelumelax pa mawh kawn simex Zurishadie heue. <sup>13</sup>Krunaing nawh pa hoik simin ti deuh, koe phuan mheen dim rheng loe yieh kaux heue. <sup>14</sup>Khaix an pa bang ti ot hawt khaix nawh tak mawh doehru ceucad Gat mai cao kaing naing ceucad Gat, tak mawh Elishaphax pa mawh kawn simex Doelax heue. <sup>15</sup>Krunaing nawh pa hoik simin ti deuh, koe pon mheen phuan rheng liah yieh tix phuan kaux heue. <sup>16</sup>Can pui pa hoik simin tix khawmuik, awm pa koe riang rao krunaing kix tau mai Rubin, koe tix sien phuan mheen tix rheng pon yieh tix phuan kaux, kix tak mawh krunaing pa preeng ti hu pa ot glawk ra heue. <sup>17</sup>Khaix an, nyiex gox buan man bang kum pui hun tak gah ti lih hu tau mai nyiex gox bang ceucad Lewix mai kieh kix ot ka daux sigreung nyiex gox bang kix, awm pa peung kix tix ot, mawh kheu nan kix tak gah ti lih hu tawx mawx kaux an, khaing dee ot kix, awm pa koe glawk ot kix khankix heue. <sup>18</sup>Ka plak klip singaix, tak mawh cub glawk cie riang rao krunaing pa koe tau mai man jhi Epharim, awm dee ot son krunaing kix mai cao kaing naing ceucad Epharim tak mawh Elishama pa mawh kawn simex Amihut heue. <sup>19</sup>Krunaing nawh pa hoik simin ti deuh, koe pon mheen phuan yieh kaux. <sup>20</sup>Hawt khaix Epharim, tak mawh doehru ceucad Manashe mai cao kaing naing ceucad Manashe, tak mawh Gamalelax pa mawh kawn simex Pedazurax heue.

<sup>21</sup> Krunaing nawh pa hoik simin ti deuh, koe loe mheen ra rheng ra yieh kaux heue. <sup>22</sup> Khaix an pa bang ti ot khaix nawh tak mawh doehru ceucad Benyamin mai cao kaing naing ceucad Benyamin tak mawh Abidan pa mawh kawn simex Gidawnix heue. <sup>23</sup> Krunaing nawh pa hoik simin ti deuh, koe loe mheen phuan rheng pon yieh kaux heue. <sup>24</sup> Can pui pa hoik simin tix khawmuik, awm pa koe riang rao krunaing kix tau mai Epharim, koe tix sien daix rheng tix yieh kaux, kix tak mawh cub krunaing pa preeng ti hu pa ot glawk loe heue. <sup>25</sup> Ka plak blaong, tak mawh cub glawk cie riang rao krunaing pa koe tau mai man jhi Dan, awm pa koe krunaing kix mai cao kaing naing ceucad Dan tak mawh Aheza pa mawh kawn simex Amishadie heue. <sup>26</sup> Krunaing nawh pa hoik simin ti deuh, koe liah mheen ra rheng aliah yieh kaux heue. <sup>27</sup> Can pui pa bang ti ot hawt nawh tak mawh doehru ceucad Asha mai cao kaing naing ceucad Asha tak mawh Pagelax pa mawh kawn simex Awkharan heue. <sup>28</sup> Krunaing nawh pa hoik simin ti deuh khawmuik, koe pon mheen tix rheng phuan yieh kaux heue. <sup>29</sup> Khaix an cub pa bang ti ot hawt khaix nawh, tak mawh doehru ceucad Napthalix mai cao kaing naing ceucad Napthalix tak mawh Ahirax pa mawh kawn simex Enan heue. <sup>30</sup> Krunaing nawh pa hoik simin ti deuh khawmuik, koe phuan mheen loe rheng pon yieh kaux heue. <sup>31</sup> Can pui pa hoik simin tix khawmuik, awm pa koe riang rao krunaing kix tau mai Dan, koe tix sien phuan mheen aliah rheng liah yieh kaux, kix tak mawh cub krunaing pa preeng tix lih hu khaing nyiex bang mai ghoik ti ot plak khaix heue. <sup>32</sup> Inkix mawh carang pui pa hoik simin ti khaing ceu pui Isarelax khankix, khaing doeh nyiexma keeing kix khawmuik heue. Can pui pa hoik simin tix, awm pa koe riang rao krunaing kix, koe liah sien loe rheng phuan yieh tix phuan kaux heue. <sup>33</sup> Viang mawh nan ceucad Lewix, mawh pa ang simin daux sinax ceu pui Isarelax, awm lox pa hoik tawm Simiang Siyiex ka Mose heue. <sup>34</sup> Mawh kheu nan, ceu pui

3:2 Si 26:60. 3:4 Krub 10:1-2, Si 26:61.

Isarelax khankix, hawt ti yuh awm lox pa hoik tawm Simiang Siyiex ka Mose khawmuik, kix bang ti ot awm pa koe glawk cie kix mai kix preeng ti lih hu cub nyiexma mawx, cub nyiexma an, awm pa koe doehru nyiexma keeing kix khankix heue.

### **3 Kawn Simex Arun Khankix**

<sup>1</sup> Inkix mawh daohdoe doehru Arun mai Mose khankix yam sikah Simiang Siyiex mai Mose ka piang gawng Sina heue. <sup>2</sup> Inkix mawh ceukaux kawn simex Arun, Nadap mawh kawn Ai mai Abihux, Eliaza mai Itama heue. <sup>3</sup> Inkix mawh ceukaux kawn simex Arun pa hoik groi kix rawm bee ti tawx mawh cao giex kaing li mai pui pa hoik appong kix yuh kaing jhaw Siyiex, awm cao giex kaing li heue. <sup>4</sup> Nadap mai Abihux yum sivoe Simiang Siyiex, yam tan kix ngu pa ang singax ka sivoe Simiang Siyiex ka daux tiag gawng Sina mai kiex ang koe kawn praix, mawh kheu nan Eliaza mai Itama yuh kaing jhaw cao giex kaing li, ka greem sivoe keeing kix Arun heue.

### **Ceucad Lewix**

<sup>5</sup> Simiang Siyiex ah nin ka Mose, <sup>6</sup> "Teei doehru pui Lewix khankix hoek dee dex mai deuh kix ka plak sivoe cao giex kaing li Arun, sonsang pon kix ti yuh kaing jhaw sonnawh heue. <sup>7</sup> Kix tak yuh kaing tang nawh mai tang pui hun khawmuik sivoe nyiex gox buan man bang kum pui hun sonsang yuh kix kaing jhaw son nyiex gox buan man heue. <sup>8</sup> Kix takyaox ti khrierien ka kraung khrai pa koe ka daux nyiex gox buan man bang kum pui hun mai tang kawn praix Isarelax sonsang yuh kix kaing jhaw nyiex gox buan man heue. <sup>9</sup> Maix tak tawx pui Lewix khankix ka Arun mai ka kawn simex nawh khankix, kix khawmuik mawh pa hoik tawx maix ka nawh khaing daux sinax ceu pui Isarelax heue. <sup>10</sup> "Mawh kheu nan, maix tak tawx beeh glawm ka Arun mai kawn simex nawh khankix mai kix tak priexrien ka kaing cao giex kaing li, pui tang kaux pa hoek dex tan tak yaox ti yum heue." <sup>11</sup> Khaix an Simiang Siyiex sikah ka Mose ah nin, <sup>12</sup> "Jhak heue, tokaux Aux hoik laug ti teei ceucad Lewix khaing sinax ceu pui

Isarelax khankix son tang kawn Ai pa liang ti keh kukaux, sinax ceu pui Isarelax khankix, mawh kheu nan, ceucad Lewix khankix, tak mawh pui cie Aux.<sup>13</sup> Mawh kheu kawn Ai khawmuik mawh cie Aux, ka daux singaix pa hoik pah Aux ka kawn Ai khankix khawmuik, ka daux meung Ejiptux, Aux hoik kieh kawn Ai pa koe daux ceu pui Isarelax khawmuik singax singeh, son tokaux Cao Aux, khawm pui mai khawm tobrie khankix, kix tak mawh cie Aux, Aux mawh Simiang Siyiexheue.

### ***Tei Carang Pui Lewix***

<sup>14</sup>Simiang Siyiexsikah mai Mose ka daux tiag gawng Sina ah nin, <sup>15</sup>“Simin ceucad Lewix khankix, awm koe nyiexma keeing kix mai kawn nyiexma kix maix tak simin simex kukaux, jah ka pa koe ju tix khix haok plak piang heue. <sup>16</sup>Mawh kheu nan, Mose simin kix awm gumlox pa hoik tawm Simiang Siyiex ka nawh heue. <sup>17</sup>Inkix mawh ceukaux kawn simex Lewix, pa mawh Gerashon, Kawhat mai Merarix. <sup>18</sup>Ceukaux kawn simex Gerashon, mawh Libanix mai Shimi awm pa koe kawn nyiexma kix. <sup>19</sup>Kawn simex Kawhat, mawh Amaran, Izaha, Hebron mai Awzazilax, awm pa koe kawn nyiexma kix. <sup>20</sup>Kawn simex Merarix mawh Mahalix mai Mushi, awm pa koe kawn nyiexma kix, inkix mawh kawn nyiexma ceucad Lewix khankix, awm pa koe doeh nyiexma keeing kix heue. <sup>21</sup>Pa lih ti koe khaing Gerashon mawh doeh nyiexma ceucad Libanix mai doeh nyiexma ceucad Shimix, inkix mawh doeh nyiexma ceucad Gerashon heue. <sup>22</sup>Ceucad an kix pa hoik simin ti deuh, awm pa koe kawn simex khankix, jah ka pa koe ju tix khix, haok plak piang can pui pa hoik simin ti deuh, koe aliah rheng phuan yieh kaux heue. <sup>23</sup>Doeh nyiexma ceucad Gerashon khankix, tak mawh pa sang bang ti ot plak khaix nyiex gox buan man ka plak klip singaix heue. <sup>24</sup>Cao kaing pa kuang ka piang nyiexma keeing ceucad Gerashon khankix, mawh Eliasap kawn simex Lelax heue. <sup>25</sup>Beeh

glawm kawn praix ceucad Gerashon ka daux nyiex gox buan man, mawh man vie vungviang nyiex gox buan man mai braux man tie son diang siviex nyiex gox buan man bang kum pui hun khankix <sup>26</sup>mai man tie son diang siviex guang nyiex gox buan man mai can pa feuk hawt vungviang nyiex gox buan man mai dee koe khu dee tan, khawm maox pa shiao khankix mai kaing jhaw pa dex mai kix khawmuik heue. <sup>27</sup>Pa lih ti koe khaing Kawhat mawh doeh nyiexma ceucad Amaram, doeh nyiexma ceucad Izaha, doeh nyiexma ceucad Hebron mai doeh nyiexma ceucad Awzalax khankix, inkix mawh doeh nyiexma ceucad Kawhat heue. <sup>28</sup>Awm pa hoik simin kix ti yaox simex khawmuik jah ka pa koe ju tix khix haok plak piang, koe daix rheng liah yieh kaux, kix mawh cub pui pa priexrien ka dee pa singax singeh heue. <sup>29</sup>Doeh nyiexma Kawhat tak mawh pa bang ti ot plak jeen yiex gox buan man heue. <sup>30</sup>Mai cao kaing pa kuang ka piang doeh nyiexma keeing ceucad Kawhat mawh Elazaphan pa mawh kawn simex Awzelax heue. <sup>31</sup>Beeh glawm kix mawh pa viex teug buan pa kham mhairug, pheon, pang jawk ten khri mai khu dee tan, khawm kraung pa shiao dee pa singax singeh, man tie plak daux mai canceu pa shiao khawmuik heue. <sup>32</sup>Eliaza kawn simex cao giex kaing li Arun tak mawh cao kaing ting ka piang cao kaing ceucad Lewix mai kiangiien ka pa priexrien dee singax singeh khankix heue. <sup>33</sup>Pa lih ti koe khaing Merarix mawh doeh nyiexma ceucad Mahalix mai doeh nyiexma ceucad Mushix, inkix mawh doeh nyiexma Merarix khankix heue. <sup>34</sup>Ceu pui pa hoik simin tix yaox ka simex khawmuik, jah ka pa koe ju tix khix haok plak piang, koe liah rheng ra yieh kaux heue. <sup>35</sup>Cao kaing pa kuang ka piang nyiexma keeing ceucad Merarix mawh Zurelax pa mawh kawn simex Abihelax, in khankix mawh pui pa bang ti ot ka praok plak blaong nyiex gox buan man heue. <sup>36</sup>Beeh glawm son kawn prai Merarix khankix mawh pa viex ceu in khankix, pa mawh phia, lat, rong, daux jhup jaong kraung khrai pa shiao mai kaing jhaw pa dex mai ceu an khawmuik,

3:4 Krub 10:1-2, Si 26:61. 3:12 Lih 32:26-29. 3:13 Lih 13:2.



<sup>37</sup> rong hawt rawb vungviang guang nyiex gox buan man tau mai daux jhup jaong, lat mai maox khankix heue. <sup>38</sup>Can kix pa bang ti ot sivoe nyiex gox buan man plak toh mai plak sivoe nyiex gox buan man bang kum pui hun mawh Mose, Arun mai kawn simex nawh khankix, kix mawh pa priex ka dee pa singax singeh, sonsang pon yuh ti tawx kuceu son ceu pui Isarelaux khankix, pui tang kaux pa hoek dex tan tak yaox ti yum heue. <sup>39</sup>Can pui pa hoik simin khaing ceucad Lewix khawmuik pa hoik simin Mose mai Arun awm gumlox pa hoik tawm Simiang Siyiex, awm pa koe doeh nyiexma kix, pa mawh kawn simex, jah ka pa koe ju tix khix haok plak piang koe ra mheen ra rheng kaux heue.

#### ***Pui Lewix Tang Kawn Ai***

<sup>40</sup> Simiang Siyiex ah nin ka Mose, "Simin kawn Ai ceu pui Isarelaux khawmuik jah ka pa koe ju tix khix haok plak piang mai teei carang kix khawmuik heue. <sup>41</sup>Maix tak teei ceucad Lewix mawh son Aux, Aux mawh Simiang Siyiex mai teei kix son tang kawn Ai khaing daux sinax ceu pui Isarelaux khawmuik mai tobrie pa eei ceucad Lewix khankix, tak mawh son tang kawn pa liang ti keh daux sinax tobrie ceu pui Isarelaux khawmuik heue. <sup>42</sup>Mawh kheu nan Mose simin ka carang kawn Ai pa keh daux sinax ceu pui Isarelaux khankix, awm gumlox pa hoik tawm Simiang Siyiex ka nawh heue. <sup>43</sup>Can kawn simex pa mawh kawn Ai pa hoik simin ka ceukaux khawmuik, jah ka pa koe ju tix khix haok plak piang, can pa hoik simin khawmuik koe ra mheen ra rheng ra yieh atixgliah loe kaux heue. <sup>44</sup>Khaix an Simiang Siyiex sikah ka Mose ah nin, <sup>45</sup>"Teei ceucad Lewix khankix, son tang kawn Ai, khaing daux sinax ceu pui Isarelaux mai teei tobrie cie ceucad Lewix khankix, son tang tobrie pa eei ceu pui Isarelaux khankix, ceucad Lewix tak mawh cie Aux, Aux mawh Simiang Siyiex heue. <sup>46</sup>Sonsang deeh taoh maix ka kawn Ai ceu pui Isarelaux khankix, ra yieh atixgliah loe kaux, pa nielheu khaing carang ceucad Lewix khankix, <sup>47</sup>maix tak teei mau phuan shekhe, ka kix kukaux, maix tak teei an khankix ka mau shekhe pa priex

kix singax, pa mawh mau tix shekhe sidu tixnga gerax heue. <sup>48</sup>Maix tak tawx mau pa tawx kix khaing ngawh pa deeh taoh kix pui pa lheu an ka Arun mai kawn simex nawh khankix. <sup>49</sup>Mawh kheu nan Mose teei mau pa deeh taoh khaing pui an pa lheu khaing pui pa hoik deeh taoh ceucad Lewix kah, <sup>50</sup>khaing kawn Ai ceu pui Isarelaux khankix, nawh teei mau tix rheng loe yieh tixgliah phuan shekhe, awm pa koe ngawh jum mau shekhe pa hoik priex nawh singax heue. <sup>51</sup>Mose tawx mau pa deeh taoh kix ka Arun mai kawn simex nawh khankix, awm lox krai Simiang Siyiex mai gumlox pa hoik tawm Simiang Siyiex heue.

#### **4 *Beeh Glawm Kawn Simex Kawhat***

Simiang Siyiex ah nin ka Mose mai Arun, <sup>2</sup>"Teei carang kawn simex Kawhat khankix, khaing daux sinax ceucad Lewix, awm pa koe nyiexma kix mai nyiexma keeing kix, <sup>3</sup>jah ka pa koe ju tixngoe num haok plak piang, tom hoek ka pa dex koe ju tix phuan num, pa sang laig ti yuh kaing jhaw ka daux nyiex gox buan man bang kum pui hun. <sup>4</sup>In mawh kaing jhaw kawn simex Kawhat khankix, ka daux nyiex gox buan man bang kum pui hun, pa dexdawd mai ceu pa kied singax singeh heue. <sup>5</sup>Yam khrierien kix ti lih hu khaing dee bang peung tix, Arun mai kawn simex nawh khankix tak hoek mai kix tak teei man tie plak daux lih mai tawb ti deuh teug buan pa kham mhairug ka an heue. <sup>6</sup>Khaix an, kix tak lhop hak phix tiex ka piang an tix plah mai baox lhop man klai raoma tix plah ka piang mai kix tak chup ti deuh khaox glawm nawh heue. <sup>7</sup>Ka piang pheem tan blah, kix tak tawm ti deuh man pa klai raoma tix pheem mai deuh pan, cawn, tawg mai klong, son pa sang see tix khankix ka piang mai blah pa tan, tak mawh pa koe ka piang an heue. <sup>8</sup>Kix tak tawb man pa raoh rawt tix pheem ka piang ankix mai baox deeh tawb hak phix tiex tix plah ka piang an mai kix tak chup ti deuh khaox glawm nawh heue. <sup>9</sup>Kix tak teei man pa klai raoma tix pheem mai tawb ka piang pang jawk ten khri mai kawkgu, sigiiep ngu, tawg nyia ngu, kawg bee mai ceu pa sang shiao kix son an. <sup>10</sup>Khaix an, kix tak sau

kraung khrai pa shiao khankix ka plak daux mai tawb ka hak phix tiex tix plah mai deuh ka piang khaox glawm. <sup>11</sup> Ka piang khu khri dee tan, kix tak tawb man pa klai raoma tix pheem mai kheem ka hak phix tiex tix plah mai chup ti deuh khaox glawm ka heue. <sup>12</sup> Khaix an, kix tak teei kraung khrai pa shiao tix khawmuik son kaing jhaw pa sang yuh kix ka dahdee pa singax mai sau ka plak daux man klai raoma tix pheem mai kix deeh kheem an khankix ka hak phix tiex tix plah mai sau an ka piang khaox glawm. <sup>13</sup> Kix tak teei ti tik nyaox khaing ka piang khu dee tan mai tawm man lung plix tix pheem ka piang. <sup>14</sup> Kix tak sau ti deuh kraung khrai pa sang shiao kix ka daux kaing jhaw pa yuh ti tan khawmuik, pa mawh pan ngu, khaox sigawng, sipeed vieh plah, pan khoek mai can kraung pa shiao kix son khu dee tan. Mai kix tak lhop ti deuh hak phix tiex tix plah ka piang kraung an mai chup ti deuh khaox glawm ka heue. <sup>15</sup> Yam hoik tawb Arun mai kawn simex nawh khankix ka dee pa singax singeh mai can kraung khrai pa shiao kix son dee pa singax singeh khawmuik, yam deeh lih hu kix khaing nyiex bang tix, khaix an kawn simex Kawhat khankix tak hoek ti klawm ceu an khankix hu heue. Viang mawh nan, kix tak ang pon ti hu krox hu teeh ka ceu pa singax an tix ceu kawx, son ang kix yaox ti hoek krax yum. Inkix mawh canceu pa koe ka daux nyiex gox buan man bang kum pui hun pa sang klawm kawn simex Kawhat hu heue. <sup>16</sup> Beeh glawm pa hoik ap ka Eliaza kawn simex cao giex kaing li Arun, mawh bee tok mai nyaung bhawng, krax tan ceu pa ih son ku ngaix, bee groi mai can kraung khrai ka daux nyiex gox buan man khawmuik mai can pa koe daux nawh khawmuik tau mai dee pa singax mai kraung khrai pa shiao kix khawmuik. <sup>17</sup> Simiang Siyiex ah nin ka Mose mai Arun, <sup>18</sup> Paw tatt ti tik doeh nyiexma ceucad Kawhat khankix khaing daux sinax ceucad Lewix, <sup>19</sup> viang mawh nan, yuh ceu inkix pa dex mai kix, sonsang im ju kix mai son ang kix yaox ti yum kah, yam hoek kix dex ceu pa kied singax singeh. Arun mai kawn simex nawh

khankix tak hu laig ka plak daux sivoe mai tawx beeh glawm ka kix kaux mawx kaux an son kaing jhaw mai kaing pa sang yuh kix. <sup>20</sup> Viang mawh nan, kix tak ang pon ti laig ka plak daux, sonsang jhak simi ka ceu pa singax singeh, phan ang mawh nan kix tak yum ka heue.”

### ***Beeh Glawm Kawn Simex Gerashon***

<sup>21</sup> Simiang Siyiex ah nin ka Mose, <sup>22</sup> Baox teei carang kawn simex Gerashon khankix, awm pa koe doeh nyiexma keeing kix mai pa koe doeh nyiexma kix. <sup>23</sup> Jah ka pa koe ju tixngoe num haok plak piang tom hoek ka pa koe ju tix phuan num, maix tak simin ka pui pa laig ti yuh kaing jhaw mai pa sang pon yuh kaing daux nyiex gox buan man bang kum pui hun. <sup>24</sup> In mawh kaing jhaw cie doeh nyiexma ceucad Gerashon mai pa sang teei kix beeh glawm khankix. <sup>25</sup> Kix tak klawm man tie nyiex gox buan man mai man tawb ka piang nyiex gox buan man bang kum pui hun mai hak phix tiex pa kheem ka piang an, khawm man tie siviex nyiex gox buan man bang kum, <sup>26</sup> man tie siviex laig daux biang, man feuk son hawt rawb vungviang biang nyiex gox buan man mai khu dee tan mai maox nawh khankix, kraung pa shiao son kaing jhaw khawmuik mai canceu pa hoik yuh kix ti deuh khawmuik, kix tak yuh kaing jhaw inkix. <sup>27</sup> Arun mai kawn simex nawh khankix tak ap kaing jhaw ka kawn simex Gerashon, khawm kaing pa sang yuh kix mai kaing jhaw pa koe beeh glawm kix ti yuh khawmuik mai maix tak goih kaing pa sang yuh khawmuik awm pa koe beeh glawm kix. <sup>28</sup> Inkix mawh kaing jhaw cie doeh nyiexma kawn simex Gerashon khankix ka daux nyiex gox buan man bang kum, beeh glawm kix tak koe greem tawm taix Itama pa mawh kawn simex Arun cao giex kaing li heue.

### ***Beeh Glawm Kawn Simex Merarix***

<sup>29</sup> Son kawn simex Merarix khankix, maix tak simin awm koe doeh nyiexma kix mai doeh nyiexma keeing kix. <sup>30</sup> Jah ka pa koe ju tixngoe num haok plak piang tom hoek ka pa koe ju tixphuan num, maix tak simin pa pon laig daux kaing jhaw kukaux, sonsang yuh kix kaing jhaw daux nyiex gox buan man

bang kum. <sup>31</sup> Kaing pa caw kix ti teei beeh glawm, son nyiex gox buan man bang kum, mawh pa tak klawm ka khaox phia nyiex gox buan man, lat, rong mai daux jhup jaong khankix, <sup>32</sup> rong hawt rawb vungviang biang mai daux jhup jaong khankix, lat mai maox, khawm kraung pa shiao kix tau mai an khawmuik mai kaing jhaw pa caw kix ti yuh, maix tak tawx beeh glawm awm pa koe ceukaux kix. <sup>33</sup> In mawh kaing jhaw cie doeh nyiexma kawn simex Merarix khankix, son nyiex gox buan man bang kum, greem tawm taix Itama kawn simex Arun cao giex kaing li heue.”

### ***Grawng Ceucad Lewix***

<sup>34</sup>Mose mai Arun khawm cao kaing pui hun hoik simin kawn simex ceucad Kawhat khankix, awm pa koe doeh nyiexma kix mai doeh nyiexma keeing kix, <sup>35</sup> jah ka pa koe ju tixngoe num haok plak piang tom hoek ka pa koe ju tixphuan num, pa pon laig daux kaing jhaw kukaux, son kaing pa koe ka daux nyiex gox buan man bang kum khankix, <sup>36</sup> can pui pa hoik simin ti deuh, awm pa koe doeh nyiexma kix, koe ra rheng aliah yieh tixphuan kaux. <sup>37</sup> Inkix mawh doeh nyiexma ceucad Kawhat, pa pon ti yuh kaing ka daux nyiex gox buan man bang kum, pa hoik simin Mose mai Arun, awm lox pa hoik tawm Simiang Siyiex ka Mose heue. <sup>38</sup> Can pui pa hoik simin tix khaing kawn simex Gerashon, awm pa koe doeh nyiexma kix mai doeh nyiexma keeing kix, <sup>39</sup> jah ka pa koe ju tixngoe num haok plak piang tom hoek ka pa koe ju tixphuan num, pa pon ti laig daux kaing jhaw kukaux, son kaing pa koe ka daux nyiex gox buan man bang kum, <sup>40</sup> can pui pa hoik simin ti deuh, awm pa koe doeh nyiexma kix, khawm doeh nyiexma keeing kix, koe ra rheng liah yieh tixngoe kaux. <sup>41</sup> Inkix mawh pui pa hoik simin kix khaing doeh nyiexma kawn simex Gerashon, pa sang pon ti yuh kaing jhaw ka daux nyiex gox buan man bang kum pui hun khawmuik, pa hoik simin Mose mai Arun awm lox pa hoik tawm Simiang Siyiex heue. <sup>42</sup> Inkix mawh doeh nyiexma kawn simex Merarix, pa hoik simin tix khaing nyiexma kix mai doeh nyiexma

keeing kix khankix, <sup>43</sup> jah ka pa koe ju tixngoe num haok plak piang tom hoek ka pa koe ju tixphuan num kukaux pa pon ti yuh kaing jhaw, son kaing pa koe ka daux nyiex gox buan man bang kum pui hun khankix, <sup>44</sup> can pui pa hoik simin ti deuh awm pa koe doeh nyiexma kix khankix, koe loe rheng ra yieh kaux heue. <sup>45</sup> Inkix mawh pui pa hoik simin tix khaing doeh nyiexma kawn simex Merarix, pa hoik simin Mose mai Arun, awm lox tawm Simiang Siyiex ka Mose heue. <sup>46</sup> Can pui pa hoik simin tix khaing ceucad Lewix khawmuik, pa hoik simin Mose mai Arun, khawm cao kaing ceu pui Isarelaux khankix, awm pa koe doeh nyiexma kix mai doeh nyiexma keeing kix, <sup>47</sup> jah ka pa koe ju tixngoe num haok plak piang tom hoek ka pa koe ju tixphuan num kukaux, pa sang hoek ti yuh kaing jhaw mai pa kham ti yuh kaing ceu an khankix ka daux nyiex gox buan man bang kum pui hun. <sup>48</sup> Can pui pa hoik simin ti deuh, koe daix rheng phuan yieh tix daix kaux. <sup>49</sup> Awm lox pingnyap pa hoik tawx Simiang Siyiex, kix mawh pa hoik simin Mose kaux mawx kaux an awm pa koe kaing jhaw kix mai awm kaing pa caw kix ti yuh khankix, mawh kheu nan, kix mawh pa hoik simin tokaux Mose, awm lox pa hoik tawm Simiang Siyiex heue.

### ***Pui Ang Singax Ot Nongnong***

**5** Simiang Siyiex kraik ka Mose ah nin, <sup>2</sup> Tawx lox ka ceu pui Isarelaux khankix, sonsang kieh pui saux sipawg mai pui pa koe jhawm saux yia kukaux mai can pui pa seeing brai kheu teeh tokaux pa yum khankix deuh ka plak praix dee bang kix ti ot. <sup>3</sup> Maix tak deuh simex mai sibun khankix ot ka plak praix bang, son ang kix kieh bang seeing brai ka dahdee ot Aux. <sup>4</sup> Ceu pui Isarelaux yuh an khankix mai deuh kix ka plak praix nyiex bang kix, awm pa hoik tawm Simiang Siyiex ka Mose, mawh kheu nan ceu pui Isarelaux khankix, hawt ti yuh awm an heue.

### ***Khioxhaw Pa Deeh Plud***

<sup>5</sup> Simiang Siyiex ah nin ka Mose, <sup>6</sup> Kraik ka ceu pui Isarelaux khankix, yam lud simex angah, bun angah, awm pa yie lud kawn pui mai nawh lud ka Simiang Siyiex. <sup>7</sup> Nawh tak kraik dohka



phimap pa hoik yuh tix mai nawh caw ti khioxkhaw heue. Mai nawh deeh plud ka pui pa lud nawh kah mai baox naok ti tawx phuan son tix son ka piang an, <sup>8</sup> viang mawh nan, phan pui pa lud nawh kah hoik yum mai ang lai koe paox nyiex sonsang rieb ka pa pluat son pa lud nawh mai nawh tak hu ka cao giex kaing li Simiang Siyiex mai tan kawn yung mhaing tix mu sonsang pluatploi phimap pa yuh nawh. <sup>9</sup> Krax tan kuceu pa singax ceu pui Isare lax khawmuik, pa viex kix hoek ka cao giex kaing li tak mawh cie kix. <sup>10</sup> Canceu pa singax pa tan pui kukaux ka cao giex kaing li tak mawx cie cao giex kaing li khankix heue.

### ***Been Pa Dex Mex Moeng***

<sup>11</sup>Simiang Siyiex krai ah nin ka Mose, <sup>12</sup>“Krai ka ceu pui Isare lax khankix ah nin, phan moeng pui tix kaux kaux sawg ti hu vungviang mai yuh pa ang kaux sijax ka mex tix. <sup>13</sup>Phan simex tix kaux kaux it tau mai nawh, phan nawh mox ang kieh mex ti tawng, nawh laux pakngai kheu grawng ang tokaux tix singax mai pa ang koe mhairug, viang pui ang yaox dee lud nawh kawx. <sup>14</sup> Phan laux pakngai angah, ang laux angah, phan nawh ang yumrhawm ka moeng tix, <sup>15</sup>nawh tak viex moeng tix hoek ka cao giex kaing li mai nawh tak viex krax tan phawng nghoxkoi im, tix epha kao son tix son ka pa tan son nawh. Nawh tak ang pon ti see bee kapiangan mai ang pon ti see bee Lawpan pa sioe bhawng ka piang an, kheu mawh an krax tan pa ang yumrhawm ka moeng tix mai sonsang dohkeud ka phimap pa yuh tix. <sup>16</sup>“Cao giex kaing li tak viex nawh hoek dee dex mai deuh nawh ka plak sioe Simiang Siyiex. <sup>17</sup>Cao giex kaing li tak teei rawm pa singax mai sau dauw aw tiex mai teei phawng tiex pa koe ka piang tiex dauw nyiex gox buan man mai sau ankix ka dauw rawm. <sup>18</sup>Cao giex kaing li tak deuh bun an ka plak sioe ngai Simiang Siyiex mai plak ti tik pa kheem piang kaing bun mai sau krax tan son pa dohkeud ka dauw taix nawh, pa mawh krax tan ceu pa ih, pa viex krax tan pa ang yumrhawm ka moeng tix mai cao giex

kaing li tak giex ti deuh kaww rawm song pa viex krax pa jhaxlawg ka dauw tawm taix tix. <sup>19</sup>Cao giex kaing li tak kieh bun an tiextu ah nin, phan simex tang kaux ang it tau mai maix mai phan maix ang lud mai simex tang kaux mai ang seeing brai, kieh maix lawt luan khaing rawm song in pa viex krax pa jhaxlawg. <sup>20</sup>Viang mawh nan, phan maix hoik lud mai simex tang kaux ka piang mex tix mai kieh tokaux tix seeing brai mai phan simex tang kaux pa ang mawh mex maix hoik it tau mai maix, <sup>21</sup>cao giex kaing li tak kieh bun an tiextu tix ka gumlox pa jhaxlawg mai nawh tak ah nin ka bun an. Simiang Siyiex tak sang tawx krax pa jhaxlawg mai krax pa tiextu ka piang maix, khaing dauw sinax ceu pui maix, Simiang Siyiex tak kieh ba maix fit mai kieh vaig maix uah. <sup>22</sup>Rawm pa hoik jhaxlawg, tak sang laig dauw vaig maix mai kieh vaig maix uah mai kieh ba maix fit hu mai bun an tak sang ah Amen, Amen. <sup>23</sup>“Cao giex kaing li tak tiem ti deuh gumlox pa tiextu ka dauw phuk lai mai nawh tuktaig ti sau an ka dauw rawm pa song. <sup>24</sup>Nawh tak tawx bun an nyaux rawm pa song pa viex krax pa jhaxlawg an mai rawm song pa viex krax pa jhaxlawg, tak laig dauw nawh, sonsang lih ti mawh pa song. <sup>25</sup>Cao giex kaing li tak teei krax tan pa ang yumrhawm ka moeng tix mai yuh krax tan yangyeuh ka sioe Simiang Siyiex mai viex nawh hoek ka khu dee tan, <sup>26</sup>cao giex kaing li tak teei krax tan an ka taix tix tix jhawp son pa dohkeud mai gleeing an ka piang khu dee tan, khaix an nawh tak tawx bun nyaux rawm an heue. <sup>27</sup> Khaix hoik tawx nawh bun an nyaux rawm, ceu an lih ti mawh, phan nawh hoik yuh pa seeing ka tokaux tix mai hoik yuh pa lud piang mex tix, rawm an pa viex krax pa jhaxlawg tak laig ka dauw nawh mai lih ti mawh pa song mai vaig nawh tak uah mai ba nawh tak fit hu mai bun an tak lih ti mawh pa pon krax jhaxlawg khaing sinax ceu pui nawh khankix heue. <sup>28</sup>Viang mawh nan, phan bun ang nyang yuh pa seeing ka tokaux tix mai phan nawh mawh pa singax, khaix an nawh tak lawdluan mai nawh tak deeh koe kaux. <sup>29</sup>“In mawh gumlox beenli pa ang

yumrhawm ka moeng tix, pa lud ka simex tang kaux piang mex tix mai koe pa seeing brai, <sup>30</sup> yam ang simex koe krax yumrhawm ka piang moeng tix, khaix an nawh tak deuh ka plak sivoe ngai Simiang Siyiex mai cao giex kaing li tak prawngca nawh awm gumloxbeenli in, <sup>31</sup> simex tak lawduan khaing phimap, bun tak yaox ti kham geu ka phimap tixheue.

### **6 Gumlox Been Son Nazarix**

Simiang Siyiex kraih ah nin ka Mose, <sup>2</sup> "Kraih ah nin ka ceu pui Isarela kawn simex angah, bun angah, yam tiextu nawh tokauxti yuh sijax mukheu ka gumlox been Nazarix mai sonsang tang goih nawh tokauxti ka son Simiang Siyiex, <sup>3</sup> nawh tak tuah rawm plix siiet mai plai khien, nawh tak ang pon ti nyaux plai rawm plix siiet pa niex pa hoik yuh ka plix siiet, nawh tak ang pon ti nyaux ka rawm plix siiet ang pon ti ih ka plix siiet pa im angah, pa kroh angah. <sup>4</sup> Glang yam tang tiah nawh tokauxti, nawh tak ang pon ti ih khaing nhu plix siiet tix ceu kawx, pa mawh simie angah, glhaok angah. <sup>5</sup> "Glang yam nawh kham lox sijax mai tang tiah tokauxti, nawh tak ang pon ti khlaohauk kaing tix tom hoek singaix grumnaog, krax pa tang tiah tokauxti son Simiang Siyiex, nawh tak caw ti singaix singeh, khaix an nawh tak kieh hauk kaing tix kuah tom lang. <sup>6</sup> "Glang yam kawn tang tiah nawh tokauxti son Simiang Siyiex, nawh tak ang pon ti hu dex tokauxti yum. <sup>7</sup> Nawh tak ang pon yuh tokauxti seeing yam yum keeing nawh angah, miex nawh angah mai pux aik pux o nawh angah, mawh kheu hoik tang tiah nawh ti ot son Siyiex, koe ka piang kaing nawh. <sup>8</sup> Glang yam kawn tang tiah nawh tokauxti son Simiang Siyiex, nawh tak caw tix singaix singeh. <sup>9</sup> "Phan pui tix kaux kaux yum sijaox hawt dex nawh mai nawh kieh kaing pa appong tix singaix seeing brai kah, nawh tak khlaohauk kaing tix, ka daux singaix pa sang deeh kieh nawh tokauxti singaix ka daux singaix aliah. <sup>10</sup> Ka daux daix ngaix nawh tak viex sikaux ra mu, phan ang mawh nan kawn keukie ra mu angah, tak viex hu ka cao giex kaing li hawt diang siviex nyiex gox buan man bang kum <sup>11</sup> mai

cao giex kaing li tak tan son krax tan pa pluatploi phimap tix mu mai tang mu tan son krax tan pa gleeing mai yuh krax pa khioxkhaw son krax pa pluatploi son nawh, kheu hoik lud nawh, ka Grawng tokauxti pa yum. Nawh tak kieh kaing tix singaix tau ka daux singaix an. <sup>12</sup> Nawh tak viex kawn yung pa naog num son krax tan pa pluatploi krax lud mai appong tokauxti son Simiang Siyiex ka bawgyam pa hoik tang tiah nawh tokauxti singaix pa hoik luan khankix, tak mawh pa grai grup, mawh kheu pa hoik tang tiah nawh tokauxti hoik mawh pa seeing. <sup>13</sup> "In mawh gumlox been son Nazarix yam hoik grumnaog singaix pa tang tiah nawh tokauxti mai tak viex nawh hoek ka diang siviex nyiex gox buan man bang kum. <sup>14</sup> Nawh tak tan kawn yung mhaing pa naog num pa loig tix mu son krax tan pa gleeing ka Siyiex mai kawn yung shiang, pa naog num pa loig tix mu son krax tan pa pluatploi phimap mai pex pa loig tix mu son krax tan pa nhim, <sup>15</sup> blah pa ang sau susaix tix khrawng, blah plah phawng nghox ca im ceu pa mhawm, pa hoik klao ti tau mai bee, blah rhi khlawp pa hoik klao tau mai bee mai krax tan ceu pa ih, khawm krax tan pa nyaux khankix. <sup>16</sup> Cao giex kaing li tak viex an khankix hoek sivoe ngai Simiang Siyiex mai yuh krax tan pa pluatploi phimap mai krax tan pa gleeing, <sup>17</sup> nawh tak tan pex mhaing son krax tan pa nhim ka Simiang Siyiex tau mai blah pa ang sau susaix tix khrawng, cao giex kaing li tak tan krax tan ceu pa ih mai krax tan pa nyaux. <sup>18</sup> Pui Nazarix tak khlaohauk kaing pa hoik appong ti hawt diang siviex nyiex gox buan man bang kum mai kix teei hauk khankix khaing kaing pa appong tix mai sau ka piang ngu greem krax tan pa nhim pa tan tix. <sup>19</sup> Cao giex kaing li tak teei klip taix pex mhaing pa hoik ngaik tix tau mai blah pa ang sau susaix tix plah khaing daux khrawng mai blah rhi khlawp pa ang sau susaix tix khlawp mai deuh an ka piang taix pui Nazarix khaix hoik khlaohauk kaing pa appong tix khankix, <sup>20</sup> cao giex kaing li yangyeuh an son krax tan pa

yangyeuh sivo Simiang Siyiex, nex eek krax tan pa yangyeuh mai nex ba krax tan pa yaox mawh pa singax singeh son cao giex kaing li, khaix an pui Nazarix pon ti nyaux rawm plix siiet heue. <sup>21</sup> "In mawh beenli son pui Nazarix pa yuh sijax mukheu son pa yuh nawh krax tan pa tang tiah tix ka Simiang Siyiex, lheu khaing an, can pa pon yuh nawh khankix, mawh pa yuh nawh sijax mukheu, nawh tak caw ti hawt yuh awm beenli pa hoik tang tiah nawh ti yuh sijax mukheu pa yuh tix heue."

### ***Buanson Pa Nawb Cao Giex Kaing Li***

<sup>22</sup> Simiang Siyiex krai ah nin ka Mose, <sup>23</sup> "Krai ah nin ka Arun mai kawn simex nawh khankix, in mawh grawng pa sang nawb maix buan, ka ceu pui Isarela, maix tak ah nin ka kix, <sup>24</sup> kieh Simiang Siyiex nawb buan ka maix mai priexrien ka maix, <sup>25</sup> kieh Simiang Siyiex jhan pa riieng pakngai tix ka piang maix mai tawx buanson krax pa cauxrhawm tix ka maix, <sup>26</sup> kieh Simiang Siyiex maong ti jhak ka piang maix, mai tawx krax pa nhim ka maix. <sup>27</sup> Kix tak deuh min ceukaux Aux, ka piang ceu pui Isarela mai Aux tak nawb buanson ka kix heue."

### ***7 Grawng Krax Tan Cao Kaing***

**7** Yam hoik sidah yuh Mose nyiex gox buan man, nawh groi rawm bee ka piang nyiex gox buan man mai khrawm kraung pa shiao khankix mai baox groi rawm bee ka piang khu dee tan mai kraung pa shiao khankix tau mai kieh ceu an singax heue. <sup>2</sup> Can pui pa hoik laig carang pa mawh cao kaing ceu pui Isarela mai cao kaing doeh nyiexma keeing kix khankix yuh krax tan <sup>3</sup> mai kix viex krax tan tix hoek sivo Simiang Siyiex pa mawh linglawx pa koe braux liah lhang mai mawie mhaing kao ra mu, son cao giex kaing ra kaux linglawx koe braux tix lhang mai mawie mhaing tix kaux tix mu, kix tan ceu an ka Simiang Siyiex sivo nyiex gox buan man heue. <sup>4</sup> Khaix an Simiang Siyiex ah nin ka Mose, <sup>5</sup> "Rieb ceu in khaing kix sonsang shiao ka daux kaing jhaw nyiex gox buan man bang kum mai ap ceu an ka ceucad Lewix awm pa koe kaing jhaw pa yuh kix heue." <sup>6</sup> Mose rieb linglawx an mai

mawie khankix mai ap ka ceucad Lewix. <sup>7</sup> Nawh tawx linglawx ra lhang mai mawie pon mu ka kawn simex Gerashon awm kaing jhaw pa yuh kaux mawx kaux an <sup>8</sup> mai nawh tawx linglawx pon lhang mai mawie daix mu ka kawn simex Merarix, awm kaing jhaw pa yuh kix pa ot greem pa thong Itama pa mawh kawn simex Arun cao giex kaing li heue. <sup>9</sup> Viang mawh nan, nawh ang tawx ka kawn simex Kawhat, mawh kheu kaing jhaw kix mawh kaing jhaw pa klawm kraung pa singax. <sup>10</sup> Cao kaing khankix yuh krax tan pa appong ka khu dee tan ka daux singaix pa groi rawm bee mai cao kaing khankix yuh krax tan tix ka plak sivo khu dee tan. <sup>11</sup> Simiang Siyiex ah nin ka Mose, "Cao kaing tak yaox ti yuh krax tan tix ngaix tix kaux son krax tan pa appong ka khu dee tan heue." <sup>12</sup> Pui pa tawx krax tan singaix pa jah mawh Nashon kawn simex Aminadap khaing doehru ceucad Yudax, <sup>13</sup> pa tan nawh mawh pan mau pa koe tix yieh tixngoe shekhe coi mai pan khoeu mau atixgliah shekhe coi awm mau pa singax pa hoik sawn kix ka plak mau shekhe, an khawm ra naog ka phawng nghox ca ceu pa mhawm pa hoik klao ti mai bee son krax tan ceu pa ih <sup>14</sup> mai klong khri pa koe kao shekhe tix mu pa naog nyawng bhawng pa sang gleeing, <sup>15</sup> son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu, <sup>16</sup> son krax tan pa pluatploi phimap, kawn pex iak tix mu <sup>17</sup> mai son krax pa appong krax tan pa nhim tak mawh mawie ra mu, yung phuan mu, pex mhaing phuan mu mai kawn yung mhaing pa naog num phuan mu. In mawh krax tan Nashon kawn simex Aminadap. <sup>18</sup> Ka daux ra ngaix, kawn simex Zu-ax pa mawh cao kaing doehru Isakha yuh krax tan, <sup>19</sup> pa tan nawh mawh pan mau tix mu pa koe tix yieh tixngoe shekhe coi khawm pan khoeu mau tix mu pa koe atixgliah shekhe awm mau pasingax pa hoik sawn kix ka plak mau shekhe, an khawm ra naog ka phawng nghox ca ceu pa mhawm pa hoik klao ti mai bee son krax tan ceu pa ih, <sup>20</sup> klong khri pa koe kao shekhe tix mu mai pa naog nyawng bhawng pa sang gleeing, <sup>21</sup> son krax tan pa gleeing mawie mhaing pa awn ju tix

mu, yung mhaing tix mu mai kawn yung mhaing panaog num tix mu,<sup>22</sup>son krax tan pa pluatploi phimap kawn pex iak tix mu<sup>23</sup> mai son krax pa appong ka krax tan pa nhim, tak mawh mawie ra mu, yung phuan mu, pex mhaing phuan mu mai kawn yung mhaing pa naog num phuan mu. In mawh krax tan Natanelax kawn simex Zu-ax heue. <sup>24</sup>Ka daux loe ngaix, Eliabax kawn simex Helon, pa mawh cao kaing doehru Zebulun yuh krax tan. <sup>25</sup> Krax tan nawh mawh pan mau tix mu pakoe tix yieh tixngoe shekhe coi, khawm pan khoeok mau tix mu pa koe atixglihat shekhe coi, awm mau pa singax pa hoik sawn kix ka plak mau shekhe, an khawm ra naog phawng nghox ca ceu pa mhawm, pa hoik klao ti mai bee, son krax tan ceu pa ih,<sup>26</sup>klong khri pakoe kao shekhe tix mu pa naog nyawng bhawng pa sang gleeing, <sup>27</sup> son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu,<sup>28</sup> son krax tan pa pluatploi phimap, kawn pex iak tix mu <sup>29</sup> mai son krax pa appong ka krax tan pa nhim, tak mawh mawie ra mu, yung phuan mu, pex mhaing phuan mu mai kawn yung mhaing pa naog num phuan mu. In mawh krax tan Eliabax kawn simex Helon heue. <sup>30</sup> Ka daux pon ngaix, Elizurax kawn simex Shedurax, pa mawh cao kaing doehru Rubin yuh krax tan, <sup>31</sup>krax tan nawh mawh pan mau tix mu pakoe tix yieh tixngoe shekhe coi, khawm pan khoeok mau tix mu pa koe atixglihat shekhe coi, awm mau pa singax pa hoik sawn kix ka plak mau shekhe, an khawm ra naog ka phawng nghox ca ceu pa mhawm, pa hoik klao ti mai bee son krax tan ceu pa ih, <sup>32</sup> klong khri pa cien kao shekhe tix mu pa naog nyawng bhawng pa sang gleeing, <sup>33</sup> son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu,<sup>34</sup>son krax tan pa pluatploi phimap kawn yung iak tix mu <sup>35</sup> mai son krax pa appong krax tan pa nhim tak mawh mawie ra mu, yung phuan mu, pex mhaing phuan mu mai kawn yung mhaing pa naog num phuan mu. In mawh krax tan Elizurax kawn simex Shedurax heue. <sup>36</sup>Ka daux phuan ngaix

Shelumilax kawn simex Zurishadie, pa mawh cao kaing doehru Simion yuh krax tan, <sup>37</sup>krax tan nawh mawh pan mau tix mu, pakoe tix yieh tixngoe shekhe coi, khawm pan khoeok mau tix mu pa koe atixglihat shekhe coi, awm mau pa singax pa hoik sawn kix ka plak mau shekhe, an khawm ra naog ka phawng nghox ca ceu pa mhawm pa hoik klao ti mai bee son krax tan ceu pa ih, <sup>38</sup> klong khri pacien kao shekhe tix mu, pa naog nyawng bhawng pa sang gleeing, <sup>39</sup> son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu,<sup>40</sup>son krax tan pa pluatploi phimap, kawn pex iak tix mu <sup>41</sup> mai son krax pa appong krax tan pa nhim tak mawh mawie ra mu, yung phuan mu, pex mhaing phuan mu mai kawn yung mhaing pa naog num phuan mu. In mawh krax tan Shelumilax kawn simex Zurishadie heue. <sup>42</sup> Ka daux liah ngaix, Eliasap kawn simex Doelax, pa mawh cao kaing doehru Gat yuh krax tan, <sup>43</sup>krax tan nawh mawh pan mau tix mu pa koe tix yieh tixngoe shekhe coi, khawm pan khoeok mau tix mu pa koe atixglihat shekhe coi, awm mau pa singax pa hoik sawn kix ka plak mau shekhe, an khawm ra naog ka phawng nghox ca ceu pa mhawm pa hoik klao ti mai bee son krax tan ceu pa ih, <sup>44</sup> klong khri pa cien kao shekhe tix mu pa naog nyawng bhawng pa sang gleeing, <sup>45</sup>son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu, <sup>46</sup>son krax tan pa pluatploi phimap, kawn pex iak tix mu <sup>47</sup> mai son krax tan pa appong krax tan pa nhim tak mawh mawie ra mu, yung phuan mu, pex mhaing phuan mu mai kawn yung mhaing pa naog num phuan mu. In mawh krax tan Eliasap kawn simex Doelax heue. <sup>48</sup> Ka daux aliah ngaix, Elishama kawn simex Amihut, pa mawh cao kaing doehru Epharim yuh krax tan, <sup>49</sup>krax tan nawh mawh pan mau tix mu pa koe tix yieh tixngoe shekhe coi, khawm pan khoeok mau tix mu pa koe atixglihat shekhe coi, awm mau pa singax pa hoik sawn kix ka plak mau shekhe, an khawm ra naog ka phawng nghox ca ceu pa mhawm mai pa hoik klao ti mai bee son krax tan ceu pa ih,<sup>50</sup>klong khri pa cien kao

shekhe tix mu pa naog nyawng bhawng pa sang gleeing, <sup>51</sup> son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu, <sup>52</sup> son krax tan pa pluatploi phimap, kawn pex iak tix mu <sup>53</sup> mai son krax tan pa appong krax tan pa nhim tak mawh mawie ra mu, yung phuan mu, pex mhaing phuan mu mai kawn yung mhaing pa naog num phuan mu. In mawh krax tan Elishama kawn simex Amihut heue. <sup>54</sup> Ka daux daix ngaix, Gamalelax kawn simex Pedazurax pa mawh cao kaing doehru Manashe yuh krax tan, <sup>55</sup> krax tan nawh mawh pan mau tix mu pa koe tix yieh tixngoe shekhe coi, khawm pan khoeok mau pa koe atixgliah shekhe coi, awm mau pa singax pa hoik sawn kix ka plak mau shekhe, an khawm ra naog ka phawng nghox ca ceu pa mhawm mai pa hoik klao ti mai bee son krax tan ceu pa ih, <sup>56</sup> klong khri pa cien kao shekhe tix mu pa naog nyawng bhawng pa sang gleeing, <sup>57</sup> son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa hoik naog num tix mu, <sup>58</sup> son krax tan pa pluatploi phimap, kawn pex iak tix mu <sup>59</sup> mai son krax tan pa appong krax tan pa nhim tak mawh mawie ra mu, yung phuan mu, pex mhaing phuan mu mai kawn yung mhaing pa tak naog num phuan mu, in mawh krax tan Gamalelax kawn simex Pedazurax heue. <sup>60</sup> Ka daux dim ngaix, Abidan kawn simex Gidawnix, pa mawh cao kaing doehru Benyaminyuh krax tan, <sup>61</sup> krax tan nawh mawh pan mau tix mu pa koe tix yieh tixngoe shekhe coi, khawm pan khoeok mau pa koe atixgliah shekhe coi, awm mau pa singax pa hoik sawn kix ka plak mau shekhe, an khawm ra naog ka phawng nghox ca ceu pa mhawm mai pa hoik klao ti mai bee, son krax tan ceu pa ih, <sup>62</sup> klong khri pa cien kao shekhe tix mu pa naog nyawng bhawng pa sang gleeing, <sup>63</sup> son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu, <sup>64</sup> son krax tan pa pluatploi phimap, kawn pex iak tix mu <sup>65</sup> mai son krax tan pa appong krax tan panhim, tak mawh mawie ra mu, yung phuan mu, pex mhaing phuan mu mai kawn

yung mhaing pa naog num phuan mu, in mawh krax tan Abidan kawn simex Gidawnix heue. <sup>66</sup> Ka daux kao ngaix Aheza kawn simex Amishadie, pa mawh cao kaing doehru Danyuh krax tan, <sup>67</sup> krax tan nawh mawh pan mau tix mu pa koe tix yieh tixngoe shekhe coi, khawm pan khoeok mau pa koe atixgliah shekhe coi, awm mau pa singax pa hoik sawn kix plak mau shekhe, an khawm ra naog ka phawng nghox ca ceu pa mhawm pa hoik kluklao ti mai bee son krax tan ceu pa ih, <sup>68</sup> klong khri pa cien kao shekhe tix mu pa naog nyawng bhawng pa sang gleeing, <sup>69</sup> son krax tan pa gleeing, mawie mhaing pa awn ju tix mu, yung mhaing tix mu, kawn yung mhaing pa naog num tix mu, <sup>70</sup> son krax tan pa pluatploi phimap, kawn pex iak tix mu <sup>71</sup> mai son krax tan pa appong krax tan pa nhim tak mawh mawie ra mu, yung phuan mu, pex mhaing phuan mu mai kawn yung mhaing pa naog num phuan mu, in mawh krax tan Aheza kawn simex Amishadie heue. <sup>72</sup> Ka daux kao tix singaix, Pagelax kawn simex Awkharan pa mawh cao kaing doehru Asha yuh krax tan, <sup>73</sup> krax tan nawh mawh pan mau tix mu pa koe tix yieh tixngoe shekhe coi, khawm pan khoeok mau pa koe atixgliah shekhe coi, awm mau pa singax pa hoik sawn kix plak mau shekhe, an khawm ra naog ka phawng nghox ca ceu pa mhawm pa hoik klao ti mai bee, son krax tan ceu pa ih, <sup>74</sup> klong khri pa cien kao shekhe tix mu pa naog nyawng bhawng pa sang gleeing, <sup>75</sup> son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu, <sup>76</sup> son krax tan pa pluatploi phimap, kawn pex iak tix mu <sup>77</sup> mai son krax tan pa appong krax tan pa nhim tak mawh mawie ra mu, yung phuan mu, pex mhaing phuan mu mai kawn yung pa naog num phuan mu, in mawh krax tan Pagelax kawn simex Awkharan heue. <sup>78</sup> Ka daux kao ra ngaix, Ahirax kawn simex Enan pa mawh cao kaing doehru Napthalix yuh krax tan, <sup>79</sup> krax tan nawh mawh pan mau tix mu pa koe tix yieh tixngoe shekhe coi, khawm pan khoeok mau pa koe atixgliah shekhe coi, awm mau pa singax pa hoik sawn kix plak mau shekhe pa singax, an khawm ra naog ka



phawng nghox ca ceu pa mhawm pa hoik klao ti mai bee son krax tan ceu pa ih,<sup>80</sup>klong khri pa cien kao shekhe tix mu pa naog nyawng bhawng pa sang gleeing,<sup>81</sup>son krax tan pa gleeing, mawie mhaing pa awn ju tix mu, yung mhaing tix mu mai kawn yung mhaing pa naog num tix mu,<sup>82</sup>son krax tan pa pluatploi phimap, kawn pex iak tix mu<sup>83</sup> mai son krax tan pa appong krax tan pa nhim, tak mawh mawie ra mu, yung phuan mu, pex mhaing phuan mu mai kawn yungmhaing pa naog num phuan mu, in hoik mawh krax tan Ahirax kawn simex Enan heue.<sup>84</sup>In mawh krax tan khaing cao kaing pui Isarela singaix groi rawm bee mai pa appong khu dee tan pan mau kao ra mu, pan khoeu mau kao ra mu mai klong khri kao ra mu.<sup>85</sup>Pan mau ku mu koe tix yieh tixngoe shekhe coi mai pan khoeu mau ku mu koe atixgliah shekhe coi, tawg klong mau khankix khawmuik cien ra rheng pon yieh shekhe coi, awm mau pa singax pa hoik sawn kix plak mau shekhe,<sup>86</sup>klong khri kao ra mu pa naog nyawng bhawng pa sang gleeing, ku mu cien kao shekhe awm mau pa singax pa hoik sawn kix plak mau shekhe, klong khri khankix khawmuik cien tix yieh tixnga shekhe coi,<sup>87</sup>son krax tan pa gleeing khawmuik mawh mawie mhaing kao ra mu, yung mhaing kao ra mu, kawnyungmhaing pa naog num kao ra mu tau mai krax tan ceu pa ih mai son krax tan pa pluatploi phimap, kawn pex iak kao ra mu<sup>88</sup> mai son krax pa appong krax tan pa nhim, mawie tixnga pon mu, yung tixgliah mu, pex mhaing tixgliah mu mai kawn yung mhaing pa naog num tixgliah mu. In mawh krax tan pa appong son khu dee tan khaix hoik groi rawm bee heue.<sup>89</sup>Yam laig Mose ka daux nyiex gox buan man bang kum sonsang sikah tau mai Siyiex, nawh mhong lox pa sikah khaing ka piang dangngeung krax pa cauxrhawm pa koe ka piang tawb teug buan pa kham mhairug khaing sinax rieang Cherubin ra mu ka nawh heue.

8:1-4 Lih 25:31-40, 37:17-24.

### **Tok Kawk Ngu**

**8** Simiang Siyiex kraih ah nin ka Mose,<sup>2</sup> “Kraih ah nin ka Arun, yam tok maix kawku ngu, kawku ngu aliah mu tak kieh jhan riieng ka piang pang jawk ten khri khawm ra plak.”<sup>3</sup> Arun yuh awm an, nawh tok kawku ngu sonsang jhan riieng ka piang pang jawk ten khri khawm ra plak, awm gumlox pa hoik tawm Simiang Siyiex ka Mose.<sup>4</sup> Grawng pa yuh ka jawk ten khri in, jah ka pang kawku ngu tom hoek kho tai khankix hoik mawh pa tawku ti yuh ka khri khawm kreng, hoik yuh awm pakpeung pa kraih Simiang Siyiex ka Mose heue.

### **Pa Yuh Pui Lewix Singax Appong**

<sup>5</sup> Simiang Siyiex kraih ah nin ka Mose,<sup>6</sup> “Teei ceucad Lewix khankix lih khaing daux sinax pui Isarela mai kieh kix singax.<sup>7</sup> Sonsang singax kix, maix tak yuh in khankix, teei rawm singax mai phruah ka piang kix mai kieh kix khlahauk pa koe ka piang tokaux tix khawmuik mai kieh kix sidaux kraung ceep tix sonsang yuh kix tokaux tix singax.<sup>8</sup> Kieh kix teei mawie mhaing awn ju tix mu mai krax tan ceu pa ih pa mhawm pa hoik klao ti mai bee mai baoux teei mawie mhaing awn ju tix mu son krax tan pa pluatploi phimap.<sup>9</sup> Maix tak viex ceucad Lewix khankix hoek sivoey nyiex gox buan man bang kum mai kieh ceu pui Isarela khawmuik khrawm paoux tix.<sup>10</sup> Maix tak viex ceucad Lewix khankix hoek sivoey ngai Simiang Siyiex mai ceu pui Isarela tak deuh taix tix ka piang ceucad Lewix khankix,<sup>11</sup> Arun tak appong ceucad Lewix ka plak sivoey ngai Simiang Siyiex, son krax tan pa yangyeuh tang ceu pui Isarela khankix, sonsang pon yuh kix kaing jhaw Simiang Siyiex.<sup>12</sup> Ceucad Lewix khankix tak deuh taix tix ka piang kaing mawie mhaing awn ju an khankix mai maix tak tan tix mu son krax tan pa pluatploi phimap mai tan an tix mu son krax tan pa gleeing ka Simiang Siyiex, sonsang yuh pa khioxkhaw mai pa pluatploi son ceucad Lewix khankix.<sup>13</sup> Maix tak viex ti deuh ceucad Lewix sivoey Arun mai kawn simex nawh khankix mai appong ti tawx kix son krax tan pa yangyeuh ka Simiang Siyiex.<sup>14</sup> “Maix tak tang goih ti deuh ceucad Lewix

khaing daux sinax ceu pui Isarelaix mai ceucad Lewix tak mawh pui Aux heue. <sup>15</sup> Khaix an, ceucad Lewix tak hu laig yuh kaing ka daux nyiexgox buan man bang kum, maix tak kieh kix singax mai appong kix son krax tan pa yangyeuh. <sup>16</sup> Kix mawh pa hoik laug ti tawx Aux khawmuik khaing daux sinax ceu pui Isarelaix, Aux hoik teei ti cie pa liang ti keh khaing sinax ceu pui Isarelaix khankix. <sup>17</sup> Grawh grawng nawh kawn Ai pa keh khaing daux sinax ceu pui Isarelaix khankix, pui khawm tobrie mawh cie Aux, ka daux singaix khaix hoik ciyang Aux kawn Ai pa keh ka daux haktiex Ejiptux khankix, Aux hoik kieh kix mawh pa singax singeh son Cao Tix. <sup>18</sup> Aux hoik teei ceucad Lewix, son tang kawn Ai pa keh khaing ceu pui Isarelaix khankix. <sup>19</sup> Aux hoik tawx ceucad Lewix khankix awm totaix tix ceu son Arun mai kawn simex nawh khankix khaing daux sinax ceu pui Isarelaix sonsang yuh kix kaing son ceu pui Isarelaix ka daux nyiex gox buan man bang kum mai sonsang yuh kix krax pa khioxkhaw mai krax pa pluatploi phimap son ceu pui Isarelaix khankix, son ang krax pa lauxleeing lai koe daux sinax ceu pui Isarelaix, yam hoek ceu pui Isarelaix khankix dex dahdee pa singax heue.” <sup>20</sup> Mose mai Arun mai cub pui hun ceu pui Isarelaix appong ka ceucad Lewix, awm gumlox pa hoik tawm Simiang Siyiex ka Mose son grawng pa dex mai ceucad Lewix khankix, mawh kheu nan ceu pui Isarelaix yuh an ka ceucad Lewix. <sup>21</sup> Ceucad Lewix yuh tokaux tix singax mai sidaux kraung ceep tix mai Arun appong kix awm krax tan pa yangyeuh sivoie Simiang Siyiex, Arun tak yuh krax khioxkhaw mai krax pa pluatploi phimap son kix, sonsang kieh kix singax heue. <sup>22</sup> Khaix an, ceucad Lewix laig ka daux nyiex gox buan man bang kum ka plak sivoie Arun mai kawn simex nawh khankix, sonsang yuh kix kaing jhaw awm lox pa hoik tawm Simiang Siyiex ka Mose son grawng pa dex mai ceucad Lewix, mawh kheu nan kix yuh an ka piang kix heue. <sup>23</sup> Simiang Siyiex krai ah nin ka Mose, <sup>24</sup> “In mawh grawng pa dex mai ceucad Lewix

khankix, pui pa hoik koeju tixnga phuan num haok plak piang tak yaox ti laig yuh kaing jhaw ka daux nyiex gox buan man bang kum, <sup>25</sup> yam hoik hoek ju kix tix phuan num, kix tak laux tix khaing kaing pa yuh tix mai kix tak ang lai baox yuh kaing tix bawg kawx, <sup>26</sup> kix tak yaox ti yuh kaing jhaw pa teem ka puxaik tix ka daux nyiex gox buan man bang kum, viang mawh nan kix tak ang pon ti teei beeh glawm tix ceu kawx, maix tak yuh ka ceucad Lewix awm grawng beeh glawm pa dexdawd mai kix heue.”

### **9 Grawng Pawie Pasakha Bawg Ra**

**9** Simiang Siyiex sikah mai Mose ka daux tiag Sina, ka daux num ra khix tix khaix hoik lih kix khaing meung Ejiptux ah nin, <sup>2</sup> “Kieh ceu pui Isarelaix khankix yuh pawie Pasakha ka daux bawg yam pa hoik tat ti deuh. <sup>3</sup> Daux khix in kao pon ngaix plak bo, maix tak yuh pawie an, ka daux bawgyam pa hoik tat ti deuh mai maix tak yuh an awm pa koe been pa hoik tat ti deuh khankix. <sup>4</sup> Mose krai ka ceu pui Isarelaix khankix, sonsang yuh kix pawie Pasakha. <sup>5</sup> Kix yuh pawie Pasakha ka daux khix tix kao pon ngaix, ponbo, ka daux tiag Sina awm lox pa hoik tawm Simiang Siyiex ka Mose, mawh kheu nan ceu pui Isarelaix khankix yuh pawie an. <sup>6</sup> Yam an koe pui tixblah, pa hoik seeing yuh tokaux tix ka pui yum son ang kix lai pon yuh pawie Pasakha ka daux singaix an mai kix hoek ka plak sivoie ngai Mose mai Arun daux singaix an, <sup>7</sup> kix ah nin ka nawh, “Yix hoik seeing yuh tokaux tix ka pa yum, mawh sang pon kieh maix yix viex krax tan tix ka Simiang Siyiex ka daux bawgyam pa hoik tat ti deuh daux sinax ceu pui Isarelaix khankix lie? <sup>8</sup> Mose ah nin ka kix, “Jun ha, Aux sang krox tix nghiet Simiang Siyiex sang ah yuh ka mawx ka grawng pa dex mai pex.” <sup>9</sup> Simiang Siyiex krai ah nin ka Mose, <sup>10</sup> “Krai ka ceu pui Isarelaix khankix ka daux pex mai doehru pex tix kaux kaux phan hoik seeing yuh tokaux tix ka pa yum angah mai hu krax deeh singai angah, nawh tak pon ti yuh pawie Pasakha cie Simiang Siyiex. <sup>11</sup> Ka daux khix ra kao pon ngaix plak bo, kix tak pon ti yuh pawie, kix tak ih nex kawn yung tau mai blah pa ang sau susaix mai taux lhax pa

song.<sup>12</sup> Kix tak ang pon ti kieh nex an deuk tom hoek plak ponngawb mai ang pon ti kieh si-ang pot tix nyaing kawx, kix hawt ti yuh awm koe been pawie Pasakha.<sup>13</sup> Phan mawh pui pa singax mai pa ang koe krax hu, phan nawh ang yuh pawie Pasakha, tak teei ti tik pui an khaing daux sinax pui ceu nawh, kheu ang nawh viex krax tan tix hoek ka Simiang Siyiex, ka daux bawgyam pa hoik tat ti deuh, nawh tak yaox ti kham geu phimap.<sup>14</sup> Nyosinie pa hoek ti peung sinax pex tivud ticu, phan nawh simie ti yuh pawie Pasakha cie Simiang Siyiex, nawh tak hawt ti yuh awm pa koe been pawie Pasakha mai yuh awm pa hoik tat kix ti deuh ka son kawn praix pa keh daux haktiex pex angah ka son nyosinie angah, tak koe been tix ceu khaing heue.

**Grawng Paiawm Ngu Pa Rieng** (Lih 40:34-38)

<sup>15</sup>Ka daux ngaix jung ka nyiex gox buan man, paiawm hoik kheem ka piang nyiex gox buan man pa koe teug pa kham mhairug, jah ponbo tom hoek ponngawb, an hoik awm grang ngu.<sup>16</sup> Ponggaix paiawm kheem ka nyiex gox buan jheengjeheeng, ponsawm jhan rieng awm grang ngu.<sup>17</sup> Yam hoik yaog paiawm ti haok khaing ka piang nyiex gox buan man, ceu pui Isarelax khankix yaox ti hu krax mai yam jung paiawm ti ot dee mawx angah, ceu pui Isarelax khankix tak sum nyiex bang ti ot tan.<sup>18</sup> Awm lox pa tawm Simiang Siyiex, ceu pui Isarelax khankix tak lih hu krax mai awm lox pa tawm Simiang Siyiex, kix tak sum nyiex bang tix mai glang kawn ot paiawm ka piang nyiex gox buan man, kix ca kawn ot daux nyiex bang.<sup>19</sup> Glang kawn ot paiawm ka piang nyiex gox buan man tom rheeng singaix, ceu pui Isarelax khankix yuh awm pa tawm Simiang Siyiex mai ang lai hu krax.<sup>20</sup> Bawg blah yam kawn kheem paiawm ka piang nyiex bang tivudticu, kix ca kawn ot ka daux nyiex bang awm lox tawm Simiang Siyiex mai kix tak lih hu krax awm lox tawm Simiang Siyiex.<sup>21</sup> Bawg blah yam kawn kheem paiawm, jah ponbo tom hoek ponngawb mai yam deeh yaog paiawm ti haok ponngawb

kix tak hu krax, ponggaix angah, ponsawm angah, yam deeh yaog paiawm tix kix tak hu krax.<sup>22</sup> Ra ngaix angah, tix khix angah, tix num angah, yam kawn kheem paiawm ka piang nyiex gox buan man, ceu pui Isarelax khankix ot daux nyiex bang mai kix ang pon ti hu krax, viang mawh nan, yam deeh hoik yaog paiawm tix kix tom hu krax.<sup>23</sup> Awm lox pa tawm Simiang Siyiex, kix ca kawn ot ka daux nyiex bang mai awm lox pa tawm Simiang Siyiex kix hu krax, kix yuh ankix awm lox pa tawm Simiang Siyiex ka Mose heue.

**10 Teettawng Mau Ra Mu**

Simiang Siyiex kraih ah nin ka Mose,<sup>2</sup> "Maix tak yuh teettawng mau ra mu sonsang kraixkhawm ka pui hun mai sonsang gah ka nyiex bang.<sup>3</sup> Yam phlu ka teettawng an khawm ra, cub pui hun khawmuik tak kraixkhawm paox tix hoek ka plak sivoe maix hawt diang sivix nyiex gox buan man bang kum.<sup>4</sup> Phan phlu teettawng tix mu ngie, cao kaing pa kuang ka piang pui tix rheng khaing daux ceu pui Isarelax khankix tak kraixkhawm paox ti hoek ka maix.<sup>5</sup> Yam phlu maix teettawng pa so cub nyiex bang pa ot plak toh, yaog ti hu krax.<sup>6</sup> Yam phlu teettawng pa so bawg ra, cub nyiex bang pa ot plak jee, yaog ti hu krax mai yam phlu ka teettawng pa so yam mawx angah, kix tak lih hu krax.<sup>7</sup> Yam sang kraixkhawm maix pui hun tau mai paox tix, maix tak phlu teettawng, viang mawh nan maix paw phlu lox teettawng pa so.<sup>8</sup> Kawn simex Arun pa mawh cao giex kaing li khankix tak phlu teettawng. In tak mawh been pa caw pex ti hawt yuh ka daux doehru pex leeingju heue.<sup>9</sup> Yam hu puing pex naing daux haktiex tix ka pui koeng pa yeen pa khin ka piang pex, khaix an pex tak phlu teettawng pa so sonsang mawh krax pa dohkeud pex ka sivoe Simiang Siyiex tix mai pex tak pon ti lawdluan khaing pui pa koeng tix.<sup>10</sup> Ka dau singaix koe krax gauhrhawm pex, daux bawg yam singaix yuh pex pawie mai singaix haok khix khraox, pex takphlu teettawng ka piang krax tan pa gleeing pex khankix mai krax tan pa appong krax tan pa nhim, sonsang

mawh krax pa dohkeud pex ka Siyiex, Aux mawh Simiang Siyiex, Siyiex pex heue.”

**Lih Hu Khaing Gawng Sina**

<sup>11</sup> Ka dauw num ra, khix ra, haok khix tixnga ngaix, paiawm yaog ti haok khaing ka piang nyiex gox buan man pa koe teug pa kham mhairug <sup>12</sup> mai ceu pui Isarelax khankix lih hu khaing dauw tiag Sina khaix an, paiawm lih kaog dauw tiag Paran. <sup>13</sup> Mawh kheu nan kix jah ti lih hu bawg tix awm lox pa tawm Simiang Siyiex ka Mose. <sup>14</sup> Cub nyiex bang Yudax khankix lih hu sivoie tau mai man jhi kranaing tix, Nashon kawn simex Aminadat mawh cao kaing naing ka piang cub pui Yudax. <sup>15</sup> Natanelax kawn simex Zu-ax mawh cao kaing naing ka cub pui Isakha. <sup>16</sup> Eliabax kawn simex Helon mawh cao kaing naing ka cub pui Zebulon. <sup>17</sup> Yam hoik yieh nyiex gox buan man, kawn simex Gerashon mai kawn simex Merarix khankix klawm nyiex gox buan man an lih hu heue. <sup>18</sup> Cub nyiex bang Rubin khankix lih hu tau mai man jhi kranaing tix, Elizurax kawn simex Shedurax mawh cao kaing naing ka cub pui Rubin. <sup>19</sup> Shelumelax kawn simex Zurishadie mawh cao kaing naing ka cub pui Simion. <sup>20</sup> Eliasap kawn simex Doelax mawh cao kaing naing ka cub pui Gat. <sup>21</sup> Ceu pui Kawhat khankix lih hu mai klawm kraung ceu pa singax singeh mai kix sum nyiex gox buan man sivoie ka sang hoek kix. <sup>22</sup> Cub nyiex bang Epharim lih hu tau mai man jhi kranaing tix, Elishama kawn simex Amihut mawh cao kaing naing ka cub pui Epharim. <sup>23</sup> Gamalelax kawn simex Pedazurax mawh cao kaing naing ka cub pui Manashe. <sup>24</sup> Abidan kawn simex Gidawnix mawh cao kaing naing ka cub pui Benyamin. <sup>25</sup> Cub nyiex bang Dan ghoik ti hu tau mai man jhi cub kranaing tix, Aheza kawn simex Amishadie mawh cao kaing naing ka cub pui Dan. <sup>26</sup> Pagelax kawn simex Awkharan mawh cao kaing naing ka cub pui Asha. <sup>27</sup> Ahirax kawn simex Enan mawh cao kaing naing ka cub pui Napthalix. <sup>28</sup> In mawh Grawng pa sang yaog ceu pui Isarelax khankix ti lih hu krax cub mawx cub an, yam lih hu kix krax heue. <sup>29</sup> Mose ah

**10:30** Lih 18:27. **10:35** Yaog 68:1.

nin ka Hawbax kawn simex Yoelax ka ceu pui Midian pa mawh paow nawh, “Ex sang lih huka dee pa hoik krai Simiang Siyiex, aux tak sang tawx an ka pex, hoek tau mai yix mai ex tak yuh ceu pa mhawm ka maix, mawh kheu Simiang Siyiex hoik yuh sijax mukheu pa mhawm ka pui Isarelax.” <sup>30</sup> Hawbax deeh ah nin ka nawh, “Aux ang hu, aux deeh ing ka haktiex tix ka paow nyiex tix.” <sup>31</sup> Mose deeh ah nin, “Yuh buanson paw prah yix liak, mawh kheu maix hoik tawng yix sang yaow tix bang ti ot ka dauw tiag mawh kheu maix hoik pon ti mawh ngai yix. <sup>32</sup> Phan maix hu tau mai yix awm yuh Simiang Siyiex pa mhawm ka yix, yix kawx tak yuh pa mhawm ka maix.” <sup>33</sup> Cub pui Isarelax lih hu khaing gawng Simiang Siyiex, been loe singaix krax mai teug buan sijax mukheu Simiang Siyiex thong kix hu sivoie loe singaix krax, sonsang sawg ka dee laux son kix. <sup>34</sup> Paiawm Simiang Siyiex koe ka piang kix ponngaix yam lih hu kix krax. <sup>35</sup> Yam lih hu teug buan sijax mukheu yam mawx angh, Mose ah nin, “Simiang Siyiex eue kaoh heue, kieh pui koeng maix khankix, prungprang rairuad, mai kieh pui koeng maix to sivoie Maix.” <sup>36</sup> Yam kaog teug buan sijax mukheu, Mose ah nin, “Simiang Siyiex eue, deeh hoek heue, deeh hoek ka dee ot ceu pui Isarelax kaing rheng kaing mheen liak.”

**11 Grawng Pa Ngia Ngheek Pui Khankix**  
<sup>1</sup> Simiang Siyiex mhong ka lox pa ngia pa ngheek ceu pui Isarelax ka grawng pa caow caig mai krax pa song rhawm Nawh Cao lih mai ngu Simiang Siyiex gleeing ka dauw sinax kix mai proe ka pui pa peung ka praok nyiex bang tixblah. <sup>2</sup> Pui khankix riagyo ka Mose mai Mose rawgbuan ka Simiang Siyiex mai ngu an yeet heue. <sup>3</sup> Nawh kok ceukaux dee an mawh Taberax kheu hoik gleeing ngu Simiang Siyiex ka dauw sinax kix. <sup>4</sup> Pui pa hoik khon tix ka sinax pui hun, kied koe rhawm pa ghoing, ceu pui Isarelax baow yiem ah nin, “Pui mawx sang tawxyix ih nex lie?” <sup>5</sup> “Ex dohkeud ka nex kax pa yie ih ex ka dauw meung Ejiptux, khawm ke, ke khuang, taukka, tauxmaw mai tauhaw khankix, <sup>6</sup> Yam in, rhawm rhi yix hoik khrup,



lheu khaing blah manna in sivoie ngai yix ang lai yaox koe tittix.”<sup>7</sup> Mannax an hoik awm simie taux kila mai pakpeung awm mu ploi.<sup>8</sup> Pui khankix hu lailing ka plak praix mai khrawm manna, krid ka mhaw mai tauh daux po, ngaik daux aw, yuh blah ka an, jhawm nyawm an awm blah pa hoik diag tau mai bee.<sup>9</sup> Yam lih rawm ciex ka piang nyiex bang kix ponsawm, manna lih tau mai an.<sup>10</sup> Mose mhong yiem pui khaing diang siviex nyiex bang, nyiexma maw nyiexma an mai pa song rhawm Simiang Siyiex baox nie kaoh kah mai Mose ang nyawmrhawm ka.<sup>11</sup> Mose ah nin ka Simiang Siyiex, “Maix Cao lai yuh krax kharhawm ka kawncau tix yuh ka mawx? Mai aux lai mawh pa angpon buanson ka plak sivoie ngai Maix Cao mai deuh beeh glawm cien pui inkix khawmuik ka piang aux yuh ka mawx?<sup>12</sup> Khex mawh yuh nin lie aux pa nghe ka pui inkix lie? khex mawh aux pa keh kix sonsang ah Maix Cao ka aux? Klien kix ka daux naok Maix awm pui kiangiien ka kawm nyawm pa kawm peuex teeh mai klien kix hu ka daux haktiex pa hoik tiextu Maix Cao ti tawx ka keeing kix.<sup>13</sup> Aux sang pon teei nex sonsang tawx ka pui in khankix khaing dee mawx? Mawh kheu kix riag yiem sivoie aux ah nin, tawx yix ih nex liak<sup>14</sup> Aux ang pon klawm beeh glawm pui inkix nongnong, kheu mawh in beeh glawm pa kied cien son aux.<sup>15</sup> Phan Maix Cao yuh awm ceu in ka aux, yuh buanson pah ka aux Yam in,, phan aux mawh pa pon buanson ka plak sivoie ngai Maix Cao, paw doh kieh aux yaox krax kha liak.”

### ***Pui Riex Ju Atixgliah Kaux***

<sup>16</sup>Simiang Siyiex ah nin ka Mose, “Khrawm pui riex ju atixgliah kaux son Aux khaing daux pui Isarelax pa tawng maix mawh pui riex ju mai pa mawh cao kaing ka piang kix, viex kix hoek ka nyiex gox buan man bang kum cung tau mai maix tan.<sup>17</sup> Aux tak lih hoek sikah tau mai maix tan, Aux tak teei khuan pa koe ka piang maix tixblah mai deuh ka piang kix mai kix tak klawm beeh glawm tau mai maix son ang maix lai klawm beeh

**11:7-8** Lih 16:31. **11:9** Lih 16:13-15.

glawm an nongnong.<sup>18</sup> Ah nin ka pui khankix, kieh tokaux pex singax son pasax mai pex tak yaox ti ih nex, mawh kheu Simiang Siyiex hoik mhong lox riag yiem pex pa ah nin, “Pui mawx sang tawx yix ih nex lie?” Mawh kheu yix hoik mhawm ka daux meung Ejiptux. Mawh kheu Simiang Siyiex tak tawx nex ka pex mai pex tak yaox ti ih.<sup>19</sup> Pex tak ang yaox ti ih ngie son tix ngaix, ra ngaix, phuan ngaix, kao ngaix mai tixnga ngaix,<sup>20</sup> pex tak yaox ti ih leeing khix tom hoik lih nex khaing daux meeh pex tom hoik seeing pex kah, kheu hoik thiang pex ti tik ka Simiang Siyiex pa ot ka daux sinax pex mai riag yiem sivoie Nawh Cao ah nin, “Kheu yix lai lih khaing daux meung Ejiptux lie?”<sup>21</sup> Mose ah nin, “Can pui liah sien kaux pa ot tau mai Aux khankix, Maix Cao hoik ah nin, Aux tak sang tawx kix ih nex tom naog tix khix<sup>22</sup> mawh sang pah ka phung yung, mawie mai pex son kix, sonsang kub ih kix lie? Phan ang mawh nan, mawh sang khrawm kax pa koe daux rawm sigrit sigra son kix sonsang kub ih kix lie?”<sup>23</sup> Simiang Siyiex ah nin ka Mose, “Mawh ngaing plawng taix Simiang Siyiex lie? Yam in, maix tak yaox ka lox pa kraik Aux ka maix mawh ang mawh.”<sup>24</sup> Mose lih humai kraik lox Simiang Siyiex ka pui hun mai nawh khrawm simex pui riex ju atixgliah kaux khaing daux pui hun mai kieh kix cung vungviang nyiex gox buan man.<sup>25</sup> Simiang Siyiex lih hoek khaing daux paiawm mai sikah ka Mose mai teei khuan pa koe ka piang nawh tixblah mai deuh ka piang pui riex ju atixgliah kaux, yam hoek khuan ka piang kix, kix sikah lox jhai maikix ang lai baox kraik khaix an.<sup>26</sup> Kawm koe pui ra kaux pa kut ti ot ka daux nyiex bang, tix kaux mawh Eladat mai tang kaux tix kaux mawh Medat mai khuan hoek ka piang kiex khawm ra kaux, kiex hoik mawh pa laig daux carang, viang kiex ang lih hu ka nyiex gox buan man kawx, kiex sikah lox jhai ka daux nyiex bang.<sup>27</sup> Nyawm simex awn ju tix kaux to hoek kraik ka Mose ah nin, “Eladat mai Medat, sikah lox jhai daux nyiex bang.”<sup>28</sup> Yawsux kawm simex Nun cao teem Mose, pui pa hoik laug nawh tix kaux ah nin, “Simiang aux Mose tiebtie ka kix liak.”<sup>29</sup> Mose ah nin ka nawh,



khoi rhawm maix ka aux jao tix? Kieh pui Simiang Siyiex sikah lox jhai khawmuik mai kieh Simiang Siyiex tawx khuan hoek ka piang kix heue.”<sup>30</sup> Mose mai pui riex ju Isarelax khankix deeh ing ka nyiex bang heue.

### *Simiang Siyiex Tawx Keed*

<sup>31</sup>Bhaung ting lih khaing Simiang Siyiex mai tah keed hoek khaing rawm sigris sagra mai kieh keed prungprang rawbrim nyiex bang been tix ngaix krax ka plak in mai ka plak an, hawt vungviang nyiex bang mai lhaong pu khaing tiex been ra sawk. <sup>32</sup>Pui khankix kaoh khrawm keed ku singaix mai ngaix khaix leeingngaix, pui pa khrawm keed dee iak pon kao awmie mai hok hawt vungviang nyiex bang ku sidah. <sup>33</sup>Yam kawn koe nex keed ka sinax rhang kix mai ang nyangtien kraing, krax song rhawm Simiang Siyiex lih ka pui khankix mai tawx preng pa kied ting ka pui khankix. <sup>34</sup>Nawh tom kok dee an mawh Kibarok-hatava, kheu sipaung kix pui pa koe rhawm ghoing ka dee an. <sup>35</sup>Pui khankix deeh gah tix khaing Kibarok-hatava mai hubang ti ot ka Hazarot heue.

## **12** *Arun Mai Meriam*

Meriam mai Arun ne raw ka Mose, kheu jao teei nawh ti moeng bun Kushax, <sup>2</sup>kiex ah nin, “Mawh sikah Simiang Siyiex ka maix ngie lie? Mawh ang Nawh Cao sax sikah ka yix nang lie?” Simiang Siyiex mhong ka lox sikah kix. <sup>3</sup>Mose mawh pa kied koe rhawm awn rhawm tiem lheu khaing pa koe ka piang haktiex. <sup>4</sup>Simiang Siyiex ah nin ka Mose khawm Arun mai Meriam dommawx doman “Pex loe kaux, lih hoek ka nyiex gox buan man bang kum.” Kix loe kaux lih hoek. <sup>5</sup>Simiang Siyiex lih hoek ka daux rong paiawm mai cung ka diang siviex nyiex gox buan man, kok ka Arun mai Meriam mai kiex khawm ra hoek sivoie. <sup>6</sup>Nawh Cao ah nin, “Nghiet ka lox Aux, phan cao jhai koe ka daux sinax pex, Aux Simiang Siyiex tak plak jhi tokaux tix ka nawh ka daux rieng susai, Aux tak sikah mai nawh ka daux camaox. <sup>7</sup>Kawncau Aux Mose ang lai mawh nan, nawh mawh pa kaux sijax daux nyiex

Aux khawmuik. <sup>8</sup>Aux sikah tau mai nawh pakngai taw pakngai, ka daux pa sidawng, ang lai mawh pa ang sidawng kah mai nawh yaox ka grang pakpeung Aux. Pax lai ang lhatgraung tix neraw ka kawncau Aux Mose yuh ka mawx?” <sup>9</sup>Simiang Siyiex song rhawm ka kiex mai Nawh cao lih hu. <sup>10</sup>Yam gah paiawm tix khaing piang nyiex gox buan man, Meriam lih koe saux sipawg awm paing rawm rha, Arun veeh ti jhak ka Meriam mai yaox koe saux sipawg nawh. <sup>11</sup>Arun ah nin ka Mose, “Simiang aux eue, paw deuh phimap ka piang yiex, kheu pa daox pa aw yiex mai pa caox caig yuh yiex liak. <sup>12</sup>Paw kieh Meriam yum awm pa laux nex tix tix plak, yam keh nawh khaing vaig miex tix.” <sup>13</sup>Mose riagyo ka Simiang Siyiex ah nin, “Siyiex eue, yuh buanson pai nawh moi liak.” <sup>14</sup>Simiang Siyiex ah nin ka Mose, “Phan keeing Meriam baig ka ngai Meriam, nawh tak kaig aliah ngaix ang mawh lie? kieh nawh lih ot plak praix nyiex bang aliah ngaix, khaix an tak pon ti deeh viex nawh hoek.” <sup>15</sup>Meriam lih ot plak praix nyiex bang aliah ngaix, pui khankix ang pon hu krax tom hoek bawgyam deeh viex kix nawh laig ka daux nyiex bang. <sup>16</sup>Khaix an, pui khankix deeh gah tix khaing Hazarot mai hubang ti ot ka daux tiag Paran heue.

### *Ploi Cao Jiang Ka Meung Khanan*

**13** *(Pi 1:19-33)*

Simiang Siyiex krai ah nin ka Mose, <sup>2</sup>“Ploi cao kaing tix cub tix kaux, khaing doehru keeing kix hu jiang ka meung Khanan, pa sang tawx Aux ka ceu pui Isarelax, ” <sup>3</sup>Mose ploi kix lih hu khaing daux tiag Paran, awm lox tawm Simiang Siyiex ka cao kaing ceu pui Isarelax heue. <sup>4</sup>In mawh ceukaux kix, khaing ru Rubin mawh Shamua kawn simex Zakhurax, <sup>5</sup>khaing ru Simion mawh Shaphat kawn simex Hawrix, <sup>6</sup>khaing ru Yudax mawh Kaliep kawn simex Yiephunie, <sup>7</sup>khaing ru Isakha mawh Igalax kawn simex Yosiep, <sup>8</sup>khaing ru Epharon mawh Hawshe kawn simex Nun, <sup>9</sup>khaing ru Benyamin mawh Palatix kawn simex Raphu, <sup>10</sup>khaing ru Zebulon mawh Gadelax kawn simex Sawdix, <sup>11</sup>khaing ru Yosiep pa kaoh khaing ru Manashe mawh Gadix kawn simex Susix, <sup>12</sup>khaing ru Dan mawh Amelax kawn

simex Gemalix, <sup>13</sup> khaing ru Asha mawh Seturax kawn simex Mikhelax, <sup>14</sup> khaing ru Napthalix mawh Nabix kawn simex Vophasix, <sup>15</sup> khaing ru Gat mawh Goelax kawn simex Makhix. <sup>16</sup> In khankix mawh ceukaux pui ploi Mose lih hu jiang ka haktiex an. Mose sum ceukaux Hawshe kawn simex Nun deeh mawh Yawsux. <sup>17</sup> Mose ploi kix hu jiang ka haktiex Khanan ah nin ka kix, "Hu krax plak jee mai haok ka piang gawng, <sup>18</sup> Jhak ti yaok ka haktiex an koe yuh ka mawh, can pui pa ot ka dauh haktiex an, mawh ting riang, phan ang mawh nan mawh iak riang, mawh tux phan ang mawh nan mawh hun, <sup>19</sup> haktiex ot kix mawh mhawm, mawh caox, veng ot kix mawh nyiex bang mawh nyiex kaux, <sup>20</sup> haktiex an mhawm lie, ang mhawm lie, koe ang koe khaox ox lie, kieh pex koe rhawm kuarhawm vao mai viex plix khaox tixblah khaing dauh haktiex an." Yam an hoik mawh bawgyam jah plix siiet ti teem. <sup>21</sup> Kix lih hu jiang ka haktiex an khaing dauh tiag Zin ka veng Rehawbax, dex krax laigdauh veng Hamat. <sup>22</sup> Kix lih hu plak jee tom hoek ka veng Hebron, dee ot ru Anagax pa mawh Ahiman, Sheshie mai Talamie, veng Hebron hoik cao sum ti aliah num sivoie veng Zawnax dauh meung Ejiptux. <sup>23</sup> Kix hoek ka ngawd Eshakawlax mai tat nhu plix siiet tix kak, pa koe plix siiet tix sigleem mai klawm ka khaox glawm ra kaux, kix baox viex plix kla jiang mai plix ruh hoek tixblah. <sup>24</sup> Dee an kok mawh ngawd Eshakaw mawh kheu tat pui Isarelaux sigleem plix siiet tan. <sup>25</sup> Khaix hoik luan tixpon singaix, kix deeh hoek khaing jiang tix haktiex an. <sup>26</sup> Kix deeh hoek ka Mose mai Arun mai pui hun Isarelaux ka dauh tiag Paran baoh Kadeshax, kix viex lox satang hoek ka kiex mai pui hun mai jhi kix yaok plix khaing haktiex an. <sup>27</sup> Kix krai ka Mose ah nin, "Yix hoik hoek ka haktiex dee ploi maix yix hu, rug mawh dee lih rawm teeih mai rawm hia, in mawh plix khaing tan. <sup>28</sup> Can pui pa ot dauh haktiex an, mawh pa ting riang mai veng kix kawx hoik sum tix tom kaux mai kied ting kied vieh, lheu khaing an yix hoik yaok ru Anagax tan. <sup>29</sup> Pui Amaliet ot ka

13:33 Yam 6:4. 14:9 He 3:16.

dauh haktiex an baoh plak jee, pui Hittix, pui Yebusix mai pui Amawrix ot ka piang gawng, pui Khanan ot praok rawm sigrit sigra mai praok rawm klawng Yawdan." <sup>30</sup> Kaliep kieh pui hun yawg tix ka plak sivoie Mose ah nin, "Kieh ex lih hu dommawx doman mai teei haktiex an, mawh kheu ex koe riang ti pex ka kix." <sup>31</sup> Viang mawh nan can pui pa hu mai Kaliep ah nin, "Ang ex kub riang rao ti pex kix, mawh kheu ting riang rao kix khaing ex." <sup>32</sup> Kix pa hu jiang ka haktiex an, deeh krai grawng satang pa caox ka pui Isarelaux ah nin, "Haktiex pa lih hu jiang yix, mawh haktiex pa ot pui pa bleet ti ih pui mai can pui pa hoik yaok yix tan mawh pui pa kied ting lhaong kaux hak khawmuik. <sup>33</sup> Yix yaok pui Nefelim pa ting lhaong, doehru Anagax pa kaoh khaing pui Nefelim pa ting lhaong, yix hoik awm sido ka dauh pa jhak yix ka tokaux tix mai yix hoik mawh awm an ka dauh pa yaok kix heue."

**14** *Thiang Tix Ang Laig Meung Khanan*  
 Cub pui hun riagyo khawmuik mai pui hun yiem dauh sawm an. <sup>2</sup> Ceu pui Isarelaux ngia ka Mose mai Arun mai pui hun Isarelaux ngia ka Mose mai Arun mai pui hun khawmuik ah nin ka kiex, "Yix mhawm ti yum ka haktiex Ejiptux, phan ang mawh nan, yix mhawm ti yum ka dauh tiag! <sup>3</sup> Simiang Siyiex lai viex yix hoek ka haktiex in, sonsang yum yix ka lawm vaid yuh ka mawx? Moeng yix, kawn praix yix tak sang kham krax pa giexlaung, yix deeh ing ka meung Ejiptux ang lheu mhawm lie?" <sup>4</sup> Kix ralai ah nin ka paox tix, "Kieh ex laug cao kaing tix kaux mai deeh ingka meung Ejiptux." <sup>5</sup> Mose mai Arungupti ka plak sivoie ngai pui hun ceu pui Isarelaux pa kum paox tix. <sup>6</sup> Yawsux kawn simex Nun mai Kaliep kawn simex Yephunie pa hoik hu tau sinax pui jiang ka haktiex khankix riah ti tik kraung ceep tix <sup>7</sup> mai krai ah nin ka pui hun ceu pui Isarelaux, "haktiex pa hoik lailing yix ti jiang, mawh haktiex pa kied sidaing mhawm. <sup>8</sup> Phan Simiang Siyiex khawrhawm ka ex, Nawh Cao tak viex ex laig ka haktiex in mai tawx haktiex an dee lih rawm teeih mai rawm hia ka ex. <sup>9</sup> Paw doh tiehfeen ka Simiang Siyiex, paw lhat ka pui ot ka dauh

haktiex an, mawh kheu kix mawh priex ih son ex, krax tiebtie hoik lih hu khaing kix mai Simiang Siyiex ot tau mai ex, paw lhat ka kix.”<sup>10</sup> Pui hun ah nin dheem kiex ka simaox, yam an min pakngai Simiang Siyiex lih bleeh ka daux nyiex gox buan man bang kum ka ceu pui Isarelaax heue.

### **Mose Khioxhaw Son Pui Hun**

<sup>11</sup>Simiang Siyiex ah nin ka Mose, “Mawh sang nunai pui in khankix ka Aux miexgrheeng? mai kix kawng yumrhawm ka Aux, ka mhai pa daoxdeng pa hoik yuh Aux daux sinax kix miexgrheeng?”<sup>12</sup> Aux tak sivied kix ka jhawm saux preng mai deeh tee sinngao an khaing kix, Aux tak kieh maix mawh ceu pui ting riang mai pa ting siawp sibrawm khaing kix.<sup>13</sup> Mose ah nin ka Simiang Siyiex, “Mawh kheu Maix Cao hoik viex pui in khankix lih khaing sinax kix ka siawp sibrawm Maix Cao, khaix an, pui Ejiptux tak mhong ka an<sup>14</sup> mai kix tak kraik ka pui pa ot ka daux haktiex in. Kix hoik mhong koe Maix Cao ka sinax pui in khankix, Simiang Siyiex eue, Maix Cao hoik jhi kix yaox pakngai Tix mai paiawm Maix Cao Maix hoik ot ka piang kix, ponngaix Maix Cao hoik thong kix hu ka rong paiawm mai ponsawm Maix Cao hoik thong kix hu ka rong ngu paiawm.<sup>15</sup> Phan Maix Cao pah ka pui in khankix awm pui tix kaux, pui pa hoik mhong ka min Maix Cao tak ah nin,<sup>16</sup> mawh kheu Simiang Siyiex ang pon viex pui in khankix hu ka haktiex pa hoik tiextu Nawh Cao sonsang tawx ka kix, Nawh Cao tom pah kix ka daux tiag.<sup>17</sup> Aux rawgbuan ka Maix Cao jhi ex yaox ka siawp sibrawm Siyiex, awm lox tawm Maix Cao liak.<sup>18</sup> Simiang Siyiex mawh palang rhawm, mawh pa naog ka krax cauxrhawm mai mawh pa pluatploi phimap, pluatploi krax lud, viang mawh nan, Nawh Cao ang doh deuh pui koe phimap mawh pa ang koe phimap, Nawh Cao deeh viied deeh pawk ka phimap keeing kix tom hoek ka piang kawng praix, tom hoek loe ju pon ju ka doehru kix.<sup>19</sup> Aux khioxhaw rawg mhaing ka Maix Cao pluatploi phimap pui in khankix awm koe krax moh krax

**14:24** Yaw 14:9-12. **14:18** Lih 20:5-6, 34:6, 7, Pi 5:9-10, 7:9-10. **14:13-19** Lih 32:11-14. **14:21-23** He 3:18. **14:24** Yaw 14:9-12.

rhawm pa kied ting Maix Cao mai awm pluatploi Maix Cao ka pui in khankix khaing meung Ejiptux tom hoek yam in.”

### **Krax Ciyang Siyiex Piang Isarelaax**

(Pi 1:34-40)

<sup>20</sup>Simiang Siyiex ah nin, “Aux hoik pluatploi kix awm pa khioxkaw maix,<sup>21</sup> mawh kheu nanawm im ju Aux tete, haktiex tak naog ka min plakngai Simiang Siyiex tete,<sup>22</sup> pui khawmuik pa hoik yaox ka min plakngai Aux mai ka mhai pa daoxam yuh Aux ka meung Ejiptux mai ka daux tiag, kawng cheukcheu ka Aux tom kao bawng mai ang nyang cu nghiet ka lox Aux,<sup>23</sup> kix tak ang yaox ka haktiex pa hoik tiextu Aux ka keeing kix, pui khawmuik pa nunai ka Aux, tak ang yaox haktiex an tix kaux kawx.<sup>24</sup> Viang mawh nan, phan mawh kawncaw Aux Kaliep, kheu koe khuan pa tang siyox ka daux nawh mai hawt khaix Aux jheengiheeng, Aux tak viex nawh laig ka daux haktiex dee hoik hu nawh mai doehru nawh tak pon ka sinngao an.<sup>25</sup> Cub pui Amaliet mai cub pui Khanan pa ot ka daux ngawd, pasax pex tak veeh ti hu ka daux tiag ka krax hu ka rawm sigrit sigra raoh heue.”

### **Kham Geu Krax Yum**

<sup>26</sup>Simiang Siyiex ah nin ka Mose mai Arun,<sup>27</sup> “Aux kawng yaox ti gun yeung ka pa ngia pui hun pa caox inkix miexgrheeng? Aux hoik mhong pa ngia mai pa deuh pui Isarelaax phimap ka Aux.<sup>28</sup> Kraik ka kix, Simiang Siyiex ah nin, awm im ju Aux, Aux tak yuh an awm mhong Aux pa kraik pex.<sup>29</sup> Tokaux yum pex pa ngia ka Aux, tak tik ka daux tiag in mai can pex pa hoik simin tix, awm pa koe pex khawmuik, jah ka pa koe ju tixnga num haok plak piang,<sup>30</sup> tak ang yaox ti laig daux haktiex tiextu Aux ti tawx ka pex, lheu khaing Kaliep kawng simex Yephunie mai Yawsux kawng simex Nun.<sup>31</sup> Viang mawh nan, kawng nyawm iak pex, pa hoik ah pex mawh pa sang kham pa giexlaung, Aux tak viex kix laig mai kix tak tawng ka haktiex pa seeing pex kah.<sup>32</sup> Phan mawh son pex, tokaux yum pex tak tik daux tiag.<sup>33</sup> Kawng praix pex tak mawh cao liang yung ka daux tiag tixpon nun mai kham geu son krax pa ang pex yumrhawm, tom hoek bawgyam tik ka tokaux yum pex ka

daux tiag.<sup>34</sup> Awm bawgyam hu jiang pex ka haktiex an tixpon ngaix, tix ngaix tak deuh mawh tix num, pex tak yaox ti kham geu phimap yuh tix tixpon num mai pex tak tawng krax pa tikvud Aux pex.<sup>35</sup> Aux Simiang Siyiex hoik ah nin, Aux tak yuh ceu in tete ka pui hun pa caox caig pa khrawm paox ti tiehfeen ka Aux, kix tak lauxleeing mai kix yum ka daux tiag in.”<sup>36</sup> Pui pa deeh hoek pa hoik ploi Mose hu jiang ka haktiex an, krai grawng pa caox khaing haktiex an mai kieh pui hun khankix ngia mai tiehfeen ka Mose,<sup>37</sup> pui khankix pa viex grawng pa caox khaing haktiex an, tak yum ka saux preng plak sivoie ngai Simiang Siyiex.<sup>38</sup> Viang mawh nan, can kix pa hu jiang ka haktiex, pa kawm im ju, mawh Yawsux kawm simex Nun mai Kaliep kawm simex Yephunie heue.

### ***Grawng Yum Pui Jiang Kao Kaux***

(Pi 1:41-46)

<sup>39</sup>Mosekraigumloxinkapui Isarelaxkhankix mai pui khankix kied ngia kah.<sup>40</sup> Kix kaoh ponngawb caocao mai haok ka piang choek gawng ah nin, “Jhak heue, yix ot tin, yix tak hu ka dee pa hoik yuh Simiang Siyiex sijax mukheu, mawh kheu yix hoik lud.”<sup>41</sup> Mose deeh ah nin, “Yuh patix pex lud ka lox tawm Simiang Siyiex, mawh kheu in pex tom ang chix pon krax pa pex kah.<sup>42</sup> “Paw vi hu, pex tak somnai sivoie pui koeng pex khankix, mawh kheu Simiang Siyiex ang ot sinax pex heue.<sup>43</sup> Mawh kheu ceu pui Amaliet mai ceu pui Khanan hoik ot sivoie pex mai pex tak goh ka lawm vaid, kheu jao hoik veeh pex tix khaing pa hawt tix Simiang Siyiex, Simiang Siyiex tak ang ot tau mai pex.”<sup>44</sup> Kix kawm viex rhawm kua ti haok ka piang choek gawng, viang mawh nan teug buan sijax mukheu Simiang Siyiex mai Mose ang lai lih khaing nyiex bang.<sup>45</sup> Khaix an, ceu pui Amaliet mai ceu pui Khanan pa ot ka piang gawng lih puing kix mai pheet kix, tom hoek ka veng Hawma heue.

### **15 *Krax Tan Nghox Ca Mai Pa Nyaux***

Simiang Siyiex ah nin ka Mose,<sup>2</sup> “Krai ka pui Isarelax khankix, yam hoek pex ka daux haktiex pa ot tix pa tawx Aux ka pex,<sup>3</sup> pex

14:33 Kawm 7:36.

tak yuh krax tan ka Siyiex, pa mawh krax tan pa yuh ka ngu angah, krax tan pa gleeing angah, krax tan pa appong angah, sonsang grumnaog krax tan pa kham lox sijax pex, awm krax tan pa koe rhawmrhi pex angah mai pawie pa hoik tat ti deuh khankix sonsang mawh krax tan pa sioe bhawng pa khawrhawm Siyiex, khaing mawie mhaing mai pex mhaing angah, yung mhaing angah,<sup>4</sup> nawh tak viex krax tan tix hoek ka Simiang Siyiex, pa mawh krax tan ceu pa ih kao son tix son khaing tix epha mai phawng nghox ca ceu pa mhawm, pa hoik klao ti tau ka bee pon son tix son khaing tix heng<sup>5</sup> mai rawm plix siiet pon son tix son khaing tix heng, son krax tan pa nyaux, maix tak khre tau mai krax tan pa gleeingangah, krax tan pa appong angah, son kawm yung ku mu heue.<sup>6</sup> Son yung mhaing, maix tak khre awm krax tan ceu pa ih kao son ra son khaing tix epha, phawng nghox ca ceu pa mhawm pa klao ti tau mai bee loe son tix son khaing tix heng,<sup>7</sup> son krax tan pa nyaux, maix tak tan rawm plix siiet loe son tix son khaing tix heng, son krax tan pa sioe bhawng ka Simiang Siyiex.<sup>8</sup> Yam khre maix mawie mhaing tix mu son krax tan pa gleeing, phan ang mawh nan, son krax tan pa appong, sonsang grumnaog krax pa kham lox sijax pex, phan ang mawh nan son krax tan pa nhim ka Simiang Siyiex.<sup>9</sup> Maix tak viex ti tan ceu pa ih loe son tix son khaing tix epha, khaing phawng nghox ca im ceu pa mhawm, pa kluklao ti tau mai bee tix plakheng tau mai mawie mhaing tix mu<sup>10</sup> mai pex tak viex rawm plix siiet son krax tan pa nyaux tix plak heng, pa mawh krax tan pa gleeing ka ngu pa sioe bhawng pa khawrhawm Siyiex.<sup>11</sup> Maix tak yuh awm in ka mawie mhaing angah, yung mhaing angah, son kawm yung iak angah, son kawm pex mhaing ku mu angah.<sup>12</sup> Awm diag koe tobrie pa khre pex ti deuh, mawh kheu nan pex tak yuh tau awm diag pa koe an ku mu.<sup>13</sup> Can pui haktiex khawmuik, yam yuh krax tan pa gleeing ka ngu, pa mawh krax tan pa sioe bhawng ka Simiang Siyiex,<sup>14</sup> phan nyosinie hoek ti peung tau mai pex, phan ang mawh nan pui tix kauxkaux pa ot daux sinax doehru pex,

phan nawh simie ti yuh krax tan pa gleeing ka ngu pa mawh krax tan pa sioe bhawng ka Simiang Siyiex, kieh kix yuh awm pa yuh pex.<sup>15</sup> Been pa deuh pex son pui hun mai son nyosinie tak mawh tix ceu khaing mai been pa caw pex ti priex ka dauh doehru tix leeingju, mawh pa yuh ka mawx ka pex tak kieh awm an ka nyosinie sivoie Simiang Siyiex.<sup>16</sup> Caw ti koe lox tat jhawm prawng mai lox been tix mu khaing son nyosinie pa hoek ti peung tau mai pex heue.”<sup>17</sup> Simiang Siyiex ah nin ka Mose,<sup>18</sup> “Krai ah nin ka pui Isarela, yam hoek pex ka dauh haktiex pa viex Aux pex hoek,<sup>19</sup> yam ih pex priex ka dauh haktiex an, pex tak caw tix viex krax tan pa yaogyaw ka Simiang Siyiex.<sup>20</sup> Pex tak yuh blah tix khlawp khaing nghox ca pa liang ti pon, kieh mawh krax tan pa yaog, awm krax tan pa yaog khaing glah nghox, maix tak caw ti tan awm an.<sup>21</sup> Pex tak tawx nghox ca pa liang ti pon ka Simiang Siyiex, sonsang mawh krax tan pa yaog khaing doehru pex leeingju heue.

#### ***Lox Tat Son Phimap Pa Ang Yuh***

<sup>22</sup> Phan pex lud ka dauh pa ang bak ti yuh mai ang pon hawt yuh awm lox tawm pingnyap in khawmuik, pa hoik krai Simiang Siyiex ka Mose,<sup>23</sup> awm lox pa hoik tawm Simiang Siyiex ka pex khaing Mose khawmuik, jah ka singaix tawx Simiang Siyiex lox tawm pingnyap ka doehru pex khankix leeingju,<sup>24</sup> phan pui kawn lud ka dauh pa ang bak ti yuh mai ka dauh pa ang pui hun koe krax tawng mai pui hun khankix tak tan kawm mawie mhaing tix mu, son krax tan pa gleeing, pa sioe bhawng pa khawrhawm Siyiex tau mai krax tan ceu pa ih mai krax tan pa nyaux mai kawm pex mhaing tix mu son krax tan pa pluatploi phimap awm pa koe been.<sup>25</sup> Cao giex kaing li tak yuh krax khioxkhaw son pui hun ceu pui Isarela khawmuik mai kix tak pon krax pluatploi, kheu mawh pa ludloe, kix tak viex krax tan tix, krax tan pa gleeing ka ngu ka Simiang Siyiex mai krax tan son phimap kix ka plak sivoie ngai Simiang Siyiex, son phimap pa lud kix.<sup>26</sup> Pui hun Isarela khawmuik mai nyosinie

15:16 Krub 24:22. 15:27-28 Krub 4:27-31.

pa peung sinax kix tak pon krax pa pluatploi, mawh kheu pui khawmuik hoik lud ka dauh pa ludloe tix.<sup>27</sup> “Phan pui tix kaux lud ka dauh pa ludloe tix, nawh tak tan pexshiang naog num tix mu, son krax tan pa pluatploi phimap.<sup>28</sup> Cao giex kaing li tak yuh krax pa khioxkhaw sivoie Simiang Siyiex son pui pa lud ka dauh pa ludloe, yam yuh nawh phimap pa ang bak ti yuh mai yuh pa khioxkhaw son nawh mai nawh tak pon krax pa pluatploi.<sup>29</sup> Maix tak deuh lox tat jhawm prawng tix mu ngie son pui pa lud ka dauh krax pa ang bak ti yuh tix ceuceu, son ceu pui Isarela mai son nyosinie pa hoek peung sinax pex heue.

#### ***Lox Tat Son Phimap Pa Su Ti Yuh***

<sup>30</sup> Phan pui tix kaux kaux kuarhawm tix lud, pa mawh pui haktiex an mai nyosinie angah, yuh pa ang khaw ang jiet ka Simiang Siyiex, tak teei ti tik pui an khaing sinax ceu pui nawh.<sup>31</sup> Mawh kheu hoik nunai nawh ka lox Simiang Siyiex mai yieh laux ka lox tawm pingnyap Nawh Cao, tak teei ti tik ka kaw an, phimap nawh tak koe ka piang nawh heue.”

#### ***Ciyang Ka Pui Lud Singaix Tuah***

<sup>32</sup> Yam kawm ot pui Isarela khankix ka dauh tiag, kix yax pui tix kaux kraix khix singaix tuah.<sup>33</sup> Pui pa yax ka pui pa kraix khix, viex nawh hoek ka Mose mai Arun mai ka cub pui hun.<sup>34</sup> Kix laung nawh, kheu ang kix nyang tawng pa sang yuh tix ka nawh.<sup>35</sup> Simiang Siyiex ah nin ka Mose, “Tak kieh pui an yum tete, cub pui hun tak dheem nawh ka simaox ka plak praix nyiex bang.”<sup>36</sup> Awm gumlox pa hoik tawm Simiang Siyiex ka Mose, cub pui hun viex nawh lih plak praix nyiex bang mai dheem nawh yum ka simaox heue.

#### ***Grawng Ciem Sibex Dhah***

<sup>37</sup> Simiang Siyiex ah nin ka Mose,<sup>38</sup> “Krai ka pui Isarela khankix, kieh kix yuh ciem tai sibex hawtdaog sibex ceep tix, tom sidah ju ru kix mai sonsang sau ciem tai keei klai raoma hawt daog sibex ku daog.<sup>39</sup> Yam jhak pex ka ciem tai sibex an, sonsang mawh pa dohkeud ka lox tawm pingnyap Simiang Siyiex mai son ang pex sang hawt yuh awm alo rhawm rhi tokaux tix mai awm pa khaw ka ngai pex, awm pa hoik sax lud pex.



<sup>40</sup>Sonsang dohkeud pex mai hawt yuh awm lox tawm pingnyap Aux khawmuik mai mawh pui pa singax ka son Siyiex pex. <sup>41</sup>Aux mawh Simiang Siyiex pex, pa hoik viex pex lih khaing meung Ejiptux sonsang mawh Siyiex pex, Auxmawh Simiang Siyiex pexheue.

**16** *Pa Tiehfeen Ka Mose Mai Arun*  
 Yam in, Korax kawn simex Izaha mai kawn simex Kawhat, kawn simex Lewix tau mai Datan mai Abiram kawn simex Eliabax mai Awnax kawn simex Peliet mai kawn simex Rubin kok pui khankix hu tau <sup>2</sup>mai pui Isarelaix tixblah mai cao kaing cub pui hun pa laug kix pa ao min ra yieh tixphan kaux khaing daux pui hun, yaog tix cung mai tiehfeen ka Mose. <sup>3</sup>Kix khrawm paox tix, sonsang tiehfeen ka Mose mai Arun mai kix ah nin ka kiex, "Kaing yuh pax kied sidaing kin, mawh kheu pui hun khawmuik mawh pa singax singeh kukaux mai Simiang Siyiex ot sinax kix, yuh ka mawx pax lai kawn sang yuh ti ting ka piang cub pui hun Simiang Siyiex?" <sup>4</sup>Yam mhong Mose grawng in nawh gup ngai baoh tix, <sup>5</sup>nawh sikah ka Korax mai cub paox nawh khankix ah nin, "Daux ponngawb pasax, Simiang Siyiex tak jhi pui mawx mawh pui Nawh Cao mai mawh pui mawx pa singax singeh tak kieh nawh hoek dex Nawh Cao kah, mawh pui mawx pa sang laug Nawh Cao kah, Nawh Cao tak kieh kix hoek dex ka Tix. <sup>6</sup>Korax mai paox cub maix khawmuik eue, yuh awm in, viex pan ngu hoek, <sup>7</sup>daux pasax sau ngu mai nyawng bhawng ka daux an sivoie Simiang Siyiex mai pui pa laug Siyiex ka nawh tak mawh pa singax singeh. Kawn simex Lewix khankix eue, kaing pa yuh pex sidaing kin." <sup>8</sup>Mose ah nin ka Korax, "Pex pa mawh kawn simex Lewix khankix eue, nghiet Yam in,, <sup>9</sup>pa goih Simiang Siyiex Isarelaix pex khaing pui hun Isarelaix, sonsang viex Nawh Cao pex hoek dex tokaux Tix, sonsang yuh pex kaing jhaw nyiex gox buan man Simiang Siyiex mai pex cung plak sivoie ngai pui hun, mai pex yuh kaing jhaw son kix, keud pex mawh kaing pa iak lie, <sup>10</sup>Nawh Cao hoik viex pex hoek dex ka tokaux Tix, maix mai khawm pux aik maix pa mawh kawn ceucad Lewix tau mai maix ang mawh

lie? Pex kawn sawg ka ara cao giex kaing li lie? <sup>11</sup>Mawh kheu nan maix mai paox cub paox caw maix khankix, hoik khrawm paox tix yuh krax pa tiehfeen ka Simiang Siyiex. Arun mawh pui yuh ka mawx, pex lai ngia mai tiehfeen ka nawh?" <sup>12</sup>Mose ploi pui hu kok ka Datan mai Abiram, kawn simex Eliabax mai kix ah nin, "Yix tak ang hoek, <sup>13</sup>pa hoik viex maix yix lih khaing haktiex pa lih rawm teeih mai rawm hia sonsang pah ka yix daux tiagmai sonsang yaog maix ti yuh cao kaing ka piang yix, kawn keut maix mawh pa iak lie?" <sup>14</sup>Lheu khaing an maix ang tie viex yix laig ka haktiex lih rawm teeih mai rawm hia mai ang tie tawx yix cie sinngao, ma kaung mai sipeem plix siiet khankix. Mawh sang koik maix ti teei sok ngai pui inkix lie? Yix ang hoek." <sup>15</sup>Mose kied song rhawm ah nin ka Simiang Siyiex, "Paw lai rieb ka krax tan kix, aux ang sax teei la khaing kix tix mu kawx mai ang sax yuh pa kin ka kix tix kauxkawx." <sup>16</sup>Mose ah nin ka Korax, "Pasax maix viex paox cub paox caw maix, maix khawm kix tau mai Arun hoek sivoie ngai Simiang Siyiex, <sup>17</sup>teei pan pex kukaux mai sau nyawng bhawng ka daux an mai viex hoek ka plak sivoie Simiang Siyiex, pa mawh pan ra yieh tix phuan mu, maix mai Arun kawx, tak hoek tau mai pan tix, tix kaux tix mu." <sup>18</sup>Mawh kheu nan pui kukaux teei pan cie tix mai sau ngu mai nyawng bhawng ka piang an mai cung hawt diang siviex nyiex buan man bang kum tau mai Mose mai Arun. <sup>19</sup>Korax khrawm cub pui hun khankix, sonsang yuh kix krax tiehfeen hawt diang siviex nyiex gox buan man bang kum. Min plakngai Simiang Siyiex lih bleeh ka piang cub pui hun. <sup>20</sup>Simiang Siyiex sikah ka Mose mai Arun ah nin, <sup>21</sup>"Yoi tokaux tix khaing sinax cub pui hun in, sonsang yuh Aux kix lauxleeing daux tivud khaing. <sup>22</sup>Kiex gup pakngai tix ah nin, "Siyiex eue, Siyiex pa mawh ju khuan ka piang nexnham kawn pui khawmuik, kheu jao phimap pui tix kaux mai Maix Cao song rhawm ka cub pui hun khawmuik lie?" <sup>23</sup>Simiang Siyiex ah nin ka Mose, <sup>24</sup>"Krai ka pui hun ah nin, lih hu singai khaing dee ot Korax, Datan mai Abiram."

<sup>25</sup> Mose kraih ah nin ka Datan mai Abiram mai kuad song pui Isarela x hawt khaix nawh. <sup>26</sup> Mose kraih ah nin ka pui hun, "Lih hu khaing nyiex gox pui pa caox caig inkix, paw doh hu kro x hu teeh ka kraung khrai kix tix ceu kawx, ha pex kox lauxleeing tau mai phimap kix." <sup>27</sup> Mawh kheu nan kix lih hu dee singai khaing dee ot Korax, Datan mai Abiram, Datan mai Abiram hoek cung ka siviex nyiex gox kix tau mai moeng kix, kaw n simex kix mai kaw n nyawm iak kix. <sup>28</sup> Mose ah nin, "Pextak tawng ka hoik ploi Simiang Siyiex aux yuh ceu in, ang lai mawh pa yuh aux hawt alo tix. <sup>29</sup> Phan pui inkix yum awm been yum kaw n pui khawmuik angah mai phan kix ya ox ti kham geu awm koe been pui khawmuik, Simiang Siyiex ang tau ti ploi aux hoek. <sup>30</sup> "Viang mawh nan, phan Simiang Siyiex sang phan ceu pa khraox tix ceu mai tiex tak ang dau x jheeh tix mai bleet ka kix tau mai can pa koe kix khawmuik mai kix tak laig ka dau x meung yum khawm tokaux im tix, pex tak tawng mawh pui inkix, pa hoik map ka Simiang Siyiex." <sup>31</sup> Khaix hoik ah nawh nan, tiex greem dee ot kix hoik bih, <sup>32</sup> tiex ang jheeh tix mai bleet kix tau mai khawm nyiex khawm kraung khrai cie pui Korax khawmuik, <sup>33</sup> mawh kheu nan, kix mai can pa koe kix khawmuik laig ka dau x meung yum khawm tokaux im tix, mai tiex deeh nyee p tix ka piang kix mai kix lauxleeing khaing sinax cub pui hun. <sup>34</sup> Pui Isarela x pa ot hawt vungviang kix, to khawm yi em tix mai kix ah nin, "Tiex tee sang bleet ka ex khawmuik nieh!" <sup>35</sup> Ngu lih hoek khaing Simiang Siyiex maigleeing kapui patan nyawng bhawng ra yieh tix phuan kau x. <sup>36</sup> Simiang Siyiex ah nin ka Mose, <sup>37</sup> "Kraih ka Eliaza kaw n simex Arun cao giex kaing li, sonsang deeh sut nawh pan ngu khaing dee gleeing ngu mai prungprang ga ox ngu singai khaing pa ox tix, mawh kheu nan pan ngu an mawh pa singax. <sup>38</sup> Pan ngu cie pui pa lud tom som ju tix mai taw k mawh khliep plah tawng sonsang mawh daw b taw b son khu dee tan, sonsang tan an sivo e Simiang Siyiex, mawh kheu an mawh pa singax mai tak mawh mhairug son pui Isarela x khankix."

<sup>39</sup> Eliaza cao giex kaing li teei pan ngu tawng, pa hoik gleeing ti khaing pui pa tan khankix mai kix taw k mawh khliep plah tawng sonsang taw b ka khu dee tan. <sup>40</sup> Sonsang mawh kra x pa dohkeud son ceu pui Isarela x khankix mai son ang pui tang kau x pa ang mawh doehru Arun yuh cao giex kaing li mai son ang pon gleeing nyawng bhawng ka plak sivo e Simiang Siyiex, ha kox lih awm Korax mai pa ox cub pa ox caw nawh, awm pa hoik kraih Simiang Siyiex ka Eliaza khaing pa hoik tawm ka Mose heue.

### *Pa Ngia Pui Khankix*

<sup>41</sup> Ka dau x pasax pui hun Isarela x khankix, ngia tiehfeen ka Mose mai Arun ah nin, "Pax hoik pah ka pui Simiang Siyiex." <sup>42</sup> Yam khrawm cub pui hun khankix pa ox ti tiehfeen ka Mose mai Arun, kix veeh ngai tix plak sivo e nyiex gox buan man bang kum, jhak heue, paiawm lih kheem ka piang nyiex gox buan man mai min plakngai Simiang Siyiex lih bleeh. <sup>43</sup> Mose mai Arun hoek sivo e nyiex gox buan man bang kum <sup>44</sup> mai Simiang Siyiex ah nin ka Mose, <sup>45</sup> "Lih hu singai khaing sinax pui hun inkix, sonsang yuh Aux kix lauxleeing dau x tivud khaing." Kiex gup pakngai tix. <sup>46</sup> Mose ah nin ka Arun, "Te ei pan ngu cie maix mai sau ngu pa koe ka piang khu dee tan mai sau nyawng bhawng ka piang an mai viex hoek phaiphai ka pui hun sonsang yuh kra x khio x khaw son kix, kheu hoik lih kra x song rhawm khaing Simiang Siyiex, jhawm saux preng hoik hoek." <sup>47</sup> Arun teei pan ngu awm lox pa kraih Mose mai to sinax pui hun khankix, jhak heue, jhawm saux preng hoik jah ti lih sinax pui hun, nawh sau nyawng bhawng ka dau x an mai yuh kra x khio x khaw son pui khankix. <sup>48</sup> Nawh cung sinax pui yum mai pui im khankix mai jhawm saux preng yi en. <sup>49</sup> Ang sawn pui pa yum ka grawng pa yuh Korax, can pui pa yum ka jhawm saux preng koe tix mheen pon rheng aliah yieh kau x. <sup>50</sup> Yam hoik yi en jhawm saux preng, Arun deeh ing ka Mose hawt diang siviex nyiex gox buan man bang kum heue.

## **17** *Khao x Grix Arun*

Simiang Siyiex ah nin ka Mose, <sup>2</sup> "Kraih ka pui Isarela x mai teei khao x grix khaing

nyiemxa keeing kix, tix cub tix gawng, teei khaox grix kao ra gawng, khaing cao kaing kix khawmuik, awm pa koe nyiemxa keeing kix, tiem ti deuh ceukaux pui kukaux ka piang khaox grix kix, <sup>3</sup> tiem ceukaux Arun ka piang khaox grix ceucad Lewix. Mawh kheu doeh nyiemxa keeing kix tak caw tix koe khaox grix tix nyiex tix gawng. <sup>4</sup> Maix tak deuh an khankix ka dauh nyiex gox buan man bang kum, sivoe teug buan sijax mukheu ka dee sipub Aux ka pex. <sup>5</sup> Khaox grix pui pa laug Aux, tak pruh tai, mawh kheu nan Aux tak kieh lox ngia pa tiehfeen pui Isarelax khankix ka maix yien.” <sup>6</sup> Mose kraik ka pui Isarelax khankix mai cao kaing kix kukaux tawx khaox grix tix ka nawh son cao kaing kukaux tix kaux tix gawng, awm koe nyiemxa keeing kix, koe kao ra gawng mai khaox grix Arun koe sinax khaox grix cie kix. <sup>7</sup> Mose deuh khaox grix an khankix ka plak sivoe Simiang Siyiex ka dauh nyiex gox buan man teug buan sijax mukheu. <sup>8</sup> Ka dauh singaix pasax, Mose laig ka dauh nyiex gox buan man dee koe teug buan sijax mukheu, jhak heue, khaox grix Arun, khaing nyiemxa ceucad Lewix hoik glaoh lhax, lih tix koe tux, pruh tai mai lih ti koe plix khaox Batan pa teem. <sup>9</sup> Mose viex khaox grix khankix lih khaing plak sivoe Simiang Siyiex ka pui Isarelax khawmuik, mai kix jhak ti yaox mai pui kukaux tang deeh teei khaox grix cie tix. <sup>10</sup> Simiang Siyiex ah nin ka Mose, “Deeh viex khaox grix Arun mai deuh plak sivoe teug buan sijax mukheu sonsang priex mawh mhairug son pui pa tiehfeen khankix sonsang pon kieh maix krax pa ngia pa tiehfeen kix ka Aux grai, son ang kix yum.” <sup>11</sup> Awm pa hoik tawm Simiang Siyiex ka nawh, nawh yuh awm an, <sup>12</sup> pui Isarelax khankix ah nin ka Mose, “Jhak heue, yix hoik lauxleeing. Yix hoik grai grup, yix hoik grai grup heue. <sup>13</sup> Can pui pa hoek dex nyiex gox buan man Simiang Siyiex kukaux tak yum, mawh tak sang yaox yix ti lauxleeing khawmuik lie?”

17:8-10 He 9:4.

### *Beeh Glawmlewix*

**18** Simiang Siyiex ah nin ka Arun, “Maix mai kawn simex maix khawm nyiex ma keeing maix pa ot tau mai maix tak yaox ti klawm phimap pa dexdawd mai dee pa singax singeh, maix mai kawn simex pa ot tau mai maix khankix takyaox ti klawm phimap grawng pa yuh cao giex kaing li. <sup>2</sup> Viex puxaik maix khankix pa mawh doehru pui Lewix mai doehru keeing maix hoek ka maix, sonsang kleuk kix ti tau mai maix mai yuh kaing jhaw tau mai maix, yam ot maix mai kawn simex maix khankix sivoe nyiex gox buan man teug sijax mukheu. <sup>3</sup> Kix tak yuh canceu pa lo maix mai canceu pa lo son nyiex gox buan man khankix. Kix tak ang pon ti hoek dex ka kraung khrai dee singax singeh ka khu dee tan, phan ang mawh nan kix mai maix tak yum. <sup>4</sup> Kix tak kleuk ti tau mai maix mai yuh kaing jhaw nyiex gox buan man bang kum, son kaing jhaw nyiex gox buan man khawmuik mai pui tang kaux tak ang pon ti hoek dex pex. <sup>5</sup> Maix tak yaox ti teei beeh glawm priex dee pa singax mai beeh glawm khu dee tan, son ang pa song rhawm lai sang baox lih ka piang pui Isarelax. <sup>6</sup> Jhak heue, Tokaux Cao Aux hoik teei puxaik maix khankix, ceucad Lewix khaing dauh sinax pui Isarelax, kix mawh totaix pa hoik tawx Simiang Siyiex ka maix sonsang yuh kix kaing jhaw nyiex gox buan man bang kum. <sup>7</sup> Maix mai kawn simex maix khankix tak yuh kaing jhaw beeh glawm cao giex kaing li pa dex mai khu dee tan khawmuik mai pa koe plak dauh man tie, maix tak yuh kaing jhaw an. Aux tawx totaix ara cao giex kaing li ka maix mai pui tang kaux pa hoek dex tan, tak pah yum heue. <sup>8</sup> Siyiex ah nin ka Arun, “Jhak heue, khaing dauh can pa hoik tan pui Isarelax ka Aux pa hoik kieh singax khawmuik, Aux tak ap ti tawx ka dauh taix maix sonsang mawh lox pingnyap leeingju son maix mai son kawn simex maix khankix heue.

### *Krax Tan Son Cao Giex Kaing Li*

<sup>9</sup> In tak mawh cie maix ka dauh pa kied singax singeh khaing pa ang nyang gleeing ka ngu, krax tan kix kuceu pa mawh krax tan ceu pa ih mai krax tan pa pluatploi

phimap, krax tan pa lud ka Siyiex pa mawh krax tan kix ka Aux, tak mawh pa kied singax son maix mai kawn simex maix khankix. <sup>10</sup>Maix tak ih an khankix ka dee pa kied singax singeh, simex kukaux tak ih ka an, an tak mawh pa singax ka son pex. <sup>11</sup>In baox mawh cie maix. Krax tan pa yaog khaing daux totaix kix, tau mai krax tan pa yangyeuh cie kawn praix Isarelax khankix, Aux tak tawx an khankix son maix khawm son kawn simex kawn sibun maix, pakoe tau mai maix, awm beenli pingnyap leeingju, pui pa singax singeh kukaux khaing daux nyiexma maix, tak pon ti ih. <sup>12</sup>Khaing daux bee pa mhawm khawmuik, khaing daux rawm plix siiet pa mhawm khawmuik, khaing nghox ca khankix mai plix khaox pa liang ti pon khankix pa tawx kix ka Simiang Siyiex, Aux hoik tawx ka maix. <sup>13</sup>Plix khaox pa liang ti teem khaing daux haktiex kix khawmuik, pa viex kix hoek ka Simiang Siyiex, tak mawh cie maix, pui pa singax singeh khaing daux nyiexma maix kukaux, tak pon ti ih. <sup>14</sup>Canceu pa hoik tiextu kix ti tan ka daux ceu pui Isarelax khankix, tak mawh cie maix. <sup>15</sup>Canceu pa liang ti keh khaing daux khawmuik pui angah, tobrie angah, pa tan kix ka Simiang Siyiex, tak mawh cie maix, viang mawh nan, kawn Ai plix num pa keh khaing pui maix tak deeh taoh kah mai tobrie pa liang ti keh pa ang singax khankix kawx maix tak deeh taoh kah. <sup>16</sup>Yam hoik naog ju kix tix khix, maix caw ti deeh taoh ka kix awm pa hoik tat maix jum ka mau shekhe pa singax phuan plah, pa sidu ngai jiang ka mau tix shekhe mawh tixnga kerax. <sup>17</sup>Viang mawh nan kawn mawie pa liang ti keh angah, yung pa liang ti keh angah, kawn pex pa liang ti keh angah, maix tak ang pon ti deeh taoh, an khankix mawh pa singax. Maix tak phruah nham kix ka piang khu dee tan mai gleeing khlawp bee khankix son krax tan pa gleeing ka ngu pa sioe bhawng pa khawrhawm Simiang Siyiex, <sup>18</sup>nex nawh khankix tak mawh cie maix, nex eek pa yangyeuh mai ba dawm tak mawh cie maix.

<sup>19</sup>Krax tan pa singax singeh pa viex pui Isarelax ka Simiang Siyiex khawmuik, Aux hoik tawx ka maix, ka kawn simex, kawn sibun pa ot tau mai maix, awm lox been pingnyap leeingju. An mawh sijax mukheu leeingju pa hoik tiag ti awm kih, ka plak siove Simiang Siyiex mai ka son maix mai son doehru maix leeingju. <sup>20</sup>Simiang Siyiex ah nin ka Arun, "Maix tak ang pon ti koe sinngao ka daux haktiex kix, maix tak ang pon ti koe nyum khaing sinax kix. Aux mawh son plak cie maix mai sinngao cie maix khaing sinax pui Isarelax heue.

### ***Kao Son Tix Son Ka Lewix***

<sup>21</sup>Aux hoik tawx sinngao cie pui Isarelax kao son tix son ka ceucad Lewix, sonsang pon yuh kix kaing jhaw ka daux nyiex gox buan man bang kum. <sup>22</sup>Jah Yam in, pui Isarelax khankix tak ang pon ti hoek dex nyiex gox buan man bang kum, phan ang mawh nan tak yaox ti kham ka phimap tix mai yum ka heue. <sup>23</sup>Viang mawh nan, ceucad Lewix khankix tak yuh kaing jhaw nyiex gox buan man bang kum mai kix tak yaox ti kham ka phimap tokaux tix. An tak mawh lox pingnyap leeingju tom sidah hoek doehru pex, kix tak ang yaox ti pon sinngao ka daux sinax pui Isarelax. <sup>24</sup>Mawh kheu krax tan pui Isarelax kao son tix son pa viex kix ti tan ka Simiang Siyiex, Aux hoik tawx ka ceucad Lewix sonsang mawh sinngao kix, kix tak ang pon ti koe sinngao ka sinax pui Isarelax heue.

### ***Kao Son tix Son Cie Pui Lewix***

<sup>25</sup>Simiang Siyiex kraih ah nin ka Mose, <sup>26</sup>"Kraih ah nin ka ceucad Lewix, yam teei pex krax tan kao son tix son khaing pui Isarelax mai pa hoik tawx Aux mawh sinngao pa sang pon pex khaing kix, ka daux an kao son tix son, pex tak tan ka Simiang Siyiex. <sup>27</sup>Krax tan pa tan pex, pex tak caw ti deuh mawh awm krax tan simie nghox capa kaoh khaing daux glah mai rawm plix siiet pa hoik pon ti khaing dee biiet rawm plix siiet. <sup>28</sup>Awm an, pex tak tan kao son tix son pa pon pex khaing pui Isarelax ka Simiang Siyiex, khaing daux an pex tak tan ka Arun cao giex kaing li. <sup>29</sup>Khaing daux krax tan pa pon pex khankix,

laug nyum pa nie mhawm mai pa singax khaing ka daux kuceu mai tan ka Simiang Siyie. <sup>30</sup>Mawh kheu nan maix ah nin ka pui Lewix, yam laug pex ti tan pa kied mhawm khaing daux an, pa kawm deuk khankix, tak simin ti tawx ka ceucad Lewix, awm pa pon tix khaing glah nghox mai awm rawm plix siiet pa pon tix khaing dee biiet rawm plix siiet, <sup>31</sup> Maix mai kawm nyiexma maix khawmuik tak pon ti ih an kudah, mawh kheu an mawh totaix pa tawx Aux son kaing jhaw pa yuh maix daux nyiex gox buan man bang kum. <sup>32</sup> Khaix hoik tan maix ceu pa kied mhawm khaing daux an maix tak ang yaox ti kham geu phimap mai maix tak ang pon ti kieh krax tan pa singax singeh khaing pui Isarelaax seeing brai, phan ang mawh nan maix tak yum heue.”

### **19** *Been Pa Dexdawd Mai Pa Singax*

Simiang Siyie ah nin ka Mose mai Arun, <sup>2</sup> “In mawh been lox tat jhawm prawng pa tawm Simiang Siyie mai kraik ka pui Isarelaax khankix sonsang viex kix kawm mawie shiang raoh pa loig tix mu, pa ang preeh mai pa ang sax sau iak ka piang. <sup>3</sup> Maix tak tawx an ka Eliaza cao giex kaing li, sonsang teei an lih ka plak praix nyiex gox bang mai pah mawie an sivoe nawh, <sup>4</sup> Eliaza cao giex kaing li, tak teei nham tixblah ka giien taix tix mai phruah nham an sivoe nyiex gox buan man bang kum aliah bawg. <sup>5</sup> Tak gleeing kawm mawie shiang an ka plak sivoe ngai cao giex kaing li mai gleeing hak, nex, nham tau mai roing khawmuik. <sup>6</sup> Cao giex kaing li teei khaox Arit mai rao im krim, man raoh rawt mai taing an khankix ka daux sigreung ngu pa gleeing ka mawie shiang an. <sup>7</sup> Khaix an cao giex kaing li tak sidaux kraung mai heem tokaux tix ka daux rawm, khaix an nawh tak laig ka daux nyiex gox bang mai cao giex kaing li tak mawh pa ang singax tom hoek plakbo. <sup>8</sup> Pui pa gleeing ka an, tak sidaux kraung mai heem tokaux tix ka daux rawm mai nawh tak mawh pa ang singax tom hoek plakbo. <sup>9</sup> Kieh pui pa singax tokaux khrawm ka nyaox kawm mawie shiang

an khankix mai priex an ka plak praix nyiex bang ka dee pa singax mai kix tak priex an son pui hun Isarelaax, sonsang shiao rawm an ti kieh kix singax khaing phimap. <sup>10</sup> Pui pa khrawm nyaox kawm mawie shiang an, tak sidaux kraung tix mai nawh tak mawh pa ang singax tom hoek plakbo, an tak mawh lox pingnyap pa hawt jhawh jheengiheeng son pui Isarelaax mai son nyosinie pa hoek peung ka daux sinax kix. <sup>11</sup> Pui pa hu teeh ka tokaux pui yum tix kaux kaux, tak mawh pa ang singax aliah singaix. <sup>12</sup> Yam hoek daux loe ngaix tix ngaix mai daux aliah ngaix tix ngaix nawh tak kieh tokaux tix singax ka rawm an, phan nawh ang kieh tokaux tix singax yam hoek daux loe ngaix mai daux aliah ngaix tix ngaix, nawh tak mawh pa ang singax. <sup>13</sup> Pui pa hu teeh ka tokaux pui yum tix kaux kaux mai ang kieh tokaux tix singax, nawh mawh pa kieh nyiex gox buan man Simiang Siyie seeing brai mai tak teei ti tik kaw an khaing pui Isarelaax, mawh kheu ang phruah rawm pa kieh singax ka tokaux tix, pa ang singax kawm koe ka piang nawh. <sup>14</sup> “In mawh been lox tat jhawm prawng yam yum pui ka daux nyiex bang. Can pui pa laig ka daux nyiex bang kukaux mai can pui pa ot ka daux nyiex bang kukaux tak mawh pa ang singax ka daux aliah ngaix <sup>15</sup> mai aw pa ang tawb ti deuh ku mu, tak mawh pa ang singax. <sup>16</sup> Can pui pa ot plak praix daux kaung khankix, pa hu teeh ka pui pa yum ka vaid angah, yum ka jhawm saux angah, si-ang pui yum angah, simeeig angah, tak ang singax aliah ngaix. <sup>17</sup> Son kaw pa ang singax an, kix tak teei nyaox kawm mawie shiang pa hoik gleeing tixblah sonsang kieh phimap kix singax, sau tau mai rawm klawng pa lih hu ka piang an ka daux aw, <sup>18</sup> Pui pa singax tak teei rao im krim mai cob ka daux rawm, phruah nawh ka piang nyiex gox bang, ka piang kraung khrai, ka piang pui pa ot baoh tan, ka piang pui pa hu teeh ka si-ang pui yum pa yum ka pah pui, pa yum ka jhawm saux mai ka piang pui pa teeh ka simeeig. <sup>19</sup> Pui pa singax tak phruah ka piang pui pa ang singax daux loe ngaix mai daux aliah ngaix, yam hoek daux singaix aliah, nawh yuh tokaux tix singax, tak sidaux kraung



tix mai heem tix ka rawm, yam hoek plakbo, nawh tak mawh pa singax. <sup>20</sup> "Pui pa ang singax, phan ang nyang yuh tokaux tix singax, tak teei ti tik kaw an khaing sinax pui hun, mawh kheu hoik yuh nawh dee pa singax Simiang Siyiex seeing brai jao ang nawh phruah rawm pa kieh singax ka piang tokaux tix, nawh ang singax. <sup>21</sup> An tak mawh pingnyap pa hawt jhawh kix jheengjheeng. Pui pa phruah rawm singax kawx, tak yaox ti sidaux kraung tix, mai pui pa hu teeh ka rawm singax an, tak mawh pa ang singax tom hoek plakbo. <sup>22</sup> Canceu pa hu teeh pui pa ang singax an tak mawh pa ang singax, mai pui pa hu teeh ka ceu an, tak mawh pa ang singax tom hoek plak bo heue."

## **20** *Krax Lud Mose Baoh Kadeshax*

Cub pui hun Isarelatex khankix hoek ka daux tiag Zin, khix tix mai pui khankix ot baoh Kadeshax, Meriam yum mai kix sipaung nawh tan heue. <sup>2</sup> Mawh kheu rawm nyauxson pui hun khankix ang koe mai kix khrawm paox tix tiehfeen ka Mose mai Arun. <sup>3</sup> Pui khankix deuh phimap ka Mose ah nin, "Yix khaw ti hoik yum, yam yum puxaik yix khankix ka plak sivoie Simiang Siyiex! <sup>4</sup> Maix lai viex cub pui hun Simiang Siyiex hoek ka daux tiag, sonsang yum yix tau mai tobrie tix tin yuh ka mawx? <sup>5</sup> Hoik kieh yix lih khaing meung Ejiptux, sonsang viex yix hoek ka dee pa caox caig in yuh ka mawx? Ka dee in mawh dee ang pon sum simie khaox plix ruh, nhu plix siiet mai plix kla jiang khankix, mai rawm nyaux kawx ang koe." <sup>6</sup> Mose mai Arun lih khaing dee ot pui hun mai hu kadiang siviex nyiex gox buan man bang kum mai kiex gup pakngai tix tan. Min plakngai Simiang Siyiex lih bleeh ka kiex heue. <sup>7</sup> Simiang Siyiex ah nin ka Mose, <sup>8</sup> "Teei khaox grix, kok puxke maix Arun mai khrawm pui hun, tawx loxkarang, kieh tawx rawm plaksivoie ngai kix, maix tak kieh rawm lih son kix khaing daux rang mai tawx rawm nyaux ka cub pui hun mai tobrie kix." <sup>9</sup> Mose teei khaox grix khaing plak sivoie Simiang Siyiex, awm pa hoik tawm Nawh Cao. <sup>10</sup> Mose mai Arun khrawm pui hun tau, plaksivoie rang mai ah

20:2-13 Lih 17:1-7.

nin ka kix, "Pex pa tiehfeen nghiet yam in, mawh sang kieh ex rawm lih son pex khaing daux rang in lie?" <sup>11</sup> Mose yaog taix tix mai lah rang ka khaox grix tix ra bawg, khaix an rawm lih tomnie, cub pui hun mai tobrie cie kix yaox ti nyaux kah. <sup>12</sup> Simiang Siyiex ah nin ka Mose mai Arun, "Mawh kheu ang pax yumrhawm ka Aux mai ang yungyi ka Aux ka plak sivoie ngai pui Isarelatex, pax tak ang pon viex pui hun inkix laig ka daux haktiex pa hoik tawx Aux ka kix." <sup>13</sup> In mawh rawm Meribax, grawh grawng nawh, viang pui Isarelatex yuh simah simaing mai Simiang Siyiex kawx, Nawh kawm jhi pa singax Tix daux sinax kix heue.

## *Pui Edom Thiang Ka Pui Isarelatex*

<sup>14</sup> Yam in, Mose ploi pui cau tix khaing Kadeshax mai hu ka simiang Edom, "Pux maix Isarelatex ah nin, maix tawng ka krax kharhawm pa hoek ka piang yix khawmuik, <sup>15</sup> keeing yix khankix hoik hu ka Ejiptux, yix ot daux meung Ejiptux tom rheeng mai pui Ejiptux khankix hoik tuktiak ka yix mai ka keeing yix khankix, <sup>16</sup> yam riagyo yix ka Simiang Siyiex, Nawh Cao hoik mhong lox yix mai Nawh ploi kawncau Siyiex mai viex yix lih khaing haktiex Ejiptux, yix ot tin ka daux Kadeshax, pa mawh veng pa koe ka sinax mee haktiex maix. <sup>17</sup> Yuh buanson kieh yix tiang ka daux haktiex maix. Yix tak ang tiang ka daux kaung daux sipeem plix siiet mai yix tak ang nyaux rawm khaing rawm daux pex, yix tak sang lawng hu krax tingcie simiang, yix tak ang veh plak dawm, plak goix tom sidah tiang yix ka daux haktiex pa kuang maix." <sup>18</sup> Khaix an simiang Edom ah nin ka nawh, "Pex tak ang pon tiang haktiex aux, phan pex yuh nan, aux tak lih tiebtie pex ka vaid." <sup>19</sup> Pui Isarelatex ah nin ka nawh, "Yix tak hu krax ting, phan yix mai tobrie yix nyaux ka rawm pex, yix tak tawx ngawh son an, kieh ngie yix tiang ti hu ka caong tix nongnong, yix tak ang yuh tang ceu tittix." <sup>20</sup> Nawh ah nin, "Pex tak ang pon ti tiang." Pui Edom hoek ti puing kix tomnie tau mai riang rao krunaing pa ting. <sup>21</sup> Pui Edom thiang ka pui Isarelatex daux mee haktiex tix, mawh kheu

nan pui Isarelaax veeh ti hu singai khaing nawhheue.

### ***Grawng Yum Arun***

<sup>22</sup>Cub pui hun Isarelaax khawmuik lih hu khaing Kadeshax mai hoek ka gawng Hawrax. <sup>23</sup>Simiang Siyiex krai ah nin ka Mose mai Arun ka piang gawng Hawrax hawt mee haktiex Edom, <sup>24</sup>“Arun tak hu ka dee khrawm pui ceu nawh khankix paox tix, mawh kheu nawh tak ang pon ti laig ka dauh haktiex pa tawx Aux ka pui Isarelaax, kheu hoik tiehfeen pax ka gumlox Aux hawt rawm Meribax. <sup>25</sup>Kok Arun mai kawm simex nawh Elaza, viex kiex haok ka piang gawng Hawrax <sup>26</sup>mai peeik kraung ceep Arun mai ceep piang kawm simex nawh Elaza, Arun yum mai hu ka dee khrawm paox ru nawh khankix heue.” <sup>27</sup>Mose yuh ceu an awm lox pa tawm Simiang Siyiex mai kix haok ka piang gawng Hawrax ka plak sivoengai cub pui hun. <sup>28</sup>Mose peeik kraung ceep Arun mai ceep ka piang kawm simex nawh Elaza, Arun yum ka piang choek gawng tan, khaix an, Mose mai Eliaza deeh lih khaing piang gawng. <sup>29</sup>Yam yaox pui hun khankix hoik yum Arun, nyiexma ceu pui Isarelaax khawmuik yiem doe son Arun tixngoe ngaix heue.

### **21 *Pui Khanan Som Gawng Hawma***

Yam mhong simiang Arat ceu pui Khanan pa ot Nekep ka grawng hoek ceu pui Isarelaax khankix ka krax Eтарim, nawh puing ka pui Isarelaax khankix mai giex kix tixblah mawh pui giexlaung. <sup>2</sup>Pui Isarelaax khankix kham lox sijax ka Simiang Siyiex ah nin, “Phan Maix Cao ap kix dauh tawm taix yix, yix tak yuh veng kix lauxlak pakleeing.” <sup>3</sup>Simiang Siyiex nghiet ka lox pui Isarelaax mai ap pui Khanan ka kix mai yuh kix khawm veng kix lauxlak pakleeing, mawh kheu nan tom kok ceukaux dee an mawh Hawma heue.

### ***Grawng Rieang Siuing Tawng***

<sup>4</sup>Kix lih krax khaing gawng Hawrax mai hu ka plak rawm sigrit sigra raoh, sonsang via ka rawbrim haktiex Edom mai kix kied lauxrhawm kheu nu krax. <sup>5</sup>Pui khankix ah

lox tiehfeen ka Siyiex mai Mose, “Kheu maix lai viex yix lih hu khaing meung Ejiptux sonsang yum ka dauh tiag lie? Mawh kheu pa ih mai rawm kawx ang koe, yix hoik seeingka blah pa ang koe jhawm jheet in.” <sup>6</sup>Mawh kheu nan Simiang Siyiex ploi siuing ngu ka sinax pui khankix mai siuing tut ka pui khankix mai pui Isarelaax yum tomnie. <sup>7</sup>Pui khankix hoek ka Mose ah nin, “Yix hoik yuh phimap kheu hoik ah yix lox tiehfeen ka Simiang Siyiex mai maix, yuh buanson rawgbuan ka Simiang Siyiex, sonsang teei Nawh Cao ti tik siuing ngu hu singai khaing yix liak.” Mawh kheu nan Mose rawgbuan son pui khankix. <sup>8</sup>Simiang Siyiex ah nin ka Mose, “Yuh rieang siuing ngu tix mu mai deuh ka piang khaox tix gawng, yam pui pa hoik tut siuing kah, maong ti jhak ka an nawh tak deeh im.” <sup>9</sup>Mawh kheu nan Mose yuh rieang siuing tawng tix mu mai deuh ka piang khaox tix gawng, phan siuing tut ka pui tixkauxkaux, yam maong nawh ti jhak ka rieang siuing tawng an, nawh tak im heue.

### ***Hawrax Tom Hoek Mawbax***

<sup>10</sup>Yam in, pui Isarelaax khankix gah tix mai hu bang ti ot ka Awbok. <sup>11</sup>Kix gah tix khaing Awbok mai bang ti ot ka hawt Iyeabarim ka dauh tiag pa koe see Mawbax ka plak toh. <sup>12</sup>Kix deeh gah tix khaing tan mai bang ti ot dauh ngawd Zariet. <sup>13</sup>Kix deeh gah ti hu khaing tan mai bang ti ot praok rawm klawng Anon ka plak an, pa koe dauh tiag pa kleuk tix dauh mee haktiex Amawrix, mawh kheu rawm klawng Anon mawh mee haktiex Mawbax mai haktiex Amawrix. <sup>14</sup>“Awm pa hoik tiem ti deuh ka dauh phuk lai naing Simiang Siyiex, pa mawh baoh Wahiet dauh Suphax, khawm rawm klawng Anon khankix <sup>15</sup>mai lih ka baoh plak jee tom hoek ka haktiex Arax mai mawh pa koe ka piang mee haktiex Mawbax.” <sup>16</sup>Kix lih khaing tan mai hu ka Berax pa mawh rawm dauh dee hoik krai Simiang Siyiex ka Mose, “Khrawm pui khankix tau, Aux tak tawx rawm ka kix.” <sup>17</sup>Pui Isarelaax khankix ah lairhax, “Rawm dauh eue, kieh rawm maix lih liak! mai rhax lai sonsang lih rawm. <sup>18</sup>“Rawm dauh pa kaong cao kaing mai pa kaong cao thong khankix mai pa hoik kaong

cao prawngsee ka khaox grix tix.” Kix lih khaing daux tiag mai hu ka plak Matanax,<sup>19</sup> lih khaing Matanax hu ka plak Nahalelax mai lih khaing Nahalelax hu ka Bamot,<sup>20</sup> lih khaing Bamot hu ka ngawd mee haktiex Mawbax mai haok ka choek gawng Pisaga, simi tijhak haktiex Yeshimon heue.

### **Grawng Som Simiang Sihon**

(Pi 2:26-37)

<sup>21</sup>Pui Isarelaux ploi kawncaw tix khankix hu ka Sihon simiang Amawrix ah nin,<sup>22</sup> “Kieh yix tiang ka haktiex cie maix, yix tak ang laig ka daux kaung daux sipeem plix siiet pex, yix tak ang nyaux rawm daux pa koe haktiex pex, yix tak lawng hu ka daux krax ting cie simiang tom sidah tiang yix ka daux haktiex pa kuang maix.”<sup>23</sup> Simiang Sihon ang tawx akhuang pui Isarelaux tiang ka mee haktiex tix, nawh khrawm pui tix tau khawmuik mai lih sonsang puing ka pui Isarelaux ka daux tiag mai hoek ka veng Zahat mai puing ka pui Isarelaux.<sup>24</sup> Pui Isarelaux pah simiang an yum ka lawm vaid mai rhim ti teei haktiex cie nawh, jah khaing rawm klawng Anon tom hoek ka rawm klawng Yabok tom singai khaing ceu pui Amon, mawh kheu mee haktiex ceu pui Amon, hoik mawh pa kaux pa cong.<sup>25</sup> Pui Isarelaux khankix rhim ka veng in khawmuik mai pui Isarelaux khankix laig ot ka daux veng pui Amawrix khankix mai ka daux veng Heshabon mai ka daux yaong kix khawmuik.<sup>26</sup> Mawh kheu veng Heshabon, mawh veng ting simiang Sihon ceu pui Amawrix, mawh pui pa puing ka simiang haktiex Mawbax mai rhim haktiex khaing daux taix nawh tom singai hoek ka rawm klawng Anon.<sup>27</sup> Mawh kheu nan, can pui pa ah loxleng khankix ah nin, “Hoek ka veng Heshabon, kieh deeh sum ka an, deeh pang ka veng simiang Sihon.”<sup>28</sup> Ngu lih khaing veng Heshabon, rao ngu khaing veng Sihon gleeing veng Arax mai pa koe daux haktiex Mawbax mai simiang pa kuang dee lhaong hawt rawm klawng Anon.<sup>29</sup> Haktiex Mawbax eue, pex tak kharhawm! ceu pui Khemoshax khankix eue, pex tak lauxleeing! siyiex pex hoik kieh kawm simex pex to tua mai kawm sibun pex khankix mawh pa

giexlaung ka simiang Sihon meung Amawrix.<sup>30</sup> Baox deeh yuh doehru kix laux, jah ka veng Heshabon tom hoek ka veng Dibun, khaix an baox deeh yuh kix laux jah ka veng Nawpha tom hoek ka veng Medabax.”<sup>31</sup> Mawh kheu nan, ceu pui Isarelaux khankix yaong ti ot ka daux haktiex ceu pui Amawrix khankix.<sup>32</sup> Mose ploi cao jiang hu ka veng Yaza mai kix rhim nyiex yaong khankix mai grheu ceu pui Amawrix pa ottan to heue.

### **Grawng Som Simiang Awgax (Pi 3:1-11)**

<sup>33</sup>Kix deeh veeh ti hu krax haktiex Bashan mai Awgax simiang meung Bashan hoek ti puing ka kix, nawh mai pui nawh khankix yuh naing ka haktiex Edarix.<sup>34</sup> Simiang Siyiex ah nin ka Mose, “Paw lhat ka nawh, mawh kheu Aux hoik ap nawh mai pui nawh mai haktiex nawh ka daux taix maix, maix tak yuh ka nawh awm hoik yuh maix ka Sihon simiang ceu pui Amawrix pa ot haktiex Heshabon.”<sup>35</sup> Kix pah nawh khawm kawm simex nawh, tau mai pui nawh khawmuik, tom anglai deuk tix kaux kawm mai kix rhim sinngao haktiex nawh khankix heue.

## **22 Simiang Baliet Kok Ka Balam**

Khaix an, pui Isarelaux deeh gah tix mai bang ti ot ka daux lung Mawbax plak tohawt praok rawm klawng Yawdanplak toi veng Yerikho.<sup>2</sup> Baliet kawm simex Ziphaw yaox ka pa hoikyuh pui Isarelaux ka ceu pui Amawrix.<sup>3</sup> Pui haktiex Mawbax kied lhatgraung ka pui Isarelaux kheu kied haohhun kix.<sup>4</sup> Pui Mawbax ah nin ka kuad song pui Midian, “Awm mawie sawm rib pa koe rawbrim tix, cub pui hun in khankix tak yuh canceu pa koe rawbrim ex lauxleeing,” yam an Baliet kawm simex Ziphaw mawh simiang pui Mawbax.<sup>5</sup> Nawh ploi pui cau khankix hu ka Balam kawm simex Bawrax, pa ot ka veng Petaw pa koe dex rawm klawng Yufrethix haktiex Amaw mai kok nawh ah nin, “Jhak heue, pui khankix hoek khaing Ejiptux mai kix hoik kheem ka piang haktiex mai kix hoik ot see plak aux.<sup>6</sup> Yuh buanson jhaxlawg ka pui in khankix son aux liak, mawh kheu kied ting riang kix khaing aux, aux bak ti pon grheu kix lih khaing daux haktiex in, mawh kheu tawng aux pui pa nawb maix buankah takpon

buanson mai pui pa jhaxlawg maix kah kawx tak pon pa jhaxlawg.”<sup>7</sup> Mawh kheu nan kuad song pui Mawbax mai kuad song pui Midian, viex totaix mau sonsang yuh simeed ka taix tix mai hoek ka Balam mai krai lox simiang Baliet ka nawh.<sup>8</sup> Balam ah nin ka kix, “Peung tin daux sawm in, aux tak deeh krai lox ka pex, awm pa krai Simiang Siyiex ka aux.” Mawh kheu nan cub cao kaing Mawbax khankix, ot tau mai Balam.<sup>9</sup> Siyiex hoek ah nin ka Balam, “Pui in khankix pa ot tau mai maix mawh pui mawx?”<sup>10</sup> Balam deeh ah nin ka Siyiex, “Simiang Baliet kawn simex Mawbax, ploi pui hoek ah nin ka aux,<sup>11</sup> jhak heue, pui tix cub kaoh khaing meung Ejiptux mai hoik kheem ka piang haktiex Yam in,, hoek ti jhaxlawg kix son aux liak, aux bak ti pon puing kix mai grheu kix.”<sup>12</sup> Siyiex ah nin ka Balam, “Paw lai hu mai kix. Maix tak ang pon ti jhaxlawg ka pui in khankix, mawh kheu kix mawh ceu pui pa pon buanson.”<sup>13</sup> Balam kaoh ponngawb ah nin ka cao kaing cie Baliet khankix, “Deeh ing ka haktiex pex, mawh kheu Simiang Siyiex hoik thiang aux ang hu mai pex.”<sup>14</sup> Cao kaing Mawbax khankix kaoh mai ing ah nin ka Baliet, “Balam thiang ti ang hoek mai yix.”<sup>15</sup> Baliet baox ploi cao kaing tommie pa nielheu ting min plakngai khaing pa hu sivoie.<sup>16</sup> Kix hoek ka Balam ah nin ka nawh, “Baliet kawn simex Ziphaw ah yuh nin, paw kieh pa tiebtie tix ceu kawx koe ka maix, sonsang hoek maix ka aux,<sup>17</sup> mawh kheu aux tak yaog maix ting min mai aux tak yuh canceu pa krai maix ka aux khankix, hoek mai jhaxlawg pui inkix son aux liak.”<sup>18</sup> Balam deeh pawk lox ah nin ka pui cau simiang Baliet, “Viang simiang Baliet sang tawx mau khri tom naog ka nyiex haw tix kawx, aux tak ang pon lheu lox tawm Simiang Siyiex tix, sonsang yuh ti kaing ceu pa ting mai ceu pa iak angah.<sup>19</sup> “Mawh kheu nan pex baox ot tin daux sawm in, sonsang tawng aux ceu pa sang baox ah Simiang Siyiex ka aux.<sup>20</sup> Siyiex hoek ka Balam ponsawm ah nin ka nawh, “Phan pui hoek kok maix kaoh hu tau mai tix, viang mawh nan maix tak yuh awm pa hoik krai Aux ka maix

khaing.”<sup>21</sup> Awm an Balam kaoh ponngawb mai sau an brug tix ka piang la mai lih hu tau mai cub cao kaing Mawbax heue.

### **Balam Mai Kawncau Siyiex**

<sup>22</sup> Simiang Siyiex song rhawm kheu lih hu nawh, mai kawncau Simiang Siyiex tix kaux cung ka daux krax mai tiebtie ka nawh. Nawh brug la tix mai hu tau mai kawncau tix ra kaux.<sup>23</sup> La yaox ka cung kawncau Simiang Siyiex ka daux krax tau mai vaid pa lawd ka daux taix nawh, la veeh ti hu ka praok krax mai laig daux kaung mai Balam sivied ka la sonsang lawng daux krax.<sup>24</sup> Kawncau Simiang Siyiex deeh cung ka dee sikhawp krax pa koe guh lhaong khawm ra plak sinax sipeem plix siiet,<sup>25</sup> yam yaox la ka kawncau Simiang Siyiex, nawh greed tix ka plak guh mai yeen caong Balam ka guh, mawh kheu nan Balam baox sivied ka la.<sup>26</sup> Khaix an, kawncau Simiang Siyiex hu sivoie mai cung ka dee sikhawp krax, dee ang krax via lai koe ka plak dawm mai plak goix.<sup>27</sup> Yam yaox la ka kawncau Simiang Siyiex, la gup tix ka greem Balam mai Balam song rhawm mai baox sivied la ka khaox grix tix.<sup>28</sup> Khaix an, Simiang Siyiex paoh jheeh la ah nin ka Balam, “Hoik yuh aux ceu patix ka maix, maix lai sivied aux tom loe bawg?”<sup>29</sup> Balam ah nin ka la, “Mawh kheu hoik map maix ka aux. Aux simie ti koe vaid tix kre daux taix tix sonsang pah aux ka maix.<sup>30</sup> La deeh ah nin ka Balam, “Aux mawh la pa hoik brug maix jihjang glanggleeing tom hoek in singaix ang mawh lie? Khex sax yuh aux ceu in ka maix lie?” Balam deeh ah nin, “Maix ang sax yuh.”<sup>31</sup> Khaix an Simiang Siyiex paoh kangai Balam mai nawh yaox kawncau Simiang Siyiex pa cung daux krax tau mai vaid pa lawd tix ka daux taix tix, Balam num kaing tix mai gup ngai tix.<sup>32</sup> Kawncau Simiang Siyiex ah nin ka nawh, “Kheu maix lai sivied la tix tom loe bawg? Jhak heue, Aux hoek ti cung sonsang tiebtie ka maix, mawh kheu krax hu maix mawh krax pa lud ka plak sivoie Aux,<sup>33</sup> phan la ang yaox Aux mai via khaing Aux loe bawg, Aux hoik dawg pah maix yam an mai kieh la im ju.”<sup>34</sup> Balam ah nin ka kawncau Simiang Siyiex, “Aux hoik lud kheu ang aux tawng Maix Cao cung ka

daux krax, sonsang tiebtie ka aux. Phan ang mawh pa khaw ka plak sivoe ngai Maix aux tak deeh ing.”<sup>35</sup> Kawncau Simiang Siyiex ah nin ka Balam, “Hu mai pui an khankix, viang mawh nan, maix tak krai awm lox pa kieh Aux maix krai ngie.” Mawh kheu nan, Balam hu tau mai kawncau Baliet.<sup>36</sup> Yam mhong Baliet ka hoek Balam, Baliet lih hu rieb nawh ka veng Mawbax ka toh mee hawt rawm klawng Anon.<sup>37</sup> Baliet ah nin ka Balam, “Aux ploi pui hu kok maix, tix bawg hoik tix bawg ang mawh lie? Yuh ka mawx maix lai ang cu tix hoek ka aux? Ang aux mawh pui pa pon yaog min maix lie?”<sup>38</sup> Balam deeh ah nin ka Baliet, “Jhak heue, Aux hoek ka maix phao! mawh koe sibrawm aux tix sang krai tix ceuceu lie? Aux sang krai ngie lox pa deuh Siyiex ka daux jheeh aux khaing.”<sup>39</sup> Khaix an, Balam hu tau mai Baliet mai kix hoek ka veng Kiriyat Huzot.<sup>40</sup> Baliet yuh krax tan ka mawie mhaing mai yung mai ap krax tan an ka Balam khawm cao kaing pa hoek tau mai nawh heue.

### ***Lox Jhai Balam Bawg Tix***

<sup>41</sup> Ka daux singaix pasax, Baliet kok ka Balam mai viex nawh haok ka dee pa singax dee koe siyiex Balax, nawh pon simi ti jhak ka pui Isarelaux khaing tan pa ot dee dex heue.

**23** Balam ah nin ka Baliet, “Sum khu dee tan son aux aliah mu tin, khre ti tawx mawie mhaing aliah mu mai yung mhaing aliah mu son aux.”<sup>2</sup> Baliet yuh awm pa krai Balam, Baliet mai Balam tan mawie mhaing tix mu mai yung mhaing tix mu ka piang khu dee tan ku mu.<sup>3</sup> Balam ah nin ka Baliet, “Cung dex praok krax tan pa gleeing maix mai aux tak lih hu, aux bak Simiang Siyiex sang hoek ti rieb ka aux mai canceu pa jhi Nawh Cao ka aux khankix, aux tak krai ka maix.” Mawh kheu nan nawh kawx haok ka dee pa kied lhaong.<sup>4</sup> Siyiex rieb ti yaox Balam mai Balam ah nin ka Nawh Cao, “Aux hoik khrierien khu dee tan aliah mu mai hoik tan mawie mhaing tix mu mai yung mhaing tix mu ka piang khu dee tan ku mu.”<sup>5</sup> Simiang Siyiex sau lox Tix ka daux jheeh Balam ah nin, “Deeh ing ka Baliet mai maix

tak krai awm in.”<sup>6</sup> Balam deeh ing ka Baliet mai yaox Baliet mai cao kaing Mawbax khankix, kawncung dex praok krax tan pa gleeing tix.<sup>7</sup> Balam krai lox jhai ah nin, “Baliet simiang pui Mawbax, viex aux hoek khaing haktiex Aram mai khaing gawng plak toh, hoek heue, jhaxlawg ka pui Yakop son aux mai hoek heue. Ap pui Isarelaux khankix hoek krax lauxleeing.”<sup>8</sup> “Aux tak sang jhaxlawg ka pui pa ang Siyiex jhaxlawg yuh ka mawx? mai aux tak sang ap pui pa ang Siyiex nyang ap hoek yuh krax lauxleeing yuh ka mawx?”<sup>9</sup> Mawh kheu Aux yaox nawh khaing ka piang choek gawng mai hoik simi nawh khaing ka piang ton, jhak heue ceu pui tix cub ot nongnong, ang lai neuex tix daux sinax ceu pui tang ceu!<sup>10</sup> Mawh pui mawx pa pon simin ka ceu pui Yakop pa nie awm phawng tiex, phan ang mawh nan, mawh pui mawx pa pon simin ka ceu pui Isarelaux pa koe pon son tix son! kieh aux yum awm pui rahsee mai kieh dee sidah aux awm dee sidah nawh.<sup>11</sup> Baliet ah nin ka Balam, “Hoik yuh maix patix kaaux? aux kok maix sonsang jhaxlawg maix ka pui pa koeng tix mai jhak heue, maix ang yuh tittix mai hoik nawb buanson ka piang kix,”<sup>12</sup> Nawh pawk lox ah nin, “Mawh ang aux khaw ti rien lox sikah ceu pa hoik deuh Simiang Siyiex ka daux jheeh aux lie?”

### ***Lox Jhai Balam Bawg Ra***

<sup>13</sup> Baliet ah nin ka nawh, “Hoek tau mai aux ka tangdah khaing dee chix yaox maix kix, maix tak yaox ngie kix ceeix ceeix mai ang yaox kix khawmuik mai maix jhaxlawg ka kix son aux dee an.”<sup>14</sup> Nawh viex Balam hoek ka daux kaung Zophim ka piang choek gawng Pisaga mai sum khu dee tan aliah mu mai tan mawie mhaing tix mu mai yung mhaing tix mu, ka piang khu dee tan ku mu.<sup>15</sup> Balam ah nin ka Baliet, “Cung dex praok krax tan pa gleeing maix tin, yam kawncung hu sipub aux ka Simiang Siyiex plak an.”<sup>16</sup> Simiang Siyiex sipub Balam mai sau lox sikah Tix ka daux jheeh nawh ah nin, “Deeh ing ka Baliet mai maix tak sikah awm in.”<sup>17</sup> Balam deeh hoek ka nawh, yaox kawncung nawh praok krax tan pa gleeing ti tau mai cub cao kaing Mawbax khankix mai Baliet ah nin ka nawh,



“Simiang Siyiex krai lox patix?”<sup>18</sup> Balam krai lox jhai ah nin, “Simiang Baliet kaoh mai nghiet heue, kawm simex Ziphaw nghiet ka lox aux heue.<sup>19</sup> Siyiex ang mawh kawm pui pa sang pielhen mai ang mawh kawm pui pa sang dohkeud, Nawh Cao ang yuh awm pa hoik krai Tix lie? Awm koe sijax mukheu Nawh mai Nawh Cao ang yuh awm pa hoik krai Tix lie?<sup>20</sup> Jhak heue, aux hoik pon rieb lox tawm son pa nawb buanson, Nawh Cao hoik nawb buanson mai aux ang lai pon preet ka buanson an.<sup>21</sup> Nawh Cao ang doh pon yaox ka krax kharhawm ka daux ceu pui Yakop mai ang doh pon yaox ka pa caox caig ka daux pui Isarela khankix.” Simiang Siyiex kix ot tau mai kix mai lox kok yo simiang koe sinax kix.<sup>22</sup> Siyiex hoik viex kix lih khaing meung Ejiptux mai hoik kieh kix koe riang rao awm rung mawie praix.<sup>23</sup> “Ang koe pui yuh simeed sonsang yuh ka ceu pui Yakop laux, mai ang koe pui yuh sibawk sonsang yuh ceu pui Isarela laux, Yam in, hoik mawh bawgyam ah pui lox ceu in ka pui Yakop mai ka pui Isarela, Siyiex tak sang yuh ka mawx?”<sup>24</sup> Jhak heue, pui tix cub tak kaoh awm sivai sangsi shiang mai yaog ti kaoh awm sivai sangsi mhaing, nawh ang lai it tum tom ang nawh nyang ih kug pa pon ti mai yot ka nham totiag pa hoik pah tix.”<sup>25</sup> Baliet ah nin ka Balam, “Paw doh jhaxlawg ka kix mai paw doh nawb buan ka kix.”<sup>26</sup> Balam pawk lox Baliet ah nin, mawh ang aux hoik dawg krai lox ka maix mai aux tak sang yuh awm lox pa hoik krai Simiang Siyiex khawmuik ang mawh lie?”

### ***Lox Jhai Balam Bawg Loe***

<sup>27</sup> Baliet ah nin ka Balam, “Hoek heue, aux tak viex maix hu ka tangdah, aux bak an mawh pa khawcaw rhawm Siyiex, sonsang jhaxlawg maix kix son aux ka dee an.”<sup>28</sup> Baliet viex Balam haok ka piang choek gawng Pegurax, pa veeh ngai tix ka tiag Yeshimon.<sup>29</sup> Balam ah nin ka Baliet, “Sum khu dee tan son aux aliah mu mai khre mawie mhaing aliah mu mai yung mhaing aliah mu ka son aux.<sup>30</sup> Baliet yuh awm pa hoik krai Balam mai tan mawie mhaing tix mu mai yung mhaing tix mu ka piang khu dee tan ku mu heue.”

24:9 Yam 12:3, Yam 49:9.

**24** Yam yaox Balam koe rhawm Simiang Siyiex ti sang nawb buan ka pui Isarela khankix, nawh ang lai hu awm ku bawg, sonsang chaw jhai mai nawh veeh ngai tix hu ka plak daux tiag.<sup>2</sup> Balam maong ti jhak mai yaox ka bang ceu pui Isarela khankix, awm pa koe doehru kix tix ceu hoik tix ceu mai khuan singax Siyiex lih ka piang nawh<sup>3</sup> mai nawh krai lox jhai ah nin, “Gumlox pa plak jhi khaing Balam kawm simex Bawrax, gumlox pa plak jhi khaing pui pa hoik riieng ngai,<sup>4</sup> pui pa pon mhong gumlox Siyiex khaing pui pa hoik plak jhi mai pui pa yaox riieng susai khaing Cao pa ting siawp sibrawm tau mai pa gohgup tix mai ngai hoik baoh,<sup>5</sup> pui Yakop eue, nyiex gox maix khankix mawh pa mhawm grang miexding, pui Isarela khankix eue, dee ot maix khankix mawh pa mhawm grang miexding!<sup>6</sup> Awm daux ngawd pa vieh tom hoek dee singai, awm sipeem pa koe hawt praok rawm klawng khankix mai awm khaox nyawng pa hoik sum Simiang Siyiex khankix. Awm khaox Arit pa kuah hawt praok rawm khankix.<sup>7</sup> Rawm tak lih khaing daux pung rawm nawh khankix mai simie nawh tak koe ka daux dee nie rawm khankix mai simiang nawh tak ting lhaong khaing Agat mai meung haktiex nawh tak mawh pa blon ao min.<sup>8</sup> Siyiex viex nawh lih khaing meung Ejiptux, nawh hoik koe riang rao awm mawie praix, nawh tak kiied ti ih ceu pui khankix, pa mawh pui koeng nawh, nawh tak raig ti tik si-ang kix graig siag mawx siag an mai te ak nawh tak phlat ka kix.<sup>9</sup> Nawh tum mai nyat tix awm sivai sangsi mhaing mai awm sivai sangsi shiang, pui mawx pa sang pon so nawh kaoh lie? Pui pa nawb buan ka maix tak pon buanson mai pui pa jhaxlawg ka maix tak pon krax pa jhaxlawg.”

### ***Lox Jhai Balam***

<sup>10</sup> Baliet song rhawm ka Balam mai dieh taix tix, simiang Baliet ah nin ka Balam, “Aux kok maix sonsang jhaxlawg ka pui pa koeng tix, jhak heue, maix hoik nawb buan ka piang kix tom loe bawg.<sup>11</sup> Mawh kheu nan, Yam in, nied to ing ka dee ot maix, aux hoik ah ti sang tawx min ka maix, viang mawh nan,

Simiang Siyiex hoik kieh maix veeh ti khaing pa tawx min plakngai.”<sup>12</sup> Balam deeh ah nin ka simiang Baliet, “Aux hoik krai ka pui cau maix khankix pa ploi maix hoek ka aux,<sup>13</sup> viang simiang Baliet sang tawx mau khri tom naog ka nyiex haw tix kawx aux tak ang pon lheu lox tawm Simiang Siyiex tix, sonsang yuh aux kaing ceu pa mhawm angah, ceu pa caox angah, son alo tokaux tix, aux tak krai ngie lox pa hoik krai Simiang Siyiex ka aux khaing ang mawh lie?”<sup>14</sup> Aux tak sang deeh hu ka ceu pui tix khankix, hoek heue, Aux tak sang kieh maix tawng pa sang yuh pui inkix ka piang ceu pui maix khankix daux singaix khaix heue.”<sup>15</sup> Nawh krai lox jhai ah nin, “Gumlox pa plak jhi khaing Balam kawn simex Bawrax mai gumlox pa plak jhi khaing pui pa hoik riieng ngai,<sup>16</sup> pui pa pon mhong gumlox Siyiex khaing pui pa hoik plak jhi mai tawng ka pingnya khaing Cao pa ting lhaong mai pui pa yaox riieng susai khaing Cao pa ting siawp sibrawm tau mai pa gohgup tix mai ngai hoik baoh.”<sup>17</sup> Aux yaox ka Nawh Cao, viang mawh nan ang nyang mawh Yam in,, aux simi ka Nawh Cao, viang mawh nan ang nyang mawh pa dex, simuing tak lih khaing daux ceu pui Yakop, pliah simiang tak lih kaoh khaing ceu pui Isarelax mai tak tawx ka dongre ceu pui Mawbax mai yuh kawn simex Shetax lauxlak pakleeing.<sup>18</sup> Nawh tak rhim ka haktiex Edom mai gawng Sirax kawx tak mawh cie pui koeng nawh khankix, viang mawh nan, ceu pui Isarelax khankix tak koe rhawm vaorhawm kua.<sup>19</sup> Pui pa kuang tix kaux tak lih hoek khaing ceu pui Yakop mai yuh veng pa kawn deuk khankix lauxleeing!”<sup>20</sup> Nawh jhak ka piang haktiex Amaliet mai nawh krai lox jhai ah nin, “Viang ceu pui Amaliet mawh pa kied cheung sinax ceu pui khankix kawx, dee sidah nawh tak mawh pa grai grup.”<sup>21</sup> Nawh jhak ka piang ceu pui Kenix mai nawh krai lox jhai ah nin, “Dee ot maix mawh pa kauxcong mai tak deuh mheem maix daux rang,<sup>22</sup> viang mawh nan ceu pui Kenix tak lauxleeing tom hoek bawgyam viex Simiang Ashux pex hu mawh

pui pa giexlaung rheeng miexding lie?”<sup>23</sup> Nawh krai lox jhai ah nin, “Ayaya! pui mawx pa sang im ju, yam yuh Siyiex inkix lie?”<sup>24</sup> Reu sang phaw khankix tak hoek khaing haktiex Khitim mai yuh ka meung Ashux mai meung Heba mai pui Amaliet khankix kawx tak lauxleeing tau.”<sup>25</sup> Khaix an Balam kaoh mai ing ka dee ot tix mai Simiang Baliet kawx deeh hu krax hu tix heue.

## 25 *Pui Isarelax Ot Haktiex Mawbax*

Yam ot pui Isarelax khankix ka daux Shittim mai pui khankix jah ti koe pa ludvao mai kawn sibun ceu pui Mawbax.<sup>2</sup> Sibun khankix kok pui hoek ka dee yuh kix krax tan ka siyiex tix, pui khankix ih ka pa tan kix mai krub ka siyiex kix.<sup>3</sup> Pui Isarelax khankix rom ti tau mai siyiex Balax Pegurax mai Simiang Siyiex songrhawm ka pui Isarelax khankix,<sup>4</sup> Simiang Siyiex ah nin ka Mose, “Viex cao kaing khaing pui hun khankix mai takteue ka kix daux koek sivoe ngai Simiang Siyiex sonsang veeh pa songrhawm Simiang Siyiex singai khaing pui Isarelax.”<sup>5</sup> Mose ah nin ka cao prawnsee pui Isarelax khankix, “Pex kukaux pah ka pui khankix pa rom ti tau mai Balaxpegurax.”<sup>6</sup> Jhak heue, yam yiem grai pui Isarelax ka diang siviex nyiex gox buan man bang kum, pui tix kaux viex sibun pui Midian hoek ka puxaik tix, ka sivoe ngai Mose mai ka sivoe ngai cub pui hun kawn praix Isarelax heue.<sup>7</sup> Yam yaox Phenihat kawn simex Eliaza pa mawh kawn simex Arun cao giex kaing li ka an, nawh yaog ti kaoh khaing sinax cub pui hun mai giex pliah mai<sup>8</sup> hu ka pui Isarelax an ka daux lawg mai suat nawh mai sibun an, tom phlat ka kiex khawm ra, mawh kheu nan jhawm saux preng hoik grai khaing pui Isarelax khankix.<sup>9</sup> Pui pa yum ka jhawm saux preng koe ra mheen pon rheng kaux heue.<sup>10</sup> Simiang Siyiex ah nin ka Mose,<sup>11</sup> “Phenihat kawn simex Eliaza pa mawh kawn simex Arun cao giex kaing li, hoik kieh krax pa songrhawm Aux veeh ti khaing pui Isarelax khankix, mawh kheu kied koe rhawm nawh ka Aux mai krax pa kied koe rhawmrhi Aux daux sinax kix, son ang Aux yuh pui Isarelax hoek daux pa lauxleeing.<sup>12</sup> Mawh kheu nan maix ah nin, “Jhak heue,

aux tawx gumlox sijax mukheu pa nhim ka nawh, <sup>13</sup> gumlox sijax mukheu in tak mawh son nawh mai son doehru pa koe khaix nawh, pa mawh gumlox sijax mukheu pa dexdawd mai cao giex kaing li, mawh kheu nawh kied koe rhawm ka son Siyiex tix, nawh hoikyuh krax khioxkhaw son pui Isarela x khankix.” <sup>14</sup> Ceukaux pui Isarela x pa hoik pah kix tau mai sibun pui Midian, mawh Zimarix kawn simex Salux pa mawh cao kaing dau nyiexma keeing kix, pa ao min sinax ceu pui Simion khankix. <sup>15</sup> Ceukaux sibun Midian pa hoik pah kix, mawh Khawzabix kawn sibun Zurax, pa mawh cao kaing pui pa ao min khaing dau nyiexma keeing kix pui Midian heue. <sup>16</sup> Simiang Siyiex ah nin ka Mose, <sup>17</sup> “Yuh sivix ka ceu pui Midian khankix mai pah ka kix, <sup>18</sup> mawh kheu kix hoik yuh sivix mai tuktiak ka pex, sonsang yuh kix pex lauxleeing, ka grawng pa dexdawd mai siyiex Pegurax mai ka grawng sibun Khawzabix kawn sibun cao giex kaing ceu pui Midian, pa mawh nan kix, pa hoik pah ka dau singaix lih saux preng jao siyiex Pegurax heue.”

### **26 Koh Carang Pui Isarela x Bawg Ra**

Khaix hoik luan jhawm saux preng, Simiang Siyiex ah nin ka Mose mai Eliaza kawn simex Arun cao giex kaing li, <sup>2</sup> “Tei carang cub pui hun Isarela x khankix, jah ka pui koe ju tixnga num haok plak piang, awm pa koe doeh nyiexma keeing kix, pa pon hu dau naing ka dau pui Isarela x khawmuik.” <sup>3</sup> Mose mai Eliaza cao giex kaing li, kra i lox ah nin ka kix dau lung Mawbax hawt rawm klawng Yawdan pa koe toi veng Yerikho, <sup>4</sup> “Tei carang pui khankix, jah ka pui pa koe ju tixnga num haok plak piang, awm pa hoik tawm Simiang Siyiex ka Mose mai pui Isarela x pa hoik lih khaing meung Ejiptux. <sup>5</sup> Rubin mawh kawn Ai ka ceu pui Isarela x, mai kawn praix Rubin khankix mawh Hanok pa lih mawh doeh nyiexma ceucad Hanawkhix, Phalux pa lih mawh doeh nyiexma ceucad Paluwix khankix, <sup>6</sup> Hezaron pa lih mawh doeh nyiexma ceucad Hezarawnix, mai Khamit palih mawh doeh

nyiexma ceucad Khamaik. <sup>7</sup> In mawh doeh nyiexma ceucad Rubin, pa laig carang koe pon mheen loe rheng aliah yieh tixngoe kaux. <sup>8</sup> Kawn simex Phalux mawh Eliabax. <sup>9</sup> Kawn simex Eliabax mawh Nemoelax, Datan mai Abiram. Datan mai Abiram mawh pa hoik laug kix dau pui hun, pa tiehfeen ka Mose mai Arun pa rom paox tix mai cub Korax yam tiehfeen kix ka Simiang Siyiex <sup>10</sup> mai haktiex ang jheeh tix bleet ka kix khawmuik tau mai Korax, yam yum paox cub paox caw kix, tau mai yam gleeing ngu kix ra yieh tixphan kaux mai kix lih mawh mhairug pa tawx satix. <sup>11</sup> Viang mawh nan, kawn praix Korax khankix ang yum. <sup>12</sup> Doeh nyiexma kawn simex Simion khankix mawh Nemoelax pa lih ti mawh doeh nyiexma Nemoelix, mai Yamen pa lih mawh doeh nyiexma Yam in, ix mai Yakhin lih mawh doeh nyiexma Yakhinix, <sup>13</sup> Zerax pa lih mawh doeh nyiexma Zerahix mai Shawlax pa lih mawh doeh nyiexma Shawlix. <sup>14</sup> In khankix mawh doeh nyiexma ceucad Simion koe ra mheen ra rheng ra yieh kaux, <sup>15</sup> doeh nyiexma kawn simex Gat khankix mawh Zephon, pa deeh lih mawh doeh nyiexma Zephawnix, mai Hagie pa lih mawh doeh nyiexma Hagrix, mai Shunix pa lih mawh doeh nyiexma Shunit <sup>16</sup> mai Awzanix pa lih mawh doeh nyiexma Awzanet mai Erix palih mawh doeh nyiexma Erit <sup>17</sup> mai Arot pa lih mawh doeh nyiexma Arodix mai Arelix pa lih mawh doeh nyiexma Arelit. <sup>18</sup> In khankix mawh doeh nyiexma kawn simex Gat pa hoik laig carang koe pon mheen phuan yieh kaux. <sup>19</sup> Doeh nyiexma kawn simex Yudax mawh Erax mai Awnan, Erax mai Awnan yum ka dau meung Khanan. <sup>20</sup> Doeh nyiexma kawn simex Yudax mawh Shelax, pa lih mawh doeh nyiexma Shelanix mai Pariet pa lih mawh doeh nyiexma Parazix mai Zerax pa lih mawh doeh nyiexma Zerahix. <sup>21</sup> Doeh nyiexma kawn simex Pharet mawh Hezaron, pa lih mawh doeh nyiexma Hezarawnix, mai Hamulax pa lih mawh doeh nyiexma Hamulix. <sup>22</sup> In khankix mawh doeh nyiexma Yudax pa hoik laig carang, koe aliah mheen liah rheng phuan yieh kaux. <sup>23</sup> Doeh nyiexma kawn simex Isakha khankix mawh Tawlax, pa

lih mawh doeh nyiexma Tawlix, mai Phua pa lih mawh doeh nyiexma Phunit <sup>24</sup> mai Yashu pa lih mawh doeh nyiexma Yashubit, mai Shimaron pa lih mawh doeh nyiexma Shimaronit. <sup>25</sup> In khankix mawh doeh nyiexma Isakha, pa hoik laig carang koe liah mheen pon rheng loe yieh kaux. <sup>26</sup> Doeh nyiexma kawn simex Zebulun khankix mawh Sarait, pa lih mawh doeh nyiexma Saradix, mai Elon pa lih mawh doeh nyiexma Elonit, mai Yalelax pa lih mawh doeh nyiexma Yalelit. <sup>27</sup> In mawh doeh nyiexma Zebulun pa hoik laig carang koe liah mheen phuan yieh kaux. <sup>28</sup> Doeh nyiexma kawn simex Yosiep mawh Manashe mai Epharim. <sup>29</sup> Doeh nyiexma kawn simex Manashe khankix mawh Makhirax, pa lih mawh doeh nyiexma Makhirax mai Makhirax pon kawn tix Gilat mai Gilat lih mawh doeh nyiexma Gilidix. <sup>30</sup> In khankix mawh kawn simex Gilat mai Yezerax lih mawh doeh nyiexma Yezerit mai Heliet lih mawh doeh nyiexma Helikit <sup>31</sup> mai Asarilax lih mawh doeh nyiexma Asarilit mai Shekhim lih mawh doeh nyiexma Shekhimit <sup>32</sup> mai Shemidax lih mawh doeh nyiexma Shemidit mai Hephax lih mawh doeh nyiexma Heparit. <sup>33</sup> Zelophihat kawn simex Hephax ang koe kawn simex nawh koe kawn sibun nongnong ceukaux kawn bun Zelophihat khankix mawh Mala, Nawa, Hawgala, Milaka mai Tiraza. <sup>34</sup> In khankix mawh doeh nyiexma Manashe pa hoik laig carang koe phuan mheen ra rheng aliah yieh kaux. <sup>35</sup> In khankix mawh doeh nyiexma kawn simex Epharim mai Shutelax lih mawh doeh nyiexma Shutalit mai Bekha lih mawh doeh nyiexma Bekharit mai Tahan lih mawh doeh nyiexma Tahanit. <sup>36</sup> In khankix mawh kawn simex Shutelax mai Eran lih mawh doeh nyiexma Eranit. <sup>37</sup> In khankix mawh doeh nyiexma kawn simex Epharim pa hoik laig carang koe loe mheen ra rheng phuan yieh kaux. In khankix mawh doeh nyiexma kawn simex Yosiep. <sup>38</sup> In khankix mawh doeh nyiexma kawn simex Benjamin mai Belax lih mawh doeh nyiexma Belit mai Ashabelax lih mawh doeh nyiexma Ashabelit mai Ahiram lih mawh doeh

nyiexma Ahiramit <sup>39</sup> mai Shuphan lih mawh doeh nyiexma Shuphamit, mai Hupham lih mawh doeh nyiexma Huphamit. <sup>40</sup> Kawn simex Belax mawh Aradax mai Neman, Aradax lih mawh doeh nyiexma Aradit, mai Neman lih mawh doeh nyiexma Nemanmit. <sup>41</sup> In khankix mawh doeh nyiexma kawn simex Benjamin mai pui pa hoik laig carang koe pon mheen phuan rheng liah yieh kaux. <sup>42</sup> In khankix mawh doeh nyiexma kawn simex Dan mai Shuham lih mawh doeh nyiexma Shuhamit. In khankix mawh doeh nyiexma Dan. <sup>43</sup> Doeh nyiexma Shuhamit pa hoik laig carang koe liah mheen pon rheng pon yieh kaux. <sup>44</sup> Doeh nyiexma kawn simex Asha mai Yimanax lih mawh doeh nyiexma Yimanit mai Yesuwat lih mawh doeh nyiexma Yesuwit mai Beriyax lih mawh doeh nyiexma Berit. <sup>45</sup> Kawn simex Beriyax khankix mawh Hebarax lih mawh doeh nyiexma Hebarit, mai Malakhelax lih mawh doeh nyiexma Malakhelit. <sup>46</sup> Ceukaux kawn sibun Asha mawh Sera. <sup>47</sup> In khankix mawh doeh nyiexma kawn simex Asha pa hoik laig carang koe phuan mheen loe rheng pon yieh kaux. <sup>48</sup> Doeh nyiexma kawn simex Napthalix mai Yazelax lih mawh doeh nyiexma Yazelit mai Gunix lih mawh doeh nyiexma Gunit <sup>49</sup> mai Yezerax lih mawh doeh nyiexma Yezerit mai Shiliem lih mawh doeh nyiexma Shilimit. <sup>50</sup> In khankix mawh doeh nyiexma kawn simex Napthalix pa hoik laig carang koe pon mheen phuan rheng pon yieh kaux. <sup>51</sup> In khankix mawh pui pa hoik laig carang ka dauh pui Isarelax koe liah siien tix rheng aliah yieh tixngoe kaux heue.

### **Grawng Gwieh Haktiex**

<sup>52</sup> Simiang Siyiex ah nin ka Mose, <sup>53</sup> "Tak goih haktiex in awm pa hoik koe ceukaux kix sonsang mawh sinngao kix. <sup>54</sup> Son cub pui pa nie, maix tak goih sinngao awm pa nie kix mai son cub pui pa tux, maix tak goih sinngao awm pa tux kix, pui ku cub tak pon sinngao awm pa hoik koe carang kix. <sup>55</sup> Viang mawh nan, caw ti yuh niep mai goih kah, kix tak pon sinngao awm pa koe ceukaux doehru keeingkix. <sup>56</sup> Awmpa hoik caw kix niep, kix



tak pon ti cie sinngao hawt nie mai hawt tux pui kix heue.”

### ***Doehru Nyiexma Lewix***

<sup>57</sup>In khankix mawh pui pa hoik laig carang ka dauh doeh nyiexma pui Lewix mai Geshon lih mawh doeh nyiexma Geshonit mai Kawhat lih mawh doeh nyiexma Kawhatit mai Merarix lih mawh doeh nyiexma Merarit. <sup>58</sup>In khankix mawh doeh nyiexma pui Lewix pa mawh doeh nyiexma Libanit, doeh nyiexma Hebaronit, doeh nyiexma Mahali, doeh nyiexma Mushix mai doeh nyiexma pui Korax. Kawhat pon kawn simex tix Amaram. <sup>59</sup>Moeng Amaram kauh Yawkhebiet pa mawh kawn sibun Lewix pa keh khaing Lewix ka dauh meung Ejiptux, sibun an keh Arun mai Mose khawm Meriam pa mawh puxke bun kix son Amaram. <sup>60</sup>Arun koe kawn simex pa mawh Nadax mai Abihux, Eliaza mai Itama. <sup>61</sup>Nadax mai Abihux yum yam tan kiex ngu pa seeing ka plak sivoe Simiang Siyiex. <sup>62</sup>Kix pa hoik laig carang koe ra mheen loe rheng kauh, kix ang lai sau carang kawn nyawm simex jah ka pa koe ju tix khix haok plak piang sinax pui Isarela, mawh kheu ang sinngao pa sang tawx ka kix koe sinax pui Isarela. <sup>63</sup>In khankix mawh pui pa hoik laig carang pa hoik simin Mose mai Eliaza cao giex kaing li dauh kawn praix Isarela dauh lung Mawbax hawt rawm klawng Yawdan plak toi veng Yerikho. <sup>64</sup>Viang mawh nan, pui in khankix ang laig ka dauh carang tix kauh kawx pa hoik simin Mose mai Arun cao giex kaing li yam simin kix pui Isarela ka dauh tiag gawng Sina. <sup>65</sup>Mawh kheu Simiang Siyiex hoik ah nin ka kix, “Kix tak yum ka dauh tiag.” Ang lai koe pui pa deuk ka dauh kix tix kauh kawx, lheu khaing Kaliep kawn simex Yephunie mai Yawsux kawn simex Nun heue.

## **27 *Been Pa Dexdawd Mai Sinngao***

Khaix an, kawn sibun Zelophehat mawh Mala, Nawa, Hawgala, Milaka, Tiraza, khaing Hepha, khaing kawn simex Gilat, khaing kawn simex Makhirax, khaing kawn simex Manashe, khaing kawn simex Yosiep,<sup>2</sup>kix

26:60 Si 3:2. 26:61 Krub 10:1-2; Si 3:4. 26:65 Si 14:26-35. 27:7 Si 36:2. 27:12-14 Pi 3:23-27, 32:48-52.

cung plak sivoe Mose mai plak sivoe Eliaza cao giex kaing li mai plak sivoe cao kaing mai plak sivoe pui hun ka diang siviex laig ka dauh nyiex gox buan man bang kum pui hun ah nin, <sup>3</sup>keeing yix yum ka dauh tiag, nawh ang laig ka dauh sinax cub pa kraixkhrawm paoxtix patiehfeen ka Simiang Siyiex tau mai cub Korax, viangmawh nan, nawh yum kheu phimap tix mai nawh ang koe kawn simex tix kauh kawx. <sup>4</sup>Mawh kheu ang keeing yix koe kawn simex tix kauh kawx, tak sang tik yix khaing dauh doeh nyiexma nawh lie? Mawh kheu nan, tawx sinngao cie yix khaing dauh sinax puxaik keeing yix khankix liak.” <sup>5</sup>Mose viex grawng see kix hoek sivoe Simiang Siyiex. <sup>6</sup>Simiang Siyiex ah nin ka Mose, <sup>7</sup>“Lox krai kawn sibun Zelophihat khaw heue maix tak tawx kix cie sinngao ka dauh sinax puxaik keeing kix mai kieh sinngao keeing kix mawh cie kix. <sup>8</sup>Maix ah nin ka pui Isarela khankix, phan pui tix kauh kauh pa ang koe kawn simex mai yum, maix tak kieh sinngao nawh mawh son kawn sibun nawh. <sup>9</sup>Phan nawh ang koe kawn sibun, maix tak tawx sinngao nawh ka puxaik nawh khankix. <sup>10</sup>Phan nawh ang koe puxaik, maix tak tawx sinngao nawh ka puxaik keeing nawh khankix. <sup>11</sup>Phan keeing nawh ang koe puxaik, maix tak tawx sinngao nawh ka ru pa dexdawd mai doeh nyiexma nawh khankix mai nawh tak pon ti cie ka an. An tak mawh been lox tat jhawm prawng ka son kawn praix Isarela, awm pa hoik tawm Simiang Siyiex ka Mose heue.”

### ***Yawsux Mawh Cao Kaing Pui Isarela***

<sup>12</sup>Simiang Siyiex ah nin ka Mose, “Haok ka piang gawng Abarim mai jhak ka haktiex pa hoik tawx Aux ka pui Isarela.” <sup>13</sup>Yam hoik yaox maix ka an, maix kawx tak khrawm ti tau mai pui, awm khrawm puxke maix Arun tix tau mai kix, <sup>14</sup>mawh kheu pax hoik tiehfeen ka gumlox Aux ka dauh tiag Zin, yam thungthiang pui hun paoxtix, dexrawm klawng Meribax pa koe hawt Kadesha ka dauh tiag Zin, maix ang yungyi ka Aux ka plak sivoe ngai kix. <sup>15</sup>Mose ah nin ka Simiang Siyiex, <sup>16</sup>“Kieh Simiang Siyiex pa mawh Khuan ka piang kawn pui khankix, laug pui tix kauh



sonsang thong ka pui hun,<sup>17</sup> pui pa sang pon hu laig ka plak sivoie kix mai pui pa pon thong kix lih mai pa pon viex kix laig, son ang pui Simiang Siyiex khankix awm yung pa ang koe cao liang.”<sup>18</sup> Simiang Siyiex deeh ah nin ka Mose, “Kok Yawsux kawn simex Nun pa mawh pui pa koe khuan ka daux nawh mai deuh taix maix ka piang nawh,<sup>19</sup> kieh nawh cung sivoie ngai Eliaza cao giex kaing li mai sivoie ngai pui hun mai ap beeh glawm nawh ka plak sivoie kix.”<sup>20</sup> Tak tawx min siawp sibrawm maix ka nawh tixblah, sonsang cu nghiet cub pui hun Isarelaax ka nawh.<sup>21</sup> Nawh tak cung ka plak sivoie Eliaza cao giex kaing li mai cao giex kaing li tak chawkicheng grawng krax prawngca been Urim ka plak sivoie ngai Simiang Siyiex ka son nawh mai pui kukaux tak lih tak laig awm gumlox nawh, tau mai nawh khawm pui Isarelaax mai cub pui hun khankix.”<sup>22</sup> Mose yuh awm lox pa hoik tawm Simiang Siyiex ka nawh, nawh kok Yawsux mai kieh nawh cung sivoie ngai Eliaza cao giex kaing li mai pui hun khankix.<sup>23</sup> Nawh deuh taix tix ka piang Yawsux mai ap beeh glawm ka nawh, awm pa hoik tawm Simiang Siyiex ka Mose heue.

**28** *Krax Tan Son Ku Singaix* (Lih 29:38-46)  
 Simiang Siyiex ah nin ka Mose,<sup>2</sup> “Tawm lox ka pui Isarelaax ah nin ka kix, krax tan son Aux, pa ih Aux mai krax tan pa gleeing ka ngu pa mawh krax tan pa sioe bhawng pa khawrhawm Aux, maix tak yuh satix tix yam tan maix ka Aux, ka daux bawgyam pa hoik tat ti deuh.”<sup>3</sup> Maix tak ah nin ka kix, “In mawh krax tan pa gleeing ka ngu pa sang tan pex ka Simiang Siyiex, tak mawh kawn yung mhaing iak pa naog num, pa loig ra mu, tix ngaix hoik tix ngaix jheengjheeng.”<sup>4</sup> Maix tak tan kawn yung iak ponngawb tix mu mai tan plakbo tix mu tau<sup>5</sup> mai phawng nghox ca ceu pa mhawm kao son tix son khaing tix epha pa mawh krax tan ceu pa ih pa hoik klao ti tau mai bee sanlon pa krid tix lih khaing plix sanlon, pon son tix son khaing tix heng.<sup>6</sup> An mawh

**27:18** Lih 24:13. **27:21** Lih 28:30, 1Sa 28:6. **27:23** Pi 31:23. **28:9-10** Mat 12:5.

krax tan pa gleeing jheengjheeng pa hoik tat ti deuh ka piang gawng Sina, krax tan pa sioe bhawng pa khawrhawm Siyiex pa mawh krax tan pa gleeing ka ngu.<sup>7</sup> Maix tak tan kawn yung tix mu tau mai krax tan pa nyaux, pon son tix son khaing tix heng, maix tak hieh krax tan pa nyaux an dee pa singax singeh son Simiang Siyiex.<sup>8</sup> Maix tak tan kawn yung tang mu plakbo awm krax tan ceu pa ih plak ponngawb tau mai krax tan pa nyaux. Maix tak tan krax tan pa gleeing ka ngu mai krax tan pa sioe bhawng pa khawrhawm Simiang Siyiex heue.

### *Krax Tan Son Singaix Tuah*

<sup>9</sup> Ka daux singaix tuah, maix tak tan kawn yung iak pa naog num pa loig ra mu mai phawng nghox ca ceu pa mhawm pa hoik klao tau mai bee kao son ra son khaing tix epha tau son krax tan ceu pa ih mai krax tan pa nyaux,<sup>10</sup> lheu khaing krax tan pa gleeing tau mai krax tan pa nyaux jheengjheeng, in tak mawh krax tan pa gleeing son singaix tuah ku tuah heue.

### *Krax Tan Son Ku Khix*

<sup>11</sup> Haok khix khraox tix ngaix, maix tak viex ti tan kawn mawie mhaing ra mu, yung mhaing tix mu mai kawn yung pa naog num pa loig aliah mu son krax tan pa gleeing ka Simiang Siyiex<sup>12</sup> mai phawng nghox ca ceu pa mhawm, kao son loe son khaing tix epha mawh son mawie mhaing tix mu, krax tan ceu pa ih ceu pa mhawm pa hoik klao tau mai bee kao son ra son khaing tix epha son yung tix mu,<sup>13</sup> phawng nghox ca ceu pa mhawm kao son tix son khaing tix epha pa hoik klao ti tau mai bee, son kawn yung iak tix mu son krax tan ceu pa ih mai son krax tan pa gleeing pa sioe bhawng pa mawh krax tan pa gleeing ka ngu pa khawrhawm Simiang Siyiex.<sup>14</sup> Krax tan pa nyaux kix rawm plix siiet tix plak heng mawh son mawie mhaing tix mu mai loe son tix son khaing tix heng mawh son yung tix mu mai pon son tix son khaing tix heng mawh son kawn yung tix mu, in mawh krax tan pa gleeing son ku khix, tom sidah num.<sup>15</sup> Lheu khaing krax tan pa gleeing jheengjheeng mai krax tan pa nyaux, maix tak baoux viex kawn pex tix mu

son krax tan son phimap ka Simiang Siyiex heue.

### **Krax Tan Son Pawie Pasakha**

(Krub 23:1-44)

<sup>16</sup> Ka daux khix tix kao pon ngaix, mawh pawie Pasakha Simiang Siyiex. <sup>17</sup> Ka daux khix in kao phuan ngaix mawh singaix pawie, ka daux aliah ngaix tak yaxo ti ih blah pa ang sau susaix. <sup>18</sup> Ka daux singaix jah pex tak khrawm paox tix ka daux pa singax singeh. Pex tak ang pon ti yuh kaing jhaw tix ceu kawx <sup>19</sup> mai pex tak yuh krax tan pa yuh ka ngu, son krax tan pa gleeing ka Simiang Siyiex mawie mhaing ra mu, yung mhaing tix mu mai kawn yung iak pa naog num aliah mu, an khawmuik tak mawh pa loig. <sup>20</sup> Krax tan ceu pa ih pa mhawm pa hoikklao tau mai beekao son loe son khaing tix epha mawh son mawie mhaing tix mu mai kao son ra son mawh son yung mhaing tix mu, <sup>21</sup> pex tak tan kao son tix son khaing tix epha son kawn yung iak an kix khawm aliah mu, <sup>22</sup> son krax tan pa pluatploi phimap, pex tak yuh krax tan pa khioxkhaw ka pex tix mu son pex. <sup>23</sup> Lheu khaing krax tan pa gleeing plak pongawb, pa mawh krax tan pa gleeing jheengjheeng pex tak tan krax tan in khankix. <sup>24</sup> Krax tan pa gleeing jheengjheeng mai krax tan pa nyaux khankix, pex tak tan pa ih pa mawh krax tan pa yuh ka ngu aliah ngaix pa sioe bhawng pa khawrhawm Simiang Siyiex. <sup>25</sup> Ka daux singaix aliah, pex tak khrawm paox tix ka daux pa singax singeh, pex tak ang pon ti yuh kaing jhaw heue.

### **Tan Son Pawie Singaix Tuah**

<sup>26</sup> Awm an, ka daux singaix tan pex plix pa liang, pex tak tan krax tan ceu pa ih pa khraox ka Simiang Siyiex ka daux pawie aliah vang tuah, pex tak khrawm paox tix ka daux pa singax singeh, pex tak ang pon ti yuh kaing jhaw, <sup>27</sup> pex tak viex krax tan pa gleeing pa sioe bhawng pa khawrhawm Simiang Siyiex. Pa mawh kawn mawie mhaing ra mu mai yung mhaing tix mu mai kawn yung pa naog num aliah mu, tau <sup>28</sup> mai krax tan ceu pa ih pa mawh phawng nghox ca pa

mhawm pa hoik kluklao mai bee kao son loe son khaing tix epha son mawie mhaing tix mu mai kao son ra son, son yung mhaing tix mu, <sup>29</sup> kao son tix son, son kawn yung aliah mu tau <sup>30</sup> mai yung mhaing tix mu sonsang yuh krax pa khioxkhaw son pex. <sup>31</sup> Lheu khaing krax tan pa gleeing jheengjheeng tau mai krax tan ceu pa ih, pex tak tan krax tan pa nyaux, an kix tak mawh pa loig heue.

### **29 Krax Tan Pawie Phlu Teettawng**

<sup>29</sup> Ka daux haok khix aliah tix ngaix, pex tak khrawm paox tix ka dee pa singax singeh, pex tak ang pon ti yuh kaing. Singaix an mawh singaix phlu pex teettawng, <sup>2</sup> pex tak yuh krax tan pa gleeing mawie mhaing tix mu, yung mhaing tix mu mai kawn yung pa naog num pa loig aliah mu, pa sioe bhawng pa khawrhawm Simiang Siyiex. <sup>3</sup> Krax tan ceu pa ih pa mawh phawng nghox ca pa mhawm pa hoik kluklao tau mai bee kao son loe son khaing tix epha ka son mawie mhaing mai kao son ra son ka son yung mhaing <sup>4</sup> mai kao son tix son, ka son kawn yung aliah mu tau <sup>5</sup> mai kawn pex tix mu son krax tan pa pluatploi phimap, sonsang khioxkhaw ka son pex, <sup>6</sup> lheu khaing krax tan pa gleeing yam haok khix khraox, maix tak tan ceu pa ih mai krax tan pa gleeing jheengjheeng tau mai krax tan ceu pa ih mai krax tan pa nyaux khankix awm pa koe been, maix tak yuh krax tan ka ngu pa sioe bhawng pa khaw ka rhawm Simiang Siyiex.

### **Yuh Singaix Pa Khioxkhaw**

<sup>7</sup> Yam haok khix aliah kao ngaix, pex tak khrawm paox tix ka daux pa singax singeh, pex tak tuah pa ih mai pex tak ang pon ti yuh kaing. <sup>8</sup> Pex tak tan krax tan pa gleeing son pa sioe bhawng pa khawrhawm Simiang Siyiex khawm mawie mhaing tix mu, yung mhaing tix mu mai kawn yung pa naog num aliah mu, an khankix tak mawh pa gleeing <sup>9</sup> mai krax tan ceu pa ih phawng nghox ca pa mhawm pa hoik klao mai bee kao son loe son khaing tix epha ka son mawie mhaing tix mu mai kao son ra son ka son yung mhaing tix mu <sup>10</sup> mai kao son tix son ka son kawn

28:16 Lih 12:1-13, Pi 16:1-2. 28:17-25 Lih 12:14-20, 23:15, 34:18, Pi 16:3-8.

28:26-31 Lih 23:16, 34:22, Pi 16:9-12. 29:7-11 Krub 16:29-34.

zung aliah mu, <sup>11</sup> lheu khaing krax tan pa pluatploi phimap, pa mawh krax pa khioxkhaw mai krax tan pa gleeing jheengjheeng tau mai krax tan ceu pa ih khawm krax tan pa nyaux, maix tak viex kawn pex tix mu son krax tan pa pluatploi phimapheue.

***Tan Son Pawie Nyiex Gox Bang***

<sup>12</sup> Yam haok khix aliah kao phuan ngaix, pex tak khrawm paox tix ka dee pa singax singeh, pex tak ang pon ti yuh kaing jhaw mai pex tak khrierien pawie son Simiang Siyiex aliah ngaix, <sup>13</sup> pex tak yuh krax tan pa gleeing pa mawh krax tan pa yuh ka ngu, pa sioe bhawng pa khawrhawm Simiang Siyiex, ka kawn mawie mhaing kao loe mu, yung mhaing ra mu mai kawn yung pa naog num kao pon mu, an khankix tak mawh pa loig <sup>14</sup> mai krax tan ceu pa ih phawng nghox ca im pa mhawm pa hoik klao mai bee kao son loe son khaing tix epha, son kawn mawie mhaing kao loe mu ku mu mai kao son ra sonsonyung mhaing ra mu ku mu <sup>15</sup> mai kao son tix son, son kawn yung kao pon mu <sup>16</sup> mai baovix kawn pex iaktix mu son krax tan pa pluatploi phimap, lheu khaing krax tan pa gleeing jheengjheeng khawm krax tan ceu pa ih mai krax tan pa nyaux khankix, maix tak viex kawn pex tix mu son krax tan pa pluatploi phimap. <sup>17</sup> Ka daux singaix ra, pex tak tan mawie mhaing kao ra mu, yung mhaing ra mu mai kawn yung pa naog num pa loig kao pon mu tau <sup>18</sup> mai krax tan ceu pa ih mai krax tan pa nyaux, son mawie mhaing an khankix mai son yung mhaing mai son kawn yung pa hoik simin tix awm pa koe been <sup>19</sup> mai baovix kawn pex iak hoek tix mu, son krax pa pluatploi phimap, lheu khaing krax tan pa gleeing jheengjheeng mai krax tan ceu pa ih mai krax tan pa nyaux khankix, maix tak viex kawn pex son krax tan pa pluatploi phimap. <sup>20</sup> Ka daux singaix loe, pex tak viex mawie mhaing kao tix mu, yung mhaing ra mu mai kawn yung pa naog num pa loig kao

pon mu tau <sup>21</sup> mai krax tan ceu pa ih mai krax tan pa nyaux son mawie mhaing, son yung mhaing mai son kawn yung khankix pa hoik simin tix awm pa koe been, <sup>22</sup> lheu khaing krax tan pa gleeing jheengjheeng tau mai krax tan ceu pa ih mai krax tan pa nyaux khankix, maix tak viex kawn pex tix mu son krax tan pa pluatploi phimap. <sup>23</sup> Ka daux singaix pon, pex tak tan mawie mhaing kao mu, yung mhaing ra mu mai kawn yung pa naog num pa loig kao pon mu tau <sup>24</sup> mai krax tan ceu pa ih mai krax tan pa nyaux khankix, son mawie mhaing, son yung mhaing mai son kawn yung khankix, pa hoik simin tix awm pa koe been, <sup>25</sup> lheu khaing krax tan pa gleeing jheengjheeng mai krax tan ceu pa ih mai krax tan pa nyaux khankix, maix tak viex kawn pex tix mu son krax tan pa pluatploi phimap. <sup>26</sup> Ka daux singaix phuan, pex tak tan mawie mhaing dim mu, yung mhaing ra mu mai kawn yung pa naog num pa loig kao pon mu tau <sup>27</sup> mai krax tan ceu pa ih mai krax tan pa nyaux, son mawie mhaing, son yung mhaing mai son kawn yung pa hoik simin tix awm pa koe been, <sup>28</sup> lheu khaing krax tan pa gleeing jheengjheeng tau mai krax tan ceu pa ih mai krax tan pa nyaux khankix, maix tak viex pex tix mu son krax tan pa pluatploi phimap. <sup>29</sup> Ka daux singaix liah, pex tak tan mawie mhaing daix mu, yung mhaing ra mu mai kawn yung pa naog num pa loig kao pon mu tau <sup>30</sup> mai krax tan ceu pa ih mai krax tan pa nyaux, son mawie mhaing, son yung mhaing mai son kawn yung pa hoik simin tix awm pa koe been, <sup>31</sup> lheu khaing krax tan pa gleeing jheengjheeng mai krax tan ceu pa ih mai krax tan pa nyaux khankix, maix tak viex pex tix mu son krax tan pa pluatploi phimap. <sup>32</sup> Ka daux singaix aliah pex tak tan mawie mhaing aliah mu, yung mhaing ra mu mai kawn yung pa naog num pa loig kao pon mu tau <sup>33</sup> mai krax tan ceu pa ih mai krax tan pa nyaux khankix, son mawie mhaing, son yung mhaing mai son kawn yung pa hoik simin tix awm pa koe been <sup>34</sup> mai baovix pex tix mu, awm krax tan pa pluatploi phimap, lheu khaing krax tan pa gleeing jheengjheeng mai krax tan ceu pa ih mai krax

tan pa nyaux khankix, maix tak viex pex tix mu son krax tan pa pluatploi phimap.<sup>35</sup> Ka daux singaix daix, pex tak khrawm paoux tix ka dee pa singax singeh, pex tak ang pon ti yuh kaing jhaw.<sup>36</sup> Viang mawh nan pex tak yuh krax tan pa gleeing ka ngu, awm krax tan pa sioe bhawng pa khawrhawm Simiang Siyiex, ka mawie mhaing tix mu, yung mhaing tix mu mai kawng yung pa naog num pa loig aliah mu tau<sup>37</sup> mai krax tan ceu pa ih mai krax tan pa nyaux, son mawie mhaing, son yung mhaing mai son kawng yung khankix pa hoik simin tix awm pa koe been,<sup>38</sup> lheu khaing krax tan pa gleeing jheengjheeng mai krax tan ceu pa ih mai krax tan pa nyaux khankix, maix tak viex pex tix mu son krax tan pa pluatploi phimap.<sup>39</sup> Pex tak tan ceu in khankix ka Simiang Siyiex, awm pawie pa hoik tat pex ti deuh, son krax tan pa gleeing mai krax tan ceu pa ih son krax tan pa nyaux mai krax tan pa nhim. An khankix mawh krax tan pa lheu yuh pex khaing krax tan pa kham lox sijax mai krax tan pa tang koe rhawm rhi pex khankix.”<sup>40</sup> Mose hoik krai ceu in khankix ka pui Isarela, awm pa hoik tawm Simiang Siyiex ka nawh heue.

### **30** *Been Pa Dex Mai Pa Tiextu*

Mose ah nin ka cao kaing doehru pui Isarela, “In mawh lox pa hoik tawm Simiang Siyiex.<sup>2</sup> Phan simex tix kaux kaux kham lox sijax tix ceuceu ka Simiang Siyiex, phan ang mawh nan, phan tiextu phiawklaung tokaux tix ka lox pa kham tix, nawh tak ang pon ti tiehloh ka lox tix, nawh tak yuh an awm lox pa lih khaing daux jheeh tix.<sup>3</sup> Phan ang mawh nan, phan bun tix kaux kaux kham lox sijax tix ceuceu ka Simiang Siyiex mai pa phiawklaung tokaux tix ka lox pa kham tix, yam ot nawh ka daux nyiexma keeing tix yam awn ju nawh<sup>4</sup> mai phan keeing nawh mhong lox sijax pa kham nawh mai pa phiawk nawh tokaux tix ka lox pa kham tix mai ang nyenyux ka nawh, khaix an lox sijax pa kham nawh tak mawh pa kauxcong mai pa phiawklaung nawh tokaux tix ka lox pa kham tix tak mawh pa kauxcong.”

30:2 Pi 23:21-23, Mat 5:33.

<sup>5</sup>Viang mawh nan, phan keeing nawh mhong ka lox sijax pa kham nawh mai pa phiawklaung nawh tokaux tix ka lox pa kham tix mai tiextu kah, khaix an lox sijax pa kham nawh tak ang kauxcong mai Simiang Siyiex tak pluatploi nawh, mawh kheu keeing nawh hoik tiebtie ka nawh.<sup>6</sup> Phan bun an mawh pa koe mex mai kham lox sijax mai phiawklaung tokaux tix ka lox pa kham nawh ka jheeh tix,<sup>7</sup> phan mex nawh mhong ka lox an mai ang nyenyux ka nawh, yam mhong nawh lox sijax pa kham nawh mai pa phiawklaung nawh tokaux tix, tak kauxcong.<sup>8</sup> Viang mawh nan, phan mex nawh hoik mhong daux singaix an mai tiebtie ka lox sijax pa kham nawh mai pa phiawklaung nawh ka tokaux tix mai gumlox pa lih khaing jheeh mai pa phiawklaung nawh tokaux tix, tak mawh pa giexgoing mai Simiang Siyiex tak pluatploi nawh.<sup>9</sup> Viang mawh nan miexmai tix kaux kaux angah, bun pa hoik tik mex tix tix kaux kaux angah, kham lox sijax mai phiawklaung tokaux tix, an khankix tak mawh pa kauxcong nawh.<sup>10</sup> Phan nawh kham lox sijax ka daux nyiex mex tix, phan ang mawh nan pa phiawklaung tokaux tix ka daux pa tiextu tix<sup>11</sup> mai phan mex nawh hoik mhong ka lox an mai ang nyenyux mai ang tiebtie nawh, khaix an lox pa kham nawh pa phiawk pa laung tokaux tix tak mawh pa kauxcong.<sup>12</sup> Viang mawh nan, phan mex nawh mhong ka daux singaix an mai tiebtie ka lox pa lih khaing daux jheeh nawh, lox sijax pa kham nawh mai pa phiawk pa laung nawh pa dexdawd mai tokaux tix, tak mawh pa ang kauxcong. Mawh kheu hoik tiebtie mex nawh ka nawh Simiang Siyiex tak pluatploi nawh.<sup>13</sup> Lox sijax pa kham nawh tix ceuceu mai pa phiawklaung nawh tokaux tix ka lox pa kham nawh mai pa khin ka tokaux tix, mex nawh pon kieh kauxcong mai pon yieh laux.<sup>14</sup> Viang mawh nan, phan mex nawh ang nyenyux ka nawh, tix ngaix hoik tix ngaix, lox sijax pa kham nawh, phan ang mawh nan, can lox pa kham pa koe ka piang nawh khawmuik, mex nawh tak kieh an khankix kauxcong, mawh kheu ang nawh nyenyux daux singaix mhong nawh ka ceu an.<sup>15</sup> Phan mex nawh thiang ceu an khaix singaix hoik mhong nawh kah, nawh tak

klawm ka phimap moeng tix. <sup>16</sup>In khankix mawh lox tat jhawm prawng pa tawm Simiang Siyiex ka Mose, sinax mex mai moeng nawh mai sinax keeing mai kawn sibun nawh, yam awn ju yam ot nawh nyiex keeing tix heue.

### **31 Pa Pawk Bix Ka Ceu Pui Midian**

Simiang Siyiex ah nin ka Mose, <sup>2</sup>“Maix tak pawk bix ka ceu pui Midian tang pui Isarelax, maix tak khrawm tix tau mai cub pui maix.” <sup>3</sup>Mose ah nin ka pui khankix, “Khrawm pui naing ka daux pex tixblah sonsang yuh naing mai hu puing ka pui Midian khankix, sonsang pawk pex bix tix son Simiang Siyiex ka ceu pui Midian.” <sup>4</sup>Laug pui khaing daux doehrhu tix ceu tix rheng kaux, sonsang hu puing naing. <sup>5</sup>Kix khrawm pui naing khaing daux pui Isarelax pa koe kaing rheng kaingmheen maikhrawm pui khaing doehrhu kix ku cub, tix cub tix rheng khawmuik koe tix mheen ra rheng kaux sonsang puing naing. <sup>6</sup>Mose ploi kix hu daux naing ceucad tix ceu, tix rheng hu tau mai Phenahat kawn simex Eliaza cao giex kaing li tau mai kraung naing pa singax mai teettawng pa sang phlu ka daux tawm taix nawh. <sup>7</sup>Kix puing pui Midian awm pa hoik tawm Simiang Siyiex ka Mose mai pah simex kukaux. <sup>8</sup>Kix pah simiang pui Midian phuan kaux, pa mawh Ewix, Rekin, Zurax, Hurax, Rebax, mai kix baoux pah Balam kawn simex Bawrax ka vaid. <sup>9</sup>Pui Isarelax khankix viex sibun Midian mai kawn nyawm khankix mawh pa giexlaung tau mai tobrie kix, mawie, pex, yung mai kraung khrai khawmuik. <sup>10</sup>Kix gleeing veng dahdee ot kix mai tab kix khawmuik ka ngu. <sup>11</sup>Kix khrawm kraung pa pon rhim tix khawm pui mai tobriekhankix heue.

#### **Pa Deeh Hoek Khaing Naing**

<sup>12</sup>Kix viex pui pa giexlaung mai kraung pa pon rhim kix hoek ka Mose mai Eliaza cao giex kaing li mai pui hun Isarelax khankix ka daux tab lung Mawbax hawt rawm klawng Yawdan ka toi veng Yerikho. <sup>13</sup>Mose mai Eliaza cao giex kaing li khawm cao kaing pui hun khankix, lih hu sonsang rieb kix plak praix

nyie bang. <sup>14</sup>Mose songrhawm ka cao kaing naing mai cao kaing pa kuang pui kaing rheng khankix mai pa kuang ka piang pui kaing yieh, pa kaoh khaing daux naing. <sup>15</sup>Mose ah nin ka kix, “Mawh kawn kieh pex bun khankix im ju lie?” <sup>16</sup>Jhak heue, bun khankix hoik kieh pui Isarelax lud ka daux pa hawt krax keud krax sawn pa kaoh khaing Balam mai ludloe tiehfeen kix ka Simiang Siyiex khu kaing jhaw siyiex Pegurax mai jhawm saux preng hoik hoek ka piang pui hun cie Simiang Siyiex. <sup>17</sup>Mawh khu nan pah simex kukaux daux sinax kawn nyawm khankix mai pah bun kukaux pa hoik it tau mai simex, <sup>18</sup>viang mawh nan deuh kawn nyawm bun awn ju khankix pa ang nyang saxit mai simex khankix kieh im ju heue. <sup>19</sup>Pex tak yaoux ti ot ka praix nyiex bang aliah ngaix, kaw pa hoik pah pui tix kaux kaux mai kaw pa hoik hu teeh ka pui yum mai pui pa giexlaung tak kieh tokaux tix singax ka daux singaix loe mai singaix aliah. <sup>20</sup>Kieh kraung ceep pex singax pa mawh pa yuh ka hak ku plah mai can pa taing ka hauk pex khankix mai kraung shiao can pa yuh ka khaox khankix.” <sup>21</sup>Eliaza cao giex kaing li ah nin ka pui naing pa hoik hu daux naing khankix, “In mawh lox pingnyap pa hoik tawm Simiang Siyiex ka Mose, <sup>22</sup>mawh ngie khri, mau, tawng lheung, rhiem, tawng paing mai sivun khankix, <sup>23</sup>canceu pa pon kham ka ngu khankix, pex tak thi ka daux ngu mai ankix tak mawh pa singax, yuh ka mawx kawx, caw tix sigrah pa seeing singax ka rawm mai pa ang pon kham daux ngu khankix, pex tak cub ka daux rawm. <sup>24</sup>Pex tak sidaux kraung tix ka daux singaix liah mai pex tak mawh pa singax, khaix hoik an khankix pex tak pon ti laig ka daux nyiex bang heue.”

#### **Goih Ka Kraung Pa Rhim Ti Viex**

<sup>25</sup>Simiang Siyiex kraik ka Mose ah nin, <sup>26</sup>“Maix mai cao giex kaing li Elaza, khawm cao kaing pui hun cub mawx cub an, deeh simin kraung pa pon rhim hoek, khawm pui mai tobrie khankix. <sup>27</sup>Goih kraung pa pon rhim hoek khankix lih ra son, tix son tawx ka pui pa hu daux naing mai tix son tawx ka pui hun. <sup>28</sup>Goihtitawx



keen canpaponkhaingdau naingka Siyiex, pa mawh pui, mawie, la mai yung khankix phuan yieh mu tix mu. <sup>29</sup> Mai deeh teei an khankix tix plak khaing cie kix, tawx ka cao giexkaingli Eliaza son kraxtan pa yaog sivoie Simiang Siyiex. <sup>30</sup> Khaing daux cie pui Isarelaix khankix tix plak, maix tak teei khaing daux tix phuan mu tix mu son kuceu, khaing pa mawh pui, mawie, la mai yung khankix mai tawx ka ceucad Lewix, pa priex ka nyiex gox buan man Simiang Siyiex.” <sup>31</sup> Mawh kheu nan, Mose mai cao giex kaing li Eliaza yuh awm lox tawm Simiang Siyiex ka Mose. <sup>32</sup> Kraung khrai pa kawn deuk khaing pa pon rhim pui naing ti viex hoek khankix, mawh yung liah sien aliah mheen phuan rheng mu, <sup>33</sup> mawie aliah mheen ra rheng mu, <sup>34</sup> la liah mheen tix rheng mu <sup>35</sup> mai bun pa ang nyang sax dexdawd mai simex, khawmuik koe loe mheen ra rheng kaux. <sup>36</sup> An tix plak pa mawh son pui pa lih hu ka daux naing khankix, mawh yung loe sien loe mheen aliah rheng phuan yieh mu, <sup>37</sup> keen pa tawx ka Simiang Siyiex, mawh yung liah yieh atixgliah phuan mu, <sup>38</sup> ka daux mawie koe loe mheen liah rheng mu, tawx keen son cie Simiang Siyiex atixgliah ra mu, <sup>39</sup> ka daux la khankix koe loe mheen mai phuan yieh mu, tawx keen son cie Simiang Siyiex tixgliah tix mu, <sup>40</sup> ka daux pui khankix tix mheen liah rheng kaux, tawx keen son cie Simiang Siyiex tixngoe ra kaux. <sup>41</sup> Mose tawx keen khankix ka Eliaza cao giex kaing li son kraxtan pa yaog sivoie Simiang Siyiex awm lox pa hoik tawm Simiang Siyiex ka nawh. <sup>42</sup> Cie pui Isarelaix khankix tix plak, pa hoik goih Mose ti tawx ka kix khaing pui pa hu puing naing, <sup>43</sup> pa mawh cie pui hun khankix tix plak an, mawhyung loe sien loe mheen aliah rheng phuan yieh mu, <sup>44</sup> mawie loe mheen liah rheng mu, <sup>45</sup> la loe mheen mai phuan yieh mu, <sup>46</sup> pui tix mheen liah rheng kaux, <sup>47</sup> khaing daux cie pui Isarelaix khankix tix plak, Mose deeh teei khaing daux tixphuan mu tix mu son kuceu khaing pui, khaing tobrie mai ka ceucad Lewix khankix, pa priex ka nyiex gox buan man Simiang Siyiex, awm lox pa hoik tawm Simiang Siyiex ka Mose. <sup>48</sup> Khaixan,

cao kaing naing pa kuang ka piang krunaing, cao kaing naing pa kuang pui kaing rheng mai cao kaing naing pa kuang pui kaing yieh khankix hoek dex Mose <sup>49</sup> mai kix ah nin ka Mose, “Siliex maix cao khankix, hoik teei carang pui naing pa ot greem pa kuang yix mai pui yix tix kaux kawx ang grai. <sup>50</sup> Yam in, yix hoik viex kraxtan hoek ka Simiang Siyiex, ka pa hoik pon pui kukaux, pa mawh kraung khri, ble, kong, jheep giien, beu yhaok mai maox soi khankix, sonsang taoh ju yix khaing phimap ka plak sivoie Simiang Siyiex.” <sup>51</sup> Mawh kheu nan, Mose mai cao giex kaing li Eliaza rieb ti teei kraung khri khaing kix, pa hoik mawh kraung pa shiao khawmuik. <sup>52</sup> Khri pa tan kix ka Simiang Siyiex, khaing cao kaing naing pa kuang pui kaing rheng mai cao kaing naing pa kuang pui kaing yieh khawmuik koe tix mheen liah rheng aliah yieh tixphuan shekhe. <sup>53</sup> Pui naing khankix hoik teei ti viex kraung khrai ka daux naing son tokaux tix kukaux. <sup>54</sup> Mose mai cao giex kaing li Eliaza rieb ti teei kraung khri khaing cao kaing naing pui kaing rheng mai cao kaing naing pui kaing yieh khankix mai viex laig ka daux nyiex gox buan man bang kum pui hun son krax pa dohkeud son pui Isarelaix khankix ka plak sivoie Simiang Siyiex heue.

**32** *Doehru Pa Ot Plak Toh (Pi 3:12-22)*  
 Kawn praix Rubin mai kawn praix Gat khankix koe tobrie tom haohhun mai kix yaox haktiex Yaza mai haktiex Gilat pa mawh dee mhawm ribriem son tobrie tix, <sup>2</sup> tom hoek ah nin ka Mose mai cao giex kaing li Eliaza mai ka cao kaing pui hun khankix ah nin, <sup>3</sup> “Atarok, Dibun, Yaza, Nimarax, Heshabon, Elale, Shebam, Nibo mai Beon, <sup>4</sup> can haktiex pa hoik pex Simiang Siyiex ka sivoie pui Isarelaix khankix, mawh haktiex pa mhawm sonsang eei tobrie mai siliex maix khankix hoik koe tobrie tomnie.” <sup>5</sup> Kix ah nin, “Phan yix mawh pa hoik pon buanson ka plak sivoie ngai maix, tawx haktiex in ka siliex maix khankix sonsang mawh sinngao cie yix mai paw viex yix luan ka plak toi rawm klawng Yawdan liak.” <sup>6</sup> Mose ah nin ka kawn praix Gat mai kawn praix Rubin khankix, “Glang hu

puxaik pex khankix daux naing, mawh sang ngawm pex ti ot tin lie?<sup>7</sup> Pex lai sang kieh pui Isarelax khankix ang koe rhawm kuarhawm cong sonsang tiang kix ti hu ka daux haktiex pa hoik tawx Simiang Siyiex ka kix yuh ka mawx?<sup>8</sup> Keeing pex khankix hoik yuh awm in, yam ploi aux kix hu khaing Kadeshabana, sonsang jhak kix ka haktiex an.<sup>9</sup> Yam hu kix ka daux ngawd Eshakawlax mai khaix hoik hu jhak kix ka haktiex an, kix kieh pui Isarelax khankix, ang koe rhawm kuarhawm cong, son ang kix laig ka daux haktiex pa hoik tawx Simiang Siyiex ka kix.<sup>10</sup> Yam an krax songrhawm Simiang Siyiex hoik lih mai Nawh Cao tiextu ah nin,<sup>11</sup> "Can pui pa kaoh khaing daux meung Ejiptux, pui pa hoik koe ju tixnga num haok ka piang, tak ang pon ti yaox ka haktiex pa hoik tiextu Aux ka Abraham, Icak mai Yakop tix kaux kawx, mawh kheu kix ang viex rhawm tix hawt khaix Aux,<sup>12</sup> mawh ngie Kaliep kawn simex Yephunie pa mawh ceu pui Keniet mai Yawsux kawn simex Nun khankiex pa pon ti yaox, mawh kheu kiex ra kaux hoik hawt khaix Aux khawm rhawmri tix.<sup>13</sup> Krax songrhawm Simiang Siyiex lih ka piang pui Isarelax khankix mai Nawh Cao kieh kix vungviang ka daux tiag tixpon num, tom sidah hoik lauxleeing cub pui pa yuh pa caox caig khankix ka plak sivoie ngai Simiang Siyiex.<sup>14</sup> Jhak heue, pex hoik kaoh tang keeing pex mai hoik baoux pui pa koe phimap khankix, sonsang nie baoux lih kraxsongrhawm Simiang Siyiex ka piang pui Isarelax khankix tom sigrien sigre.<sup>15</sup> Phan pex veeh ti hu khaing pa hawt grawng lawng khaix Nawh Cao, Nawh tak baoux deeh prah pex ka daux tiag mai pex tak mawh pui pa yuh pui in khankix lauxleeing."<sup>16</sup> Kix hoek dex nawh ah nin, "Yix tak sang sum kawg son tobrie tin mai yuh veng son kawn nyawm khankix<sup>17</sup> mai tokaux yix tak sang giex kraung naing tix mai hu ka plak sivoie pui Isarelax khankix tom hoik viex yix kix hoek ka dee ot kix, viang mawh nan kawn nyawm yix khankix tak ot ka daux veng pa

**32:8, 9** Si 13:17-33. **32:10-13** Si 14:26-35. **32:28-32** Yaw 1:12-15.

kaux pa cong, kheu jao kawn koe pui pa ot baoh haktiex in.<sup>18</sup> Yix tak ang lai deeh ing ka nyiexma tix, glang bawgyam ang kawn praix Isarelax kukaux nyang bax pon ti rieb ka sinngao tix.<sup>19</sup> Yix tak ang teei ti cie sinngao pa koe toi rawm klawng Yawdan ka plak an tau mai kix, mawh kheu hoik caw sinngao cieyix ti koe ka plak toh, hawt toi rawm klawng Yawdan."<sup>20</sup> Mose ah nin ka kix, "Phan pex yuh nin, khrierien kraung naing tix ka plak sivoie Simiang Siyiex son naing,<sup>21</sup> kieh can kranaing pex khankix tiang ka plak toi rawm klawng Yawdan, ka plak sivoie Simiang Siyiex glang ang Nawh Cao nyang grheu pui koeng Nawh Cao khankix khaing sivoie Nawh,<sup>22</sup> phan pex hoik pex ka haktiex an ka plak sivoie Simiang Siyiex, khaix an pex tak pon ti deeh ing mai pex tak ang lai mawh pa koe krax deuh phimap ka plak sivoie Simiang Siyiex mai ka plak sivoie ceu pui Isarelax khankix, haktiex in tak mawh sinngao cie pex ka plak sivoie Simiang Siyiex.<sup>23</sup> Phan pex ang yuh nin, pex tak tawng ka hoik lud tix ka Simiang Siyiex mai phimap pex tak mawh pa hawt ka tokaux pex.<sup>24</sup> Sum veng khankix son kawn nyawm pex mai kawg yung son yung pex khankix mai yuh awm gumlox pa lih khaing daux jheeh pex."<sup>25</sup> Kawn praix Gat, khawm kawn praix Rubin khankix ah nin ka Mose, "siliex maix tak yuh awm lox pa tawm maix cao simiang.<sup>26</sup> Kawn nyawm yix, moeng yix khankix, cub yung yix mai tobrie yix khankix khawmuik tak mawh pa ot ka daux veng haktiex Gilat tan.<sup>27</sup> Viang mawh nan, siliex maix khankix tak sang tiang toi plak an tau mai kraung naing tix kukaux son naing ka plak sivoie Simiang Siyiex mai puing naing awm pa ah cao simiang ex."<sup>28</sup> Mawh kheu nan, Mose kok cao giex kaing li Eliaza mai Yawsux kawn simex Nun mai cao kaing doehru pui Isarelax khankix.<sup>29</sup> Mose ah nin ka kix, "Phan kawn praix Gat mai kawn praix Rubin khankix pa giex kraung naing ka plak toi rawm klawng Yawdan hu tau mai pex, sonsang puing naing ka plak sivoie Simiang Siyiex mai phan pex hoik pex ka haktiex an, khaix an pex tak tawx haktiex Gilat mawh sinngao cie kix.<sup>30</sup> Viang mawh

nan, phan kix tiang toi plak an mai ang giex kraung naing tau mai pex, kix tak pon ti cie haktiex Khanan ka daux sinax pex.”<sup>31</sup> Kawn praix Gat mai kawn praix Rubin khankix deeh pawk lox ah nin, “Awm pa hoik kraik Simiang Siyiex ka siliex maix khankix, yix tak yuh heue.”<sup>32</sup> Yix tak tiang toi plak an mai giex kraung naing tix ka plak sivoe Simiang Siyiex, ka daux haktiex Khanan, viang mawh nan sinngao cie yix ka praok rawm klawng Yawdan plak in, tak mawh cie yix.<sup>33</sup> Mose tawx meung Sihon cie simiang Amawrix mai meung Awgax cie simiang Bashan, khawm haktiex khawm veng khankix pa hoik koe ka daux meung an khankix mai veng pa koe hawt vungviang mee haktiex an ka kawn praix Gat mai ka kawn praix Rubin khankix mai doehru Manashe kawn simex Yosiep tix plak.<sup>34</sup> Kawn praix Gat sum veng Dibun, veng Atarok mai veng Araw,<sup>35</sup> veng Atarotsophan, veng Yaza mai veng Yobehax,<sup>36</sup> veng Betnimara mai veng Betharan mawh veng pa kaux pa cong khawmuik mai kix sum kawg yung khankix.<sup>37</sup> Kawn praix Rubin sum veng Heshabon, veng Elale mai veng Kirayatin khankix,<sup>38</sup> veng Nebaw, veng Balameon, ceukaux veng in kiex hoik mawh pa deeh loh ti mawh pa khraox mai veng Shibamax khankix.<sup>39</sup> Ceu pui Makhirax kawn simex Manashe, hu ka veng Gilat mai rhim ti cie haktiex an mai grheu ceu pui Amawrix pa dawg ot daux haktiex an to.<sup>40</sup> Mose tawx veng Gilat ka ceu pui Makhirax kawn simex Manashe mai kix ot tan heue.<sup>41</sup> Ya-irax kawn praix Manashe hu rhim ti cie yaong Gilat khankix mai kok ceukaux an kix mawh Havotya-irax.<sup>42</sup> Nawba hu rhim tix cie veng Kenat mai nyiex yaong khankix mai kok mawh Nawba, hawt awm ceukaux tix heue.

### **33** *Lih Khaing Meung Ejiptux*

Inkix mawh krax lih hu ceu pui Isarelax khankix khaing meung Ejiptux, awm pa koe krungaing kix greem tawm taix Mose mai Arun.<sup>2</sup> Mose tiem ti deuh grawng pa sang hu kix awm lox tawm Simiang Siyiex. in mawh grawng krax pa jah kix ti lih hu.<sup>3</sup> Kix lih khaing veng Ramase ka daux khix tix kao phuan ngaix, khaix ngaix hoik pawie Pasakha

ceu pui Isarelax khankix lih hu mai ang lai ring ka plak sivoe ngai ceu pui Ejiptux khankix.<sup>4</sup> Yam an ceu pui Ejiptux tak sipaung kawn Ai tix khawmuik pa hoik pah Simiang Siyiex ka daux sinax kix, ka siyiex krub kix kawx Simiang Siyiex hoik ciyang uik.<sup>5</sup> Ceu pui Isarelax khankix, gah ti hu khaing veng Ramase mai bang baoh Sukot.<sup>6</sup> Kix deeh lih hu khaing baoh Sukot mai bang ti ot hawt veng Etham pa koe praok daux tiag.<sup>7</sup> Kix deeh gah ti khaing veng Etham mai deeh veeh ti hu ka plak veng Pihahirok pa koe see veng Balazephon mai bang ti ot ka veng Migadawlax.<sup>8</sup> Kix deeh gah ti hu khaing veng Pihahirok mai kix tiang daux rawm sigrit sigra raoh mai hoek ka daux tiag. Khaix hoik hu kix krax loe ngaix ka daux tiag Etham, kix bang ti ot hawt baoh Marax.<sup>9</sup> Kix deeh gah ti hu khaing Marax mai hoek ka yaong Elim, ka yaong Elim koe rawm keut kao ra mu mai khaox jhie yaong atixgliah gawng mai kix tom bang ti ot tan.<sup>10</sup> Kix deeh gah tix khaing yaong Elim mai hu bang ti ot hawt praok rawm sigrit sigra raoh Edom.<sup>11</sup> Kix deeh gah tix khaing hawt praok rawm sigrit sigra raoh mai hoek bang ti ot ka daux tiag Zin.<sup>12</sup> Kix deeh gah khaing daux tiag Zin mai bang ti ot hawt baoh Dawphaka.<sup>13</sup> Kix deeh gah tix khaing Dawphaka mai bang ti ot hawt baoh Alushax.<sup>14</sup> Kix deeh gah tix khaing baoh Alushax mai bang ti ot hawt baoh Rephidim ka dee ang rawm nyaux koe son pui khankix,<sup>15</sup> kix deeh gah tix khaing baoh Rephidim mai bang ti ot ka daux tiag Sina.<sup>16</sup> Kix deeh gah tix khaing baoh daux tiag Sina mai bang ti ot hawt baoh Kibarok-hatava.<sup>17</sup> Kix deeh gah tix khaing baoh Kibarok-hatava mai bang ti ot hawt baoh Hazarok.<sup>18</sup> Kix deeh gah tix khaing baoh Hazarok mai bang ti ot hawt baoh Ritama.<sup>19</sup> Kix deeh gah tix khaing Ritama mai bang ti ot hawt baoh Rimonpariet.<sup>20</sup> Kix deeh gah tix khaing Rimonpariet mai bang ti ot hawt baoh Libanax.<sup>21</sup> Kix deeh gah tix khaing yaong Libanax mai bang ti ot hawt baoh Risa.<sup>22</sup> Kix deeh gah tix khaing baoh Risa mai bang ti ot hawt baoh Kehalatax.<sup>23</sup> Kix deeh gah tix khaing baoh Kehalatax mai bang ti ot hawt gawng Shepha.<sup>24</sup> Kix deeh gah tix khaing gawng Shepha mai bang ti ot baoh Haradax.<sup>25</sup> Kix deeh gah tix khaing

Haradax mai bang ti ot hawt baoh Makhelok.  
<sup>26</sup>Kix deeh gah tix khaing Makhelok mai bang ti ot hawt baoh Tahat.  
<sup>27</sup>Kix deeh gah tix khaing Tahat mai bang ti ot hawt baoh Tarax.  
<sup>28</sup>Kix deeh gah tix khaing Tarax mai bang ti ot hawt baoh Mitakha.  
<sup>29</sup>Kix deeh gah tix khaing Mitakha mai bang ti ot hawt baoh Hashamawnax.  
<sup>30</sup>Kix deeh gah tix khaing Hashamawnax mai bang ti ot hawt baoh Mawsarot.  
<sup>31</sup>Kix deeh gah tix khaing Mawsarot mai bang ti ot hawt baoh Beniyakan.  
<sup>32</sup>Kix deeh gah tix khaing Beniyakan mai bang ti ot hawt baoh Hawhagidagat.  
<sup>33</sup>Kix deeh gah tix khaing Hawhagidagat mai bang ti ot hawt baoh Yobatax.  
<sup>34</sup>Kix deeh gah tix khaing Yobatax mai bang ti ot hawt baoh Abunax.  
<sup>35</sup>Kix deeh gah tix khaing Abunax mai bang ti ot hawt baoh Eziongeba.  
<sup>36</sup>Kix deeh gah tix khaing Eziongeba mai bang ti ot ka daux tiag Zin, baoh Kadishax.  
<sup>37</sup>Kix deeh gah tix khaing Kadishax mai bang ti ot hawt baoh gawng Hawrax pa koe ka mee haktiex Edom.  
<sup>38</sup>Khaix hoik lih hu ceu pui Isarelax khankix khaing daux meung Ejiptux tixpon num, ka daux khix phuan tix ngaix, Arun cao giex kaing li haok ka piang gawng Hawrax, awm lox tawm Simiang Siyiex mai nawh yum tan.  
<sup>39</sup>Nawh hoik koe jutix yieh tixnga loe num, yam yum nawh ka piang gawng Hawrax,  
<sup>40</sup>simiang Arat ceu pui Khanan pa ot ka plak jee haktiex Khanan, mhong ka hoek pui Isarelax khankix.  
<sup>41</sup>Pui Isarelax deeh gah tix khaing gawng Hawrax mai bang ti ot hawt baoh Zalamawnax.  
<sup>42</sup>Kix deeh gah tix khaing Zalamawnax mai bang ti ot hawt baoh Punon.  
<sup>43</sup>Kix deeh gah tix khaing Punon mai bang ti ot hawt baoh Awbot.  
<sup>44</sup>Kix deeh gah tix khaing Awbot mai bang ti ot hawt baoh Iyeabarim hawt mee haktiex Mawbax.  
<sup>45</sup>Kix deeh gah tix khaing Iyeabarim mai bang ti ot hawt baoh Dibun-gat.  
<sup>46</sup>Kix deeh gah tix khaing Dibun-gat mai bang ti ot hawt baoh Alamon-dibalatin.  
<sup>47</sup>Kix deeh gah tix khaing Alamon-dibalatin mai bang ti ot piang gawng Abarim pa koe ka sivoie gawng Nebaw.  
<sup>48</sup>Kix deeh gah tix khaing piang gawng Abarim mai bang ti ot ka daux lung Mawbax hawt rawm klawng Yawdan ka toi veng Yerikho.

33:38, 9 Si 20:22-28. Pi 10:6. 33:40 Si 21:-1.

<sup>49</sup>Kix bang ti ot hawt rawm klawng Yawdan, jah ka veng Betyesimot tom hoek ka veng Abelashitin ka daux lung haktiex Mawbax heue.

### *Pex Kix Ka Meung Khanan*

<sup>50</sup> Simiang Siyiex sikah ka Mose ka daux lung Mawbax hawt rawm klawng Yawdan pa koe plak toi veng Yerikho ah nin.  
<sup>51</sup>“Krai ah nin ka pui Isarelax khankix, yam hoik tiang pex rawm klawng Yawdan mai laig ka daux haktiex Khanan,  
<sup>52</sup>pex tak grheu pui pa ot baoh haktiex an khawmuik khaing plak sivoie ngai pex mai canceu pa saik kix ka simaox khankix mai rieanggrang pa hoik raug kix khawmuik mai yieh ti tik nyiex meeig kix pa koe dee lhaong lauxlak pakleeing khawmuik,  
<sup>53</sup>pex tak grheu pui pa ot ka daux haktiex an khankix to mai pex ot ka daux haktiex an. Kheu Aux hoik tawx haktiex an mawh sinngao cie pex.  
<sup>54</sup>Pex tak goih haktiex an awm pa koe doeh nyiexma pex mai pex yuh niep son pui pa hun pex tak tawx sinngao pa nie mai son pui pa tux pex tak tawx sinngao pa iak, son pui kukaux tak pon awm pa caw niep cie tix, pex tak pon ti cie sinngao an awm pa koe doehru keeing pex khankix.  
<sup>55</sup>Phan pex ang grheu pui pa ot baoh haktiex an, pui pa kawm prah pex khankix tak mawh krix ka daux ngai pex mai mawh kat lawm son paw pex mai kix tak tuktiaktukte ka pex ka daux haktiex dee ot pex.  
<sup>56</sup>Lheu khaing an, awm pa keud Aux ti sang yuh ka piang kix, tak lih ti yuh ka piang pex heue.”

### **34** *Tat Mee Haktiex Khanan*

Simiang Siyiex ah nin ka Mose, <sup>2</sup>“Tawx lox ka pui Isarelax khankix ah nin, yam hoik hoek pex ka daux haktiex Khanan, in mawh haktiex sinngao pa sang pon pex, pa mawh mee haktiex Khanan.  
<sup>3</sup>Daog haktiex plak jee, jah ka daux tiag Zin dex hawt mee haktiex Edom mai tom hoek praok rawm sigrit sigra kih plak toh mawh mee haktiex plak jee  
<sup>4</sup>mai deeh gah tix bleeh ka praok plak jee ton gawng Akarabim mai deeh sitoie ti hu ka plak yaong Zin mai bleeh ka plak jee yaong Kadeshax Banax mai deeh sitoie ti hu ka yaong Hazaadax mai deeh bleeh ka yaong Azamon,  
<sup>5</sup>deeh veeh ti khaing yaong Azamon mai hawt



klawng Ejiptux, tom hoek sidah hawt rawm sigrit sigra. <sup>6</sup> Son mee haktiex plak klip singaix, mawh rawm sigrit sigra ting tak mawh mee haktiex pex ka plak klip singaix. <sup>7</sup> Mee haktiex plak blaong, jah khaing rawm sigrit sigra ting, pex tak mhai ti deuh rhoi mee hawt gawng Hawrax, <sup>8</sup> jah khaing gawng Hawrax, pex tak mhai ti deuh rhoi mee hoek ka diang krax laig ka veng Hamat mai phlat hu ka plak yaong Zedax <sup>9</sup> mai deeh sitoe ti hu ka plak yaong Zipharon tom sidah hoek hawt yaong Hazaraenan. In tak mawh mee haktiex pex plak blaong. <sup>10</sup> Pex tak mhai ti deuh mee haktiex plak toh, jah khaing yaong Hazaraenan tom hoek ka yaong Shephan. <sup>11</sup> Mee haktiex in tak lih khaing yaong Shephan mai hoek ka yaong Ribalax pa koe plak toh yaong A-inax deeh hu plak jee mai hoek ka plak toh ka rawm nhawng Ginesiet. <sup>12</sup> Mee haktiex in tak hu hawt praok klawng Yawdan mai sidah ka rawm sigrit sigra kih. In tak mawh haktiex pex tau mai mee haktiex hawt vungviang ankix heue.” <sup>13</sup> Mose tawx lox ka pui Isarela khankix ah nin, “In mawh haktiex sinngao pa sang pon pex ti cie ka pa yuh niep awm pa hoik tawm Simiang Siyiex ka doehru pex dim ceu mai tix plak. <sup>14</sup> Mawh kheu doehru Rubin mai doehru Gat, awm krax pa koe doeh nyiexma keeing kix, hoik pon rieb ti cie sinngao cie kix mai doehru Manashe tix plak, hoik pon ti cie ka sinngao cie kix. <sup>15</sup> Doehru an ra cub mai doehru an tix plak, hoik pon rieb ti cie sinngao kix ka praok plak in khaing rawm klawng Yawdan toi veng Yerikho ka plak toh heue.”

#### ***Laug Cao Kaing Son Goih Haktiex***

<sup>16</sup> Simiang Siyiex ah nin ka Mose, <sup>17</sup> “In khankix mawh ceukaux pui pa sang goih ti tawx haktiex sinngao ka daux sinax pex, pa mawh cao giex kaing li Eliaza mai Yawsux kawn simex Nun. <sup>18</sup> Maix tak laug cao kaing tix kaux khaing doehru kix ku cub, sonsang teem ka kiex. <sup>19</sup> In mawh ceukaux puikhankix pasang laug maix khaing daux

34:13 Si 26:52-56. 34:13-15 Yaw 14:1-5. 35:1-8 Yaw 21:1-42.

doehru Yudax, tak mawh Kaliep kawn simex Yephunie. <sup>20</sup> Khaing daux doehru Simion mawh Shemoelax kawn simex Amihut. <sup>21</sup> Khaing daux doehru Benyamin mawh Elidat kawn simex Khisalon. <sup>22</sup> Cao kaing tix kaux khaing daux doehru Dan mawh Bukhix kawn simex Yawgalix. <sup>23</sup> Khaing daux kawn simex Yosiep cao kaing tix kaux khaing doehru Manashe, mawh Hanelax kawn simex Ephot. <sup>24</sup> Cao kaing tix kaux khaing daux doehru Epharim mawh Kemoelax kawn simiex Shiphatan. <sup>25</sup> Cao kaing tix kaux khaing daux doehru Zebulon mawh Elazaphan kawn simex Panat. <sup>26</sup> Cao kaing tix kaux khaing daux doehru Isakha mawh Palatelax kawn simex Azan. <sup>27</sup> Cao kaing tix kaux khaing daux doehru Asha mawh Arihut kawn simex Shelawmix. <sup>28</sup> Cao kaing tix kaux khaing daux doehru Napthalix mawh Pedahelax kawn simex Amihut.” <sup>29</sup> Inkix mawh pui pa hoik tawm Simiang Siyiex lox sonsang goih kix ti tawx sinngao daux sinax pui Isarela khankix ka daux haktiex Khananheue.

#### ***35 Veng Son Pui Lewix Khankix***

Simiang Siyiex sikah ka Mose ka daux lung Mawbax hawt rawm klawng Yawdan, ka plak toi veng Yerikho ah nin, <sup>2</sup> “Tawx lox ka pui Isarela khankix mai kieh kix tawx veng ka ceucad Lewix sonsang ot kix ka daux veng an, khaing haktiex sinngao cie tix mai tawx haktiex pa koe hawt vungviang veng an ka ceucad Lewix khankix. <sup>3</sup> Veng an khankix mawh sonsang ot kix mai haktiex pa koe hawt vungviang veng an tak mawh haktiex dee eei kix tobrie khankix mai son dee deuh kix kraung khawmuik. <sup>4</sup> Haktiex hawt vungviang veng pa sang tawx pex ka ceucad Lewix, jah ka guh veng tom sidah plak praix veng tak caw ti vieh tix rheng sawk. <sup>5</sup> Tiag plak praix veng ka praok plak toh ra rheng sawk, ka plak jee ra rheng sawk, ka plak klip singaix ra rheng sawk mai ka plak blaong ra rheng sawk, veng tak mawh pa koe ka daux sigreung. In tak mawh haktiex son veng cie kix. <sup>6</sup> Khaing ka daux sinax veng pa sang tawx pex ka ceucad Lewix khankix, tak tat ti deuh veng liah veng son dee peung pan pui pa



ludloe ti pah pui, sonsang klawd kah. Lheu khaing veng inkix, tak baow tawx veng tixpon ra veng ka kix. <sup>7</sup> Veng pa sang tawx maix ka ceucad Lewix khankix tak mawh tixpon daix veng. Maix tak tawx in khankix tau mai haktiex hawt vungviang ankix khawmuik ka kix. <sup>8</sup> Veng pa sang tawx maix ankix tak mawh khaing daux cie pui Isarela khankix, khaing daux doehru pa nielheu pon, maix tak teei ti tawx tom nie mai khaing daux doehru pa iak pon, maix tak teei ti tawx iak, cub mawx cub an tak tawx veng cietix tixblah ka ceucad Lewix khaing daux sinngao pa pon kix ku cub heue.

***Veng Dee Peung Pan Pui To (Pi 19:1-13)***

<sup>9</sup> Simiang Siyiex ah nin ka Mose, <sup>10</sup> "Krai ka pui Isarela khankix, yam tiang pex rawm klawng Yawdan mai hoek ka daux haktiex Khanan, <sup>11</sup> khaix an, pex tak tat ti deuh veng khankix son tix, sonsang mawh veng pa topui pa ludloe ti pah pui mai hoek peung sonsang klawd kah. <sup>12</sup> Veng an khankix tak mawh veng pa sang hoek pui pa ludloe ti pah pui tix peung kah, son ang pui pa pah pui an yaox ti yum ka pui pa pawk bix, tom hoek bawgyam cung nawh ka plak sivoe cub pui hun khankix ka daux pa prawng kah. <sup>13</sup> Veng pa sang tawx pex son pui pa hoek to ti peung khankix koeliah veng. <sup>14</sup> Pextaklaug veng loe veng ka plak sivoe rawm klawng Yawdan mai loe veng ka daux haktiex Khanan, pa sang peung kix kah. <sup>15</sup> Veng inkix liah veng, tak mawh dee peung pui ludloe tix pah pui son pui Isarela, son nyosinie mai son pui pa hoek ot tivud ticu daux sinax pex, sonsang pon kix tix klawd kah. <sup>16</sup> "Phan nawh tawk nawh tom yum ka rhiem, nawh mawh pa pah ka pui. Cao pah an tak hoek krax yum. <sup>17</sup> Phan nawh tawk nawh tom yum ka simaox pa koe daux taix tix, nawh mawh pa pah ka pui. Kaw pa pah an tak hoek krax yum. <sup>18</sup> Phan nawh tawk nawh tom yum ka khaox giex tix, nawh mawh pa pah ka pui. Kaw pa pah an tak hoek krax yum. <sup>19</sup> Kaw pa pawk bix son nham tokaux pui yum an, phan yaox kakaw pa pah pui an, yam mawx angah tak pon ti deeh pah ka nawh. <sup>20</sup> Phan nawh nyhot ka nawh

kheupa koeng tix angah, yam jawm ti khuang ka nawh tix ceuceu tom yum angah, <sup>21</sup> phan tawk nawh ka taix tix tom yum, ka daux pa koe rhawm koeng ka nawh, nawh mawh pa pah pui yum. Kaw pa pawk bix son nham tokaux pui yum an, phan yaox ka kaw pa pah pui an yam mawx angah, tak pon ti deeh pah ka nawh. <sup>22</sup> "Phan ang mawh nan, phan nawh nyhot mai ang tix koe rhawm koeng mai khuang nawh ka tix ceuceu daux pa ang tix jawm yuh angah <sup>23</sup> mai phan nawh khuang pui tix kaux kaux yuh yum ka simaox ka daux pa ang nawh yaox ka pui an mai ang mawh pui koeng nawh kah mai ang su ti yuh ka nawh angah, <sup>24</sup> cub pui hun tak prawng sinax kaw pa pah pui mai pui pa pawk bix tix awm pa koe lox tat jhawm prawng. <sup>25</sup> Cub pui hun tak ploik ka kaw pa pah pui an khaing daux tawm taix pui pa pawk bix tix, tak deeh tawx nawh hu ka veng dee peung pui to tix klawd kah. Nawh tak ot tan tom sidah yum cao giex kaing li pa ting pa hoik groi kix rawm bee pa singax singeh ka piang. <sup>26</sup> Phan kaw pa pah pui an lih plak praix ka mee veng khaing pa hoik tat kix ti deuh sonsang pon nawh ti klawd kah, <sup>27</sup> pui pa pawk bix, phan yaox nawh ka plak praix mee veng pa hoik tat kix ti deuh son pui to ti klawd mai pah nawh yum, pui pa pah tak ang koe phimap. <sup>28</sup> Grawh grawng nawh, nawh tak caw ti ot ka daux veng pa peung pui to ti klawd tom sidah yum cao giex kaing li an, khaix hoik yum cao giex kaing li pa ting, kaw pa pah pui an tak deeh pon ti ing ka haktiex tokaux tix. <sup>29</sup> "In mawh lox tat jhawm prawng son doehru pex khankix mai ka can dee ot pex khankix. <sup>30</sup> Can pui pa pah ka pui, pa mawh kaw pa hoik pah pui, tak pah nawh yum ka daux pa koe mhairug, viang mawh nan, phan mhairug koe tix kaux khaing, tak ang pon ti pah nawh yum. <sup>31</sup> Lheu khaing an, pex tak ang pon ti teei mau deeh taoh ka nawh tix ceu kawx son ju kaw pa pah pui pa koe phimap krax yum, mawh kheu nawh tak yaox ti yum tete. <sup>32</sup> Sivoe ang cao giex kaing li pa ting nyang bax yum, pex tak ang pon teei mau deeh taoh khaing pui pa to ti klawd, sonsang deeh pon ing ot nawh

ka daux haktiex tokau x tix. <sup>33</sup> Pex tak ang pon ti kieh haktiex ot tix seeing brai. Mawh kheu nham mawh pa kieh haktiex seeing brai, lheu khaing nham kaw pa kieh nham pui jah an, pa pon kieh haktiex singax. <sup>34</sup> Mawh kheu nan, paw kieh haktiex ot pex seeing brai ka dee ot Aux sinax pex. Mawh kheu Aux mawh Simiang Siyiex pa ot daux sinax pui Isarelax khankix heue.”

**36** *Bun Koe Mex Plud Sinngao*  
Cao kaing nyiexma pui Gilat kawn simex Makhirax pa mawh kawn simex Manashe, khaing daux nyiexma kawn simex Yosiep khankix hoek ka plak sivo e Mose mai pa mawh cao kaing ru pui Isarelax. <sup>2</sup> Kix ah nin “Simiang Siyiex hoik tawm lox ka cao Simiang ex kieh yuh niep mai goih haktiex sonsang tawx sinngao, son pui Isarelax khankix mai cao simiang ex hoik pon lox pa tawm Simiang Siyiex, sonsang tawx sinngao puxaik yix, Zelophat ka kawn bun nawh khankix. <sup>3</sup> Phan kix mawh pa teei ti mex ka kawn simex doehru tang ru daux pui Isarelax khankix, sinngao kix tak teei lih khaing doehru keeing ex mai deeh naok ka piang sinngao doehru pa mawh mex kix, mawh kheu nan sinngao yix tak mawh pa dieh hu khaing yix. <sup>4</sup> Yam hoek num Jubili pui Isarelax khankix, sinngao kix tak mawh pa deeh naok tix ka piang sinngao doehru pa mawh mex kix, mawh kheu nan tak teei sinngao kix lih khaing sinngao cie doehru keeing ex sax.” <sup>5</sup> Mose krai awm lox tawm Simiang Siyiex ka pui Isarelax khankix ah nin,

“Can lox pa krai ru kawn simex Yosiep mawh pa khawcaw. <sup>6</sup> In mawh lox pa tawm Simiang Siyiex son grawng pa dex mai kawn sibun Zelophat pa ah nin. Kieh kix teei ti mex ka pui pa simie kix tix teei, viang mawh nan, kix tak yaox tix teei ti mex ka daux doehru nyiexma keeing tix khaing. <sup>7</sup> Mawh kheu nan, sinngao pui Isarelax khankix tak ang pon ti luan khaing daux tawm taix doehru mawx ru an. Mawh kheu pui Isarelax khankix tak priex sinngao doehru keeing tix. <sup>8</sup> Sibun pa pon ti cie sinngao ka daux doehru pui Isarelax khankix ku cub tak yaox tix teei ti mex khaing daux doehru keeing tix, sonsang pon nawh ti cie sinngao keeing tix. <sup>9</sup> Mawh kheu nan, sinngao pon kix tak anglai yaox ti gah khaing daux tawm taix doehru kix tix cub mai tix cub, kix tak priexrien ka sinngao cie tokau x tix.” <sup>10</sup> Awm lox pa hoik tawm Simiang Siyiex ka Mose, kawn sibun Zelophat khankix hawt ti yuh awm an. <sup>11</sup> Kawn sibun Zelophat khankix mawh Mala, Tiraza, Hawgala, Milakha mai mex Nawa mawh kawn simex puxke keeing kix. <sup>12</sup> Kix teei ti mex daux doehru Manashe kawn simex Yosiep mai sinngao kix tak kau x ka daux doehru nyiexma keeing kix khawmuik. <sup>13</sup> In mawh been lox tat jhawm prawng pa hoik tawm Simiang Siyiex ka pui Isarelax khankix ka daux tawm taix Mose ka daux lung haktiex Mawbax hawt rawm klawng Yawdan, pa koe ka plak toi veng Yerikho heue.